

MARINI GUARANI

IN UNIVERSITATE NEAPOLITANA

JURIS CIVILIS

ORDINARII PROFESSORIS

PRÆLECTIONES

A D

INSTITUTIONES JUSTINIANÆ

I N U S U M

REGNI NEAPOLITANI


L I B E R II.



NEAPOLI MDCCLXXIX.

EX TYPOGRAPHIA SIMONIANA.

Cum publica venia.



I N D E X

TITULORUM.

TIT. I.	D E rerum divisione, & acquirendo earum dominio.	pag. 1
II.	De rebus corporalibus, & incorporalibus.	41
III.	De servitutibus rusticorum, & urbanorum praediorum.	44
IV.	De usufructu.	55
V.	De usu, & habitatione.	68
VI.	De usucapionibus, & longi temporis praescriptionibus.	71
VII.	De donationibus.	86
VIII.	Quibus alienare licet, vel non.	97
IX.	Per quas personas cuique acquiritur.	102
X.	De testamentis ordinandis.	108
XI.	De testamento militari.	120
XII.	Quibus non est permixsum facere testamentum.	123
XIII.	De exheredatione liberorum.	128
XIV.	De heredibus instituendis.	135
XV.	De vulgari substitutione.	146
XVI.	De pupillari substitutione.	153
XVII.	Quibus modis testamenta infirmantur.	165
XVIII.	De inofficioso testamento.	170
XIX.	De heredum qualitate, & differentia.	181
XX.	De legatis.	188
XXI.	De ademptione legatorum, & translatone.	204
	XXII.	

XXII. <i>De lege Falcidia</i> :	205
XXIII. <i>De fideicommissariis hereditatibus</i> .	209
XXIV. <i>De singulis rebus per fideicommissum relictis</i> .	216
TIT.ULT. <i>De codicillis</i> .	218

PRÆLECTIONE'S

AD INSTITUTIONES

IUSTINIANI.

LIBER II.

TITULUS I.

*De rerum divisione, & acquirendo earum
dominio.*

HOc in titulo exponuntur argumenta duo magni quidem usus in jure civili, alterum de divisione rerum, alterum de ipsarum acquirendo dominio. Utrumque brevitatis causa hic conjunxit Tribonianus, licet separatim expediatur in latioribus pandectarum libris. In re tam momentosa pandectarum ordinem sequi lubet. Quod ad primum igitur, apud vetustissimos mortales in negativa illa communiōe nullum ferme rerum discrimen erat, & earum divisiones ignotæ. Enimvero ubi ab ea communiōe recesserunt homines, diversæ statim rerum divisiones apud diversas Gentes sunt institutæ: jurisconsultorum subtilitati relictum, ut ad cujusque Civitatis regimen rerum divisiones accommodarent: neque enim quælibet rerum divisio cuilibet Civitati convenit. Nam falluntur quidem interpretes, qui sub unius Imperio studiosis unice in-

Tom. II.

A

cul.

2 *Præl. ad Instit. Justin. Lib. II. Tit. I.*

culcant celeberrimam illam rerum divisionem sub libera Republica olim inventam. *Conf. jus Regn. libr. 2. tit. 1. §. 1. & sequ.*

II. Summa autem rerum divisio in institutionibus a Triboniano proposita id spectat, ut *quædam in patrimonio, quædam extra patrimonium* intelligentur esse *princ. h. t.* In patrimonio, seu, quod eodem redit, *in bonis* esse jurisconsulti dixerunt, non solum quæ in nostro dominio constituta forent, sed & quæcumque aut peti per actionem possent, aut retineri per exceptionem. In patrimonio etiam dixerunt esse, quæ bona fide possidentur a nobis *l. 49. ff. de verb. signif.* Contra extra patrimonium in jure dicuntur, quæ aut in commercio esse nequeunt, aut domino in præse-
nti carent. Res domino in præse-
nti carere possunt, seu quia a dominis sunt derelictæ, seu quia in communione negativa positæ nondum ab aliquo sunt occupatæ. Ea autem rerum divisio & summa videri debet, & res omnes ambitu suo complectitur. Falluntur igitur, qui tertium rerum genus distinguendum existimant decepti loco Pauli in *l. 1. ff. de us. & usufr. legat.* Porro summam hanc rerum divisionem in prædicto institutionum loco accuratius explicat Tribonianus ex Marciano in *l. 2. ff. de divis. rer.* Nimirum seu in patrimonio, seu extra patrimonium res sint, generatim *quædam naturali jure communia sunt omnium, quædam publica, quædam universitatis, quædam nullius, pleraque singulorum.* Flagitat igitur instituti ratio, ut & accuratius hanc rerum divisionem enucleemus, & jurisconsultorum in eo argumento philosophiam expediamus.

III. Quod igitur ad res jure naturali commu-

RCS,

nes, ejusmodi censuerunt esse jurisconsulti, quæ vel propter immensitatem suam, vel propter earum usum omnibus mortalibus necessarium in prima rerum divisione occupari non potuerunt. Inter communia autem retulerunt aerem, aquam profluentem, mare, ejusque litora ad commodum maris usum. Neque enim mare usum præstare posset, si liber ad litus negaretur appulsus §. 1. & 5. *h. t.* Ex dictis liquet, res communes secundum jurisconsultos in negativa veluti communione fuisse relictas. Hinc privatis adjudicarunt mare, quod jactis in altum molibus interceptum esset *l. 3. ff. ne quid in loc. publ.* Privatis etiam vacuum in litore locum censuerunt acquiri, si ibi ædificia privati ponerent *l. 6. princ. ff. de divis. rer.* Quod tamen diximus, ex regulis Romani juris per inædificationem acquiri litora, id caute debet intelligi. Primo enim id admitti noluerunt veteres, si deterior litoris usus ædificando fieret *d. l. 3. ff. ne quid in loc. publ.* Hinc in litore, aut mari sine decreto Prætoris ædificari non posse monet Pomponius *l. 50. ff. de acquir. rer. dom.* Deinde ab eo occupandi jure peregrinos excludendos pronunciarunt. Jus scilicet per inædificationem occupandi litora divisum inter mortales esse docuerunt pro diversitate Imperiorum, quibus ipsa litora continerentur. Proinde & litora, in quæ porrigeretur Romanum Imperium, Romanis tantum adjudicarunt, & ab eis peregrinos excludi posse censuerunt *d. l. 3. ff. ne quid in loc. publ.* Est autem litus, quatenus hibernus fluctus maximus excurrit §. 3. *h. t.*

IV. Quod ad res publicas, eo vocabulo jurisconsulti designarunt ea, quorum proprietas quidem ad unamquamque Rempublicam pertineret,

usus vero ad cuiusque tantum Reipublicæ cives. Vide doctores ad §. 2. *h. t.* Eum autem in numerum retulere veteres portus, flumina, eorumque ripas, & alveos. Enimvero causa fluminum a ripis, & alveis diversa est in jure civili. Nam ipsum quidem flumen publicum perpetuo censetur, ejusque dominium ad Rempublicam omnino pertinet. Contra ripæ, & alvei publica sunt quod ad usum tantum: proprietates eorum est, quorum prædia contingunt §. 4. *h. t. & l. 5. ff. de rer. divis.* Hinc in flumine nata insula vicinorum erit, & recedentibus aquis, ad eodem pertinebit alveus §. 22. *& sequ. instit. eod.* Id æquitas ipsa suasit: ita enim proprii prædii cuique sit restitutio, quod interceptum vi fluminum plerumque præsumi debet. Cum vero rerum publicarum usus ad cuiusque tantum Reipublicæ cives pertineat, nulla peregrinis infertur injuria, si in nostro flumine piscari prohibeantur. Neque absurdum videri debet, piscationem in flumine civibus patere tantum, ejusdem vero profluentem aquam mortalibus omnibus communem esse. Nam flumen quidem, quatenus cum ripis, & alveo unum veluti corpus constituit, sub ipsius Reipublicæ imperio fingi debet. Recte igitur piscationis emolumento peregrini sunt interdicti. Verum aqua profluens, cum diversa sit semper, & ipsa sui celeritate dominium non admittat, sub imperio Reipublicæ fingi non potest. Proinde juris ratio postulabat, ut aquæ profluentis usus ipsis peregrinis communis esset. Falsus est igitur post Hotmannum Noodtius, qui jurisconsultos inter res communes, & publicas nullum discrimen statuisse censet *probab. l. 8.*

V. Ita quidem de communibus, ac publicis rebus philosophati sunt jurisconsulti veteres sub libera Republica nati: eamdem tamen philosophiam perperam receperunt juniores jurisconsulti, qui sub Principatu vixerunt. Sub unius enim imperio res communes, ac publicas inter jura Majestatis referri oportebat. Sane hodie portus, & flumina navigabilia, aut ex quibus navigabilia fiunt, & si quæ alia publica dicebantur olim, in tota ferme Europa, & in Regno Neapolitano potissimum ad jura Majestatis pertinent. Quod ad res communes, ne de iis quidem secundum veterum jurisconsultorum regulas sub unius imperio pronuntiandum videtur. Nam neque aer, neque aqua profluens, nec mare, ejusve litora inter res vere communes apud nos referri debent. Quod enim ad aerem, is, seu supra terram, seu supra aquam porrectus intelligatur, ipsius terræ, vel aquæ jus sequi debet. Quapropter siquidem territorium Principis inspicitur, ad jura Majestatis pertinet: si spectentur singulorum prædia, ipsis privatis est addicendus. Sane ex ipsis regulis Romani juris in muro meo supra alienam aream mœniana, vel protectum extruere nequeo, nisi eam ob rem servitus constituta fuerit *l. 22. §. 4. ff. quod vi, aut clam*. Id autem ita cautum, quia supra alienam aream expansus aer pertinet ad areæ dominum. Quod ad profluentem aquam, ea quoque diverso a fluminibus jure censi non debet. Cum igitur ubique fere Gentium flumina ad Principes pertineant, aqua etiam profluens inter jura Majestatis est referenda. Vid. Christ. Thomaf. ad *Huber. prælect. h. r. n. 5*. Denique quod ad mare, ipsi Imperatores sub Principatu ejus dominium sibi vin-

dicarunt, ut late ostendit Jacobus Gothofredus *in diff. ad l. 9. ff. de leg. Rhod. de jact. c. 7.* Superiori quidem seculo de maris imperio acerrime disputarunt Grotius, & Seldenus, pro maris libertate Grotius, Seldenus pro dominio Principum; doctorum tamen consensus Seldeno plaudit. Nihil enim impedimento est, quominus exemplo fluminum mare quoque ad jura Majestatis pertineat. His ita constitutis, ne innoxium quidem maris usum privati hodie usurpare possunt. Nam suo jure Principes recte decernunt, quatenus, & quomodo cives, & peregrini in mari versari queant; quæ etiam per mare merces, & ad quos transveterari possint. Ejusmodi autem controversiæ cum civibus secundum Regni leges, cum peregrinis ex jure foederum definiri debent. Vid. Heinecc. *in exercit. de navib. ob mercat. vetit. mercium commiss.* Sed, his omissis, de rebus universitatum pauca delibemus.

VI. Quod ad res universitatis, ut ex facilius intelligantur, universitas ipsa definiri debet. Universitas autem opportune definiri queat *civilis hominum societas, quæ neque familia, neque libera sit Respublica.* Quapropter universitates sunt collegia, vici, pagi; civitates etiam, modo summo non utantur imperio. Quæ igitur ad ea corpora pertinent, res universitatis dixerunt veteres §. 6. h. t. Ejusmodi sunt publica pascua, aut nemora, theatra, gymnasia. Ea autem in usu sunt quidem singulorum civium; ad ipsam tamen universitatem dominio, & proprietate pertinent. Vide doctores ad d. §. 6. h. t. Hinc facile intelligitur, res universitatis ab ipsius patrimonio distingui oportere: in patrimonium enim uni,

universitatis nullus est civium usus. Proinde si de patrimonio universitatis agatur, a dicendo testimonio cives arceri non debent. Nam ex ejusmodi controversiis nullum in cives commodum redire solet. Contra si de rebus universitatis sit controversia, cives testimonii dictionem non habent: ipsorum enim interest ob communem singulorum usum, sententiam pro universitate ferri. Nunc de rebus nullius sermonem instituamus.

VII. Complures in jure res nullius dicuntur. Nam eo quidem vocabulo designari solent non solum hereditas jacens, & generatim omnia, quæ domino in præsentem carent, sed res etiam universitatis, & quæ in civium communi sunt usu *l. 1. princ. ff. de divis. rer.* Enimvero res sacras, sanctas, religiosas potiori quodam jure res nullius dicere veteres. Nimirum reliquæ res nullius dici solitæ ita comparatæ erant, ut in mortalium bonis esse aliquando possent. Verum res sacræ, sanctæ, religiosæ in hominum dominium redire non poterant, quia in Deorum dominium translatae credebantur: eæ in hominum commercium tandem redibant, ubi, sacris evocatis, religione liberatae forent *l. 6. §. 3. ff. eod.* Quod autem ad res sacras, olim sub Republica libera ut res sacra fieret, Diis superis consecranda per Pontifices erat. Id institutum eo collineabat, ne qua peregrina religio in Urbem illata aut peregrina superstitione cives inficeret, aut eos ab avita religione distraheret. Vix enim in Civitate concordia sperari potest, si diversa religione civium animi dividantur. Enimvero ubi Rempublicam invasere Principes, ad firmandum Principatum Pontificis quoque maximi titulum assumentes sacrorum arbitrium in se

transtulerunt Tacit. *an.* 3. 58. Exinde igitur rerum sacrandarum facultas inter jura Majestatis referri coepit: nulla etiam res sacra credita, nisi ab ipso Principe, aliisve, quibus id demandasset, sacrata foret. Ubi rerum potiti sunt Christiani Principes, Pontificis maximi recusato titulo, sacrorum curam Episcopis reliquerunt. Id factum tamen, salvo Majestatis jure, quæ, quatenus patitur Christiana religio, ad sacrorum quoque curam extenditur. Eo jure usi Christiani Principes ipsi quoque res sacras alienari prohibuerunt. Earum tandem concesserunt alienationem, si aut captivos redimi, aut in publica fame pauperes ali oporteret, aut ipsarum Ecclesiarum æs alienum exolvi §. 8. *b. t. l. 22. C. de sacros. Eccles. novell. 120. c. 10.*

VIII. Quod ad res religiosas, apud jurisconsultos ejusmodi sunt sola sepulcra. Locum autem purum, & religione vacuum prisca superstitio religiosum fieri credebat non solum per totius cadaveris, sed per solius etiam capitis illationem. Si factum id esset, sepulcrum in Deorum manium dominium statim translatum credebatur. Non mirum igitur, si sepulcrum alienari non posset. Tantum ipsum jus sepeliendi quocumque titulo in alium recte transferebatur. Hinc jus inferendi mortui non prohibetur legare testator *l. 14. C. de legat.* Neque vero sola cadaveris illatione religione locus occupabatur: nam & fundi dominum eam in rem consentire oportebat. Id ita placuit, ne sine facto suo deterior cujusquam conditio fieret. Inde factum, ut in fundum fructuarium cadaver inferri non posset, nisi proprietarius simul, & usufructuarius consensum interposuisset *l. 2. §. 1. C. 7. ff. de relig. et §. 9. b. t.*

IX. Porro in Urbe cadavera sepeliri prohibere Decemviri, ne ob ferales ejulationes apud tumulum Martia Romanorum pectora dissolverentur. Fletus enim longiores augment mortis opinionem, ad cujus contemptum assuescendi Romani erant. Hinc extra Urbem in prædiis suum cuique sepulcrum; pauperiorum cineres publicis sepulcretis demandabantur. Ad Christianos Principes translato rerum arbitrio, secundum veterum instituta intra urbes quoque sepulcra sunt vetita. Sane ipse Theodosius Magnus valescentem morem sepeliendorum intra urbes cadaverum lege coercuit *l. 4. C. Theod. de sepulcr. violat.* Verum legem tandem vicere mores, ex quo sepulcra Martyrum intra urbes transferri cœperunt. Nimirum, pace Christianis parta, ad publicæ pietatis ostentamentum & intra urbes Martyrum translatae reliquiae, & eis certatim extructa sunt templa. Ita illustribus pietate, vel nobilitate viris primum in templorum vestibulo, mox in ipsis Ecclesiis concessa sepulcra. Conf. Murat. *anecdor. latin. disert. 17.* His initiis primus in Oriente Leo Sapiens veterem legem de non sepeliendis intra urbes cadaveribus abrogavit *novell. 53.* Eodem ferme seculo Episcopis, & parochis in Occidente data facultas suo arbitrio statuendi, quos intra Ecclesias sepeliri oporteret Concil. Meldens. *can. 72.* Ita passim non solum cum maximo mortalium damno intra urbes sunt translata sepulcra, sed & intra augustissima templa promiscua sepultura concessa fuit. Id ipsum tamen factum contra Ecclesiæ mentem. Nam, ut constat ex rituali Romano, ipsa novissima disciplina tantum in cœmeteriis, si fieri possit, sepulcra permittit.

X. Quod ad res sanctas, ejusmodi censuere veteres muros, & portas Civitatis §. 10. *h. r.* Muris Civitatum sanctitas tributa fuit, quia non solum sanctione poenali defendebantur adversus injurias, sed & quia cæremoniis suis extructi Diis medioxumis consecrari solebant Plutarch. *in Romul.* Id factum oportuit in Martia Civitate, ut non minus pro mœnibus, quam pro religione quoque cives dimicare se crederent. Eandem sanctitatem & portis Civitatum tribuere veteres. Portæ quidem Diis sacrari non poterant, cum per eas cadavera frequentissime transvectarentur. Earum tamen sanctitas inde promanabat, quod poenali sanctione muniabantur adversus injurias, earumque violatoribus imminere capitale supplicium. Eo respectu igitur jurisconsultus portas sanctis accenset *in l. 2. ff. ne quid in loc. sacr.* Conf. Oiscl. *ad Cais instit. libr. 2. tit. 1. §. 1.* Nunc, quod superest, de rebus singulorum pauca subnectamus.

XI. Res singulorum in jure dicuntur, quæ ad privatos in Civitate pertinent. Et apud nos quidem res privatorum omnes & ejusdem sunt ferme generis, & ejusdem fere juris existimantur. Verum apud Romanos olim nec ejusdem generis res privatorum erant, nec ejusdem juris existimabantur. Romæ scilicet res privatorum aut *mancipi*, aut *nec mancipi* erant. *Mancipium* dixere veteres dominium illud nobilius, quod unis civibus competere poterat: id dominio naturali opponebatur, cujus tantum peregrini capaces erant. Res igitur mancipi censebantur, quæ in dominio Quiritario essent: id autem dominium parabatur, si modis acquirendi civilibus res a civibus acquisitæ forent.

Res

Res nec Mancipi erant, quæ in dominio tantum naturali possessoris forent. Justinianus quidem res generatim omnes eodem jure possideri jussit, ac rerum Mancipi, ac nec Mancipi discrimen omnino sustulit *l. un. C. de nud. jur. Quirit. roll.* In Pandectis tamen veteris differentię vestigia haud infrequenter occurrunt. Juvabit igitur ad antiqui juris intelligentiam, accuratius hic definire res Mancipi.

XII. Res igitur Mancipi dicebantur, quæ & per Mancipationem alienari poterant, & in dominio Quiritario esse Ulpian. *fragm. tit. 14. §. 3.* Quod ad Mancipationem ea singularis species alienationis erat, quæ competeat solis civibus, aut illis, quibus jus commercii datum esset. Eadem coram libripende, antestato, & quinque testibus certis verbis expedienda erat. Vide Caium *instir. libr. 1. tit. 6. §. 2. ex recens. Schulting.* Illud singulare in Mancipatione erat, quod & res per eam traditæ statim in accipientis dominium Quiritarium transferrentur, & rei Mancipatæ periculum penes Mancipantem esset. Proinde si per Mancipationem res tradita evicta foret, Mancipans in duplum obligabatur Paul. 2. *sentent. 17.* Vid. Aleandr. ad Caium *loc. cit. ex recens. Schulting. not. 21.* At vero si res Mancipi foret, non sola Mancipatione quidem, sed & quibuscumque modis acquirendi civilibus ejus dominium Quiritarium in alterum transferri poterat. Mancipationem tamen hic speciatim exposui, quia singulares ejus effectus erant. De ceteris vero civilibus acquirendi modis infra videbimus *libr. 2. tit. 6.*

XIII. Porro res Mancipi Ulpianus definire non ausus eas tantum recenset *fragm. 19. 1. Mancipi res sunt*

sunt prædia in Italico solo tam rustica, quam urbana; item jura prædiorum rusticorum, veluti via, iter, actus, & aquæductus: item servi, & quadrupedes, quæ dorso, collove domantur, velut boves, muli, equi, asini. Ceteræ res nec mancipi sunt. In præsentī argumento Ulpianus definitionem periculosa[m] censuit. Prætermissa igitur definitione generis, ex jurisconsultorum more statim ad exempla progreditur. Proinde audacior Ulpiano Cujacius videri queat. Is vero res mancipi perperam definivit, quæ patrimonii partem nobilissimam complectuntur *in paratitl. ad tit. C. de usuc. transform.* Nam asinus bestiarum vilissima res mancipi est; eodem tamen jure ipsum aurum non censetur. In ea re igitur definitionibus abstinemus, atque Ulpiani enumeratione contenti simus. Enimvero in rebus enumerandis, quæ ætate sua mancipi erant, margaritas omittit jurisconsultus: & eæ enim inter res mancipi referuntur a Plinio *hist. natur. 9. 35.* Margaritas in numeratione sua fortasse præterit Ulpianus, quia earum jurisconsulti vetustiores non meminerunt. Vide Bynkershoek. *de reb. mancip. c. 4.* Margaritis exceptis igitur, generatim regulam Ulpiani sequemur: *ceteræ res nec mancipi sunt.*



De acquirendo rerum dominio.

Dominium generatim definiri potest *jus nobis in re nostra competens*. Proinde ut rectius intelligantur, quæ de dominio dicturi sumus, pauca hic de juribus admonebimus, quæ civibus competere solent in Civitate. Ex regulis igitur Romani juris generatim duo nobis possunt jura competere. Jus scilicet nobis competens necessario actionem gignit. Quemadmodum igitur duo tantum actionum genera occurrunt in jure civili §. 1. *instit. de action.* ita & duo tantum jura generatim sunt statuenda. Exemplo etiam actionum jurisconsulti jus nobis competens vel *in rem*, vel *in personam* dixerunt esse. Jus in rem appellaverunt jurisconsulti, si sine respectu personæ res ipsa nobis esset obnoxia. Jus in personam dixerunt, si ad aliquid dandum, vel faciendum ipsa alicujus persona nobis obligata foret. Verum a jurisconsultorum formulis recessere doctores. Passim enim *in re*, & *ad rem* jura dividunt. Per jus ad rem jus in personam intelligunt. Sat absurde quidem jus in personam *jus ad rem* appellavere doctores; de vocabulis tamen cum seculo jurgare non lubet.

II. Jam vero jus ad rem definiri solet *facultas personæ competens in personam, ut hæc aliquid dare, vel facere teneatur*. Ex eo jure promanant obligationes personales omnes. Eæ, cum certæ personæ cohæreant, tantum obligatum ipsum obstringunt, & in alterum transire nequeunt. Verum de jure ad rem, & obligationibus inde manantibus differemus in libro tertio: hic, quod
ratio

ratio dominii postulat, de jure in re sermonem instituemus. Jus autem in re passim post Grotium definiri solet *facultas homini in rem competens sine respectu ad certam personam*. Id igitur juris ipsi rei cohæret, & rem ipsam perpetuo comitatur: proinde, re seu surrepta, seu perditâ, extinguere non potest. Si factum quid tale fuerit, ejus rei causa adversus quemcumque possessorem licebit agere *l. 25. ff. de oblig. et action.* Juris autem in re species quatuor occurrunt in jure civili, *dominium* scilicet, *servitus*, *pignus*, *hereditas*. Conf. Huber. *digress. libr. 4. c. 6.* Quid hereditatis vocabulo in jure designari soleat, infra videbimus *libr. 2. tit. 2. §. ult.* De reliquis juris in re speciebus opportunius alibi differemus. Hic, quod præsens titulus flagitat, de dominio tantum magno scelerum, ac virtutum inter mortales incitamento videbimus. Ut autem apte procedat suscepta disputatio, primum omnium dominii inter mortales originem; deinde ejusdem species, & causas investigabimus. Ita enim facilius innotescet, quibus modis jure seu Gentium, seu civili dominium acquiri possit.

• III. Quod ad primum igitur, recte videtur pronunciasse Nerva, primum inter mortales dominium ex naturali rerum possessione originem accepisse *l. 1. §. 1. ff. de acquir. vel amitt. possess.* In primæva scilicet rerum communione in pari causa conditionem possidentis oportebat meliorem esse. Proinde inique fecisset ille, qui in rei controversæ dominio possidenti præferri voluisset. Ejus autem juris vestigia in iis hodie quoque cernimus, quæ in terra, mari, Cœloque capiuntur, quæque in negativa adhuc communione cen-

sentur esse. Ea enim & statim eorum sunt, qui primi possessionem apprehenderint, eisque, quamdiu in eorum possessione sunt, adimi nequeunt. Ita igitur inter primos mortales necessario fiebat olim, ut inter possessionem, & dominium ipsum nil interesset. Enimvero id quidem dominium stabile, ac firmum non erat. Amissa enim possessione, statim evanescebat. Nam ex sola apprehensione fieri non poterat, ut jus cujusquam in rem apprehensam ultra possessionis tempus extenderetur. Itaque, possessione quidem amissa, & prioris possessoris jus perimebatur, & in negativam communionem res statim redibat. Ita in libero illo occupandi jure jurgia inter mortales creberrima. Ad ea igitur præcavenda consultius visum humano generi, dominium constituere firmum, ac stabile. Ad ejusmodi tamen dominium constituendum opus communi pacto inter mortales fuit, quo & libero occupandi juri renunciaretur, & rei semel ab alio occupatæ possessionem nullus invaderet. Dominium igitur firmum, ac stabile, quo hodie utimur, sine communi aliquo mortalium pacto non potest intelligi.

IV. Dubium tamen videri queat, utrum ejusmodi pactum universum genus humanum, an singulæ Civitates inierint. Si primum dicatur, dominium stabile juri Gentium suam debet originem. Sin admittatur alterum, ejusmodi dominium ex jure civili derivandum erit. Prior sententia Grotio placuit *de jur. bell. & pac. 2. 2. 2.* Verum probabilius videri debet, pactum de dominio stabili a singulis Civitatibus fuisse initum. Ob discordias enim ex libera occupatione manantes singulæ Civitates necessario pacisci debuerunt, ut ci-
ves

ves rerum semel occupatarum stabile dominium retinere pergerent, licet in naturali earum possessione non forent. Conf. Bynkershoek. *de domin. mar.* c. 1. Utcumque id fuerit, illud certe negari nequit, Romanos jurisconsultos hanc postremam Philosophiam fuisse sequutos. Ii enim docuerunt, rerum suarum dominium extra propriæ Civitatis territorium a domino non retineri. Inde autem liquet, secundum jurisconsultos dominium firum, ac stabile ex pacto singularum Civitatum enatum esse. Sane scribit aperte Pomponius, res nostras pervenientes ad eas Gentes, quibuscum foedus non sit, statim earum fieri *l. 5. §. 2. ff. de capt. & postlim.* Id jurisconsultus edixit, quia Civitatis nostræ conventio de rebus semel occupatis non invadendis homines alterius Civitatis obligare non poterat. Ea in re populos tantum Pomponius excipit, quibuscum foedus fuisset initum. Nam foederis quidem sanctitas postulabat, ut alterius Civitatis pactum de stabili inter cives dominio apud Civitatem foederatam ratum haberetur. Conf. Bynkershoek *loc. cit.* Sed, his omissis, quod polliciti supra sumus, de domini speciebus sermonem instituiamus.

V. Quod ad domini species, earum in jure civili complures occurrunt. Celeberrima apud jurisconsultos est domini divisio in *Quiritarium*, & *naturale*. Postquam scilicet victricibus armis imperium protulere Romani, principia juris quædam vanissima excogitarunt, quæ tot bella feliciter depugnata populo rerum domino facile persuadere poterant. Ut igitur singularem illam libertatem ex jure Quiritium unice sibi vindicarunt, ita & singulare quoddam dominium sibi tribuerunt.

Id & Quiritarium appellarunt, eoque solos Romanos potiri posse docuerunt. Ita jurisconsulti duplex distinxere dominium alterum *ex jure Quiritium*, alterum *ex jure Gentium*: hoc Quiritario oppositum *bonitarium* dici solet. Dominium Quiritarium a solis civibus acquirebatur; peregrinis dominium tantum ex jure Gentium acquiri poterat. Neque tamen quæcumque possidebantur a civibus, dominium Quiritarium admittebant. Nam sub dominio Quiritario res esse non poterat, nisi & mancipi esset, & modis acquirendi civilibus acquisita foret. Verum has quidem ambages abolevit Justinianus. Is enim, domini causa ad simplicitatem juris Gentium revocata, inter dominium bonitarium, & Quiritarium differentiam omnino sustulit *l. un. C. de ned. jur. Quirit. tollend.*

VI. Frequens etiam apud veteres erat domini divisio in *Prætorium*, & *civile*; *Italicum*, & *Provinciale*. Eas tamen domini divisiones, cum ad novissimi juris intelligentiam vix usquam prosint, sciens ego prætereo. Rectius hodie ex fori usu dividi dominium queat in *plenum*, *directum*, & *utile*. Plenum dominium in foro dicitur, si jus utendi fruendi, & liberum de re statuendi arbitrium sit penes eundem. Directum dominium appellatur, si jure utendi fruendi ultro se dominus abdicarit; ob eam autem abdicationem annua præstatio in speciebus, aut pecunia ab utili domino ei promissa fuerit. Utile denique dominium dici solet, si rei possessor jure quidem utendi fruendi non careat, de ea tamen libere statuere nequeat, ac prædictis præstationibus sit obnoxius. Ita sane in emphyteusi directum dominium est penes em-

phyteutici fundi dominum; utile vero dominium est penes emphyteutam. Sed, his omiſſis, domini cauſas expediamus.

VII. Domini cauſam in *remotam*, & *proximam* doctores paſſim partiri ſolent. Cauſa domini proxima in jure *modus acquirendi* dicitur. Per eam acquirendi cauſam ſtatim dominium in accipientem transfertur. Cauſa domini remota a ju- riſconſultis *titulus* appellatur; ea non dominium transfert, ſed tantum jus *ad rem*, quod ajunt, ſeu obligationem perſonalem producit. Ita ſane venditio, & tituli id genus alii nobis alterum ad dandum obſtringunt; venditæ tamen rei dominium per traditionem tandem transfertur. Venditio igitur titulus, traditio modus eſt acquirendi. Proinde per titulum jus tantum in perſonam quæri poteſt, neutiquam vero dominium. Jure naturali nil quicquam impedimento eſt, quominus ſine traditione dominium transferatur Puſendorf. *de jur. Natur. & Gent.* 4. 9. 8. Verum ex regulis Romani juris ſine traditione neque dominium, neque aliud jus in re transferri poteſt l. 20. C. *de pact.* Non deſunt quidem in jure ſpecies, in quibus ſine traditione dominium transfertur; eas tamen juris exceptiones in tempore enarrabimus.

VIII. Porro quod ad titulos acquirendi domini, eorum octo tantum in pandectis occurrunt; *pro empto* ſcilicet, *pro legato*, *pro donato*, *pro ſolutato*, *pro dote*, *pro ſuo*, *pro dereliſto*, *pro adjudicato*. His tamen recte doctores adjiciunt titulos *pro permutato*, *pro tranſaſto*. Sat enim conſtat, permutationis, aut tranſactionis titulo in alios dominium transferri poſſe. At vero per-

pe.

peram quidam titulum etiam *pro herede*, ac *pro possessore* constituunt. Quod enim ad possessionem, ea jus est momentaneum, neque ex nudo possessionis titulo dominium unquam nasci potest. Quod ad heredem, is in titulum ipsius defuncti succedit, neque nudo hereditatis titulo rerum hereditariarum dominium vindicare potest. Ipsum scilicet defunctum heres veluti præsentem exhibet: rerum igitur hereditariarum dominium ad heredem pertinet non novo hereditatis delatæ titulo; in eas dominium ei competit ob titulum potius, quo ad defunctum ipsum fortasse pertinuerunt *l. ult. C. pr. hered.*

IX. Quod ad dominii acquirendi modos, per eos, ut supra monuimus, ipsum dominium transferri solet. Ii autem jure vel Gentium, vel civili sunt instituti. De acquirendi modis institutis jure civili infra videbimus *tit. 6.* Hic tantum enarrabimus acquirendi modos, qui ex jure Gentium promanarunt. Acquirendi autem modi ex jure Gentium promanantes recte dividuntur a Grotio in *originarios*, & *derivativos de jur. bell. & pac. 2. 3. 1.* Originarii dicuntur, quibus rei nondum ab alio acquisitæ dominium primi nanciscimur. Derivativi appellantur, quibus dominium ab alio jam quæsitum voluntate domini transferatur in alterum. Rursus originarius acquirendi modus vel *simpliciter talis* est, eoque ipsius rei dominium primum acquirimus: vel originarius est *secundum quid*, eoque incrementum aliquod accedit rei jam nostræ Pufendorf. *de jur. Natur. & Gent. 4. 6.* Quapropter acquirendi modus originarius simpliciter talis est *occupatio*; originarius secundum quid est *accessio*; *traditio* modus est

acquirendi derivativus. Ut apte igitur destinata componam, primum de occupatione, deinde de accessione, postremo de traditione sermonem instituam.

X. Quod ad occupationem, ea hodie aut unus, aut celeberrimus est originarius acquirendi modus. Per occupationem autem ea tantum acquiri possunt, quæ in *negativa*, quam vocant, communione manserunt. Occupationi igitur subfunt tantum ἀδερπота, seu res nullius. Per res nullius hic ea tantum intellige, quæ nondum ab alio sunt occupata, quæve semel occupata pro derelictis a domino fuerint habita. Quæcumque ita sunt comparata, seu mobiles, seu res soli fuerint, & libere occupari possunt, & statim post occupationem occupanti cedunt §. 12. *h. t.* Enimvero tantisper interest, num a privatis, an a populo aliquo *per universitatem* occupatio fiat. Si enim a privatis ipsis fiat occupatio, rerum occupatarum statim ipsi privati dominium nanciscuntur. Sin ea fiat *per universitatem* a populo, rerum occupatarum dominium ipsi Reipublicæ addici debet. Eo autem casu res occupatæ ab ipsa Republica legem accipient, & per fundos, si ita placuerit, mox dividuntur. At vero a quocumque occupatio facta fuerit, ea sine occupandi animo, & ipsa corporali apprehensione constare nequit *d. §. 12. C. sequ. h. t.* Nimirum justus occupandi titulus est *negativa* communio in res nullius: eo acquirendi titulo omnes sibi dominium tueri possunt. Si igitur sola voluntate rerum occupatio fieri posset, post alterius occupationem statim adessent sexcenti alii, qui rem ab alio occupatam se præoccupasse contenderent. Juris autem Gentium simplicitati
con.

convenit, ut res quidem mobiles occupentur manibus, aut instrumentis; res vero soli pedibus contingantur. Sat absurde igitur Andrius ille contendebat, Acanthum urbem suis popularibus se occupasse, quod emissum a se jaculum ejus portæ esset infixum Plutarch. *quæst. Græc.* 30. Occupationis autem complures sunt in jure species. Celebrioris sunt usus venatio, occupatio bellica, inventio. De singulis pro instituto videbimus.

XI. Quod igitur ad venationem, ea in præsentī argumento cum aucupium, tum piscationem complectitur. Cum itaque quæ in naturali sua libertate animalia per Cælum, terram, aut mare vagantur, in negativa communione sint, ea statim capientium fiunt *l. 1. §. 1. ff. de acquir. rer. domin. C. §. 1. instit. h. t.* Non quælibet tamen animalia per venationem acquiri possunt. Nimirum bestiarum non unum est genus. Earum aliæ *feræ* dicuntur, quia scilicet in naturali sua libertate versantur, & nondum à quopiam sunt occupatæ: aliæ *cicuratæ* appellantur, quia contra ipsarum naturam subiectæ dominio veluti mansuetæ videntur: aliæ *cicures*, quia scilicet sub domino natæ mansuetæ creduntur. Nam bestiarum feritas non ex naturali sua ferocia, sed ex libertate, vel dominio in jure æstimatur. Cujusmodi igitur quæque sint bestię, potius ex ea regula, quam ex prolixis Triboniani enumerationibus judicandum videtur. Cicuratæ bestię, quo usque sub alterius custodia continentur, res nullius videri nequeunt: eas igitur jus civile per venationem acquiri vetat *d. l. 1. §. 1. ff. de acquir. rer. domin. et d. §. 1. h. t.* Hinc & a piscibus in piscina, & a feris in vivario positis piscator,

22 *Præl. ad Instit. Justin. Lib.II. Tit.I.*

aut venator abstinere debet. Eæ enim aut cicures, aut cicuratae videri debent *l. 3. §. 4. ff. de acquir. possess.* Enimvero si feræ sint bestiae, nil quicquam intererit, in proprio, an alieno prædio eæ sint captæ. Hinc, laqueo in alieno posito, si eo aper ita sit irretitus, ut expedire se nequeat, venator licet absens ejus dominus statim evadit: agri autem dominus, si aprum solverit, ad sarcendum damnum a venatore recte convenietur *l. 55 ff. de acquir. rer. domin.* At vero ferarum occupatio non vulneratione quidem, sed ipsa tandem apprehensione peracta intelligetur. Eam sententiam & diserte confirmat Justinianus *§. 13. h. r.* & ita contra Trebatium Cajus pluribus jurisconsultis placuisse scribit *in l. 5. §. 1. ff. de acquir. rer. domin.* Verum controversia isthæc aliter apud venatores hodie expediri solet.

XII. Jam vero in Regno Neapolitano, ac ceteris serme regionibus, quæ regnantur, principia Romani juris in præsentī argumento non obtinent. Apud nos sane seu ob Friderici I. constitutionem *feudal. consuet. 2. 56.* seu ob vetustissimam fisci præscriptionem ad jura Majestatis piscatio, venatio pertinet. Proinde in Regno Neapolitano sine Regiis codicillis cuiquam venari non licet. Neque vero id injurium videri debet. Licet enim libera sit cuique venatio jure Naturæ; ea tamen libertas est ex jure Naturæ *permisso*, quod vocant: juri autem Naturæ *permisso* recte Principes addunt, aut derogant. Conf. Grot. *de jur. bell. et pac. 2. 2. 5.* Ratio scilicet Civitatis exposcit, ut Principum legibus libertas naturalis coerceri possit iis quoque vetandis, quæ jure naturali non prohibentur. Hinc non tantum venatio-

tionem ipsam Princeps prohibere potest, sed & ipsum feræ dominium, quod Naturali jure occupanti cedit, licet ei præcipere. Vide de tota re Pufendorf. *de jur. Natur. et Gent. libr. 4. c. 6. §. 7.* Id ipsum tamen ultra Principem extendi non debet. Nam baronibus quidem venationem prohibere non licet, nisi eam aut in fetudum acceperint, aut legitima præscriptione sibi quæsierint de Franch. *decis. 158.*

XIII. Bellica occupatione quoque jure Gentium res hostium acquiruntur. Nam secundum Gentium instituta res hostium pro rebus nullius censentur. Id ipsum tamen non inde profluit, quod res hostium vere nullius videri debeant, ac post bellum indictum re vera hostes dominium rerum suarum amittant. Jus occupandi res hostium inde potius promanavit, quod post bellum, omni fœdere abrupto cum hostibus, mutuæ pateat occupationi locus. Nimirum, ut supra vidimus, aut juris civilis auctoritas, aut fœderis sanctitas nobis dominium tueri potest. Proinde nulla cum injuria hostes res hostium occupare poterunt, quos neque jus Civitatis, neque fœdus ullum ab alieno manus abstinere jubet. Dubium tamen videri queat, cuinam cedant res bello captæ, ipsisne militibus, an Reipublicæ, cujus & stipendiis, & auspiciis bellum geritur. Ea in re recte videtur distinxisse Grotius inter actus belli publicos, & privatos *de jur. bell. & pac. 3. 6. 10. & sequ.* Publici belli actus erunt, si imperatoris jussu suscepti fuerint. Privati belli actus videri debent, si injussu ducis ab ipsis militibus ultro suscipiantur. Grotio autem auctore quæ in actu belli publico capiuntur, ea non militibus quidem, sed ipsi Reipublicæ ad-

dici debent. Ea Grotii sententia cum ipsis regulis Romani juris convenire videtur. Sane cum res soli in publico tantum belli actu occupari soleant, eæ, si captæ fuerint, publicari jubentur *l. 20. ff. de captiv. & postlim.* Contra eodem auctore Grotio si in actu belli privato res hostium captæ fuerint, ex simplicitate juris Gentium rectius militibus addicuntur. Non aliunde fortasse pronuntiavit Celsus, si quid hostium apud nos deprehendatur, exorto bello, statim nostrum evadere *l. 1. §. 1. ff. de acquir. rer. domin.* Sed, occupatione relicta, de inventione pauca subnectamus.

XIV. Quod ad inventionem, per eam acquirimus, quæ aut sua natura nullius sunt, aut quæ dominus, abdicato sponte dominio, pro derelictis haberi voluit. Pro derelictis autem ea tantum existimari debent, in quibus ita affectus sit dominus, ut eadem in rebus suis porro censerì nolit *§. 46. h. t.* Si quæ igitur ignorantibus excidunt, inventoris non erunt; furti etiam se obligabunt, qui ea dominis ultro non restituerint *§. ult. inst. cod.* Hinc ne præmium quidem inventionis peti potest ab inventore, licet id a domino ultro oblatum accipi honeste possit *l. 43. §. 9. ff. de furt.* His ita præstitutis, si vel solo desiderio rem amissam persequimur, ea pro derelicta habenda non erit. Id ipsum autem obtinebit, licet ejus recipere sperari vix possit. Proinde & oves a lupo subreptæ nostræ pergunt esse *l. 8. §. ult. ff. fam. l. 8. ff. ad leg. Rhod.* Ea quoque de causa naufragii reliquæ veteribus dominis sunt addicendæ *l. 1. C. de naufr.* Quod ad reliquias naufragii ta-

men, eas ex lege Rhodia apud Romanos olim-
 haud absurde Salmasius ad fiscum pertinuisse scri-
 bit *de mod. usur.* 5. Eo saltem jure a publicanis
 Eudæmonis bona fortasse direpta fuerunt *in l.*
αξιωματῆς. ff. ad leg. Rhod. Verum crudelissimum
 visum Antonino Principum liumanissimo, ultra
 naufragium sævire quempiam; crudelius adhuc,
 eorum spoliis ditescere Principem, quibus peper-
 cisset iratum mare. Proinde ipsemet Antoninus,
 ut ibidem videtur evicisse Salmasius, luctuosas
 naufragorum reliquias fisco adjudicari vetuit *d. l.*
1. C. de naufrag. Enimvero sequiori ævo in Oc-
 cidente rursus invaluit, ut naves, & bona nau-
 fragorum ad litus ejecta certo saltem post tempo-
 re fisco addicerentur. Vide Ducang. *in voce la-*
gan. & Roberti. *in Carolo V. introd. not. 29.* Eam
 consuetudinem in Regno quoque Neapolitano ob-
 tinuisse, si dominus intra triduum non superveni-
 ret, testatur Andreas de Ifernina ad *constit. rapi-*
nas. de surripient. aliqu. de naufr. Enimve-
 ro Fridericus II. fiscum ex naufragorum bonis
 lucrum captare vetuit: extremam quoque sati
 necessitatem indixit adversus eos, qui reliquias
 naufragorum invaderent: heredes vero damnato-
 rum naufragis ipsis ob res in naufragio raptas in
 quadruplum teneri jussit *d. constit. rapinas. de*
surrip. aliqu. de naufr. In Regno igitur ex con-
 stitutione Gvilelmi I. bona naufragorum fisco tan-
 dem addici debent, si naufragi ipsi, eorumve he-
 redes ea non vindicent *constit. dohanae. de offic.*
secret. Quod autem ad alias res inventas, eas idem
 Gvilelmus ab inventoribus bajulis locorum obla-
 tas ad Regiam Curiam deferri jussit: easdem, nisi
 intra annum vindicasset dominus, fisco generatim
 ad-

26 *Prel. ad Instit. Justin. Lib. II. Tit. I.*
addici voluit *constit. pecuniam. de pecun. invent.*
in reb. alien.

XV. Thesaurus etiam jure Gentium per inventionem inventori cedit. Thesaurus autem in jure definitur *latens pecunia, cujus dominus ignoratur l. 31. §. 1. ff. de acquir. rer. dom.* Thesaurus igitur in præsentī argumento censerī non debet pecunia, quam quis custodiæ causa sub terra condiderit. Si quis vero id genus pecuniam abstulerit, furti obligatur *d. l. 31. ff. eod.* Furti igitur se obligavit apud Plautum Strobilus, qui subripuit auri ollam ab Euclione defossam *in aular.* Thesauro ita definito, sub vetustioribus quidem Principibus is totus sine discrimine pertinebat ad fiscum, ut ostendit Jacobus Gothofredus ad *l. 1. C. Theodos. de thesaur.* Verum Hadrianus thesaurorum inventores fortunæ munere non prorsus defraudari voluit. Ab eo enim cautum edicto fuit, ut si quis in suo, sacro, aut religioso loco thesaurum fortuito invenisset, eum totum sibi haberet; si in alieno, eum cum soli domino partiretur; si denique in loco publico, ejus dimidium inventori, dimidium fisco jussit addici. Quod si malis artibus ex credulitate veterum thesaurus inventus esset, eum totum a fisco vindicari voluit *§. 39. h. t.* Quid si thesaurus a mercenario in alieno fuerit inventus? Rem definiendam aggreditur Bynkershoekius *observat. 2. 4.* Eum adire non poenitebit.

XVI. Porro per Friderici I. constitutionem in præsentī argumento ab Hadriani edicto recessum in Occidente non fuit *2. feudal. consuet. 56.* Et ibi enim ex prædicta locorum diversitate de thesauri acquisitione decernitur. Verum Gvilelmus I.
in

in Regno Neapolitano ab jure Romano recedi jussit *constit. pecuniam. de pecun. invent. in reb. alien.* Ibi enim edixit, jus acquirendi per inventionem res, quarum dominus ignoratur, inter jura Majestatis referri oportere. Exinde apud nos sine loci discrimine thesauri fisco cœperunt addici. Carolus quidem II. edictum Hadriani in Regno restituit *capit. quia non decet. de thesaur.* lex isthæc tamen apud nos non diu stetit. Saltem ex vetustissima præscriptione hodie fiscus generatim thesauros sibi vindicat. Occasionem fortasse præscriptioni dedit aut prædicta Gvilelmi constitutio, aut, quod verisimilius ego crediderim, Constantini rescriptum in l. 1. C. *Theod. de thesaur.* Nimirum ibi ab Imperatore cautum, ut thesauri quidem dimidium inventori cederet, si is rem fisco nunciaret. Cum igitur inventores, ut fiscum prorsus excluderent, inventionem ei non nunciarent, ob fraudem suam toto thesauro privari cœperunt. His fortasse initiis poena ad innoxios etiam paulatim extensa. Sed, his omisissis, ad modos acquirendi *originarios secundum quid* transeamus.

XVII. Quod ad modos acquirendi originarios secundum quid, ejusmodi quidem sola accessio conferi debet. Per accessionem vero rei jam nostræ incrementum acquirimus. Rei autem jam nostræ incrementum oritur vel ex naturæ beneficio tantum, vel arte, & industria nostra, vel adjumento naturæ simul, & artis. Hinc accessionis divisio in *naturalem, industrialem, & mixtam.* De singulis accurate videndum.

XVIII. Quod ad primum igitur, ad naturalem accessionem retulerunt jurisconsulti *fæturam, insu-*

28 *Præl. ad Instit. Justin. Lib. II. Tit. I.*

fulam in flumine natam, & ipsorum fluminum *alluvionem*. Quod ad foeturam, cum Stoicis docuerunt jurisconsulti, foetum in utero partem viscerum maternorum esse *l. 1. §. 1. ff. de ventr. inspici.* Ita jure naturalis accessionis ipsi domino matris addixere partum *l. 6. ff. de acquir. rer. domin.* Quod ad insulam in flumine natam, eam jurisconsulti eorum esse censuerunt, quorum essent & prædia flumini contermina. Enimvero si in flumine natæ insulæ ad alterutram ripam accederent, eas illis adjudicarunt, ad quorum prædia divergerent *§. 22. h. t.* Id ita placuit, quia ex principiis Romani juris alvei proprietas pertineret ad eos, qui fluminis ripas prædio suo contingerent *§. 4. h. t. & l. 5. ff. de rer. divis.* Verum in Regno Neapolitano, ut ferme in Europa alibi, jurisprudentia isthæc vix admitti potest. Apud nos sane in fluminibus enatæ insulæ videntur addicendæ fisco ob ea, quæ admonui *in jur. Regn. libr. 2. tit. 3.* Denique quod ad alluvionem, eo vocabulo jurisconsulti designant accessionem illam, quæ beneficio fluminis prædio nostro paulatim accedit. Quod ita autem prædiis nostris accrescit, naturali æquitate nostrum fieri placuit *§. 20. h. t.* Si enim id incrementum restituendum esset, neutiquam dignosci posset, quatenus ex aliorum prædiis, & quibus vicinis abrasum id fuerit. Secus id tamen in avulsione est. Per avulsionem scilicet fluminis impetu pars alieni agri nostro palam adjicitur. Pars igitur ita avulsa a veteri domino vindicari poterit, modo cum alieno prædio nondum coaluerit *l. 5. §. 3. ff. de rei vindic.* Pars avulsa cum alieno prædio

coaluisse dicitur, si eo translatae arbores in alienum radices egerint §. 21. *h. t.*

XIX. Porro non omnibus promiscue agris apud Romanos olim jus erat alluvionis. Pro agrorum enim diversitate alias ipsis possessoribus, alias ipsi Reipublicae cedebat alluvionis emolumentum. Agri scilicet aut proprii possessorum erant, aut capti ex hostibus colonis, & veteranis concedi solebant. Quod ad proprios possessorum agros, in eis nullo discrimine jus alluvionis erat. Verum quod ad agros ex hoste captos, pro eorum diversitate alluvionis commodum alias ipsi Reipublicae, alias ipsis possessoribus addicebatur. Nimirum captos ex hoste agros in tres species partitur Julius Frontinus in *libr. de qualitat. agror. & controvers. limit.* Scilicet alii quidem agri ipsis colonis, aut veteranis certa sub mensura viritim dividebantur, duobus exempli gratia jugeribus cuique datis. Alii ipsi Coloniae una mensura plerumque cum tributum onere concedebantur, qui mox per coloniam ipsam colonis assignarentur. Id factum exempli gratia videbatur, si, Capuam deducta Colonia, ei bina millia jugerum concessa forent. Utraque agrorum haec species jure alluvionis carebat. Cum enim ejusmodi agri certa sub mensura a Republica concederentur, si quid beneficio fluminum eis accresceret, augmentum ipsi Reipublicae addici oportebat. Utrosque agros jurisconsulti *limitatos* appellant. Hinc intelliges, cur agris limitatis jus alluvionis deneget Florentinus in *l. 16. ff. de acquir. rer. domin.* Alii agri denique nulla sub certa mensura veteranis concedi solebant. Eos ab arcendis hostibus a finibus *arcifinios* appellatos ibidem Frontinus ex Varrone tradit. Eosdem nullo
certo

certo modo definitos Frontinus docet, sed fossis, montibus, fluminibus, aquarumque divergiis circumscriptos. In eis jus alluvionis obtinere placuit. Conf. Connan. *comment. jur. civil. libr. 3. c. 5. n. 4. & sequ.* Nunc de accessione industriali pauca delibemus.

XX. Quod igitur ad accessionem industrialem, ad eam referri possunt *adjunctio, specificatio, commixtio*. Quod ad adjunctionem, ea fieri dicitur, ubi materiæ nostræ adjungitur res aliena. In eo acquirendi modo ratio ipsa suasit, ut accessorium principali cederet. Ab ea regula picturam tantum excepit Justinianus. Nam ob artis dignitatem tabulam jussit picturæ cedere §. 34. *h. t.* Quid autem accessorium, quid principale foret, non ex pretio, sed ex magnitudine æstimarunt jurisconsulti *l. 23. §. 3. ff. de rei vindic.* Quicquid igitur per inclusionem, afferruminationem, intexturam, scripturam meo adjungitur, mihi per adjunctionem cedit *l. 19. §. 13. ff. de aur. & argent. legat. & §. 26. h. t.* Cum vero rerum adjunctarum dominium alterius per accessionem fieret, actiones excogitari placuit, quibus indemnitati cujusque consuleretur. Ea autem in re longe interest, utrum bona, an mala fide facta fuerit adjunctio. Nam adversus eum, qui bona fide se dominum putans rei suæ alienam adjunxerit, actio ad exhibendum, aut condictio sine causa competit §. 26. *h. t. & l. 23. §. 5. ff. de rei vindic.* Adversus eum, qui mala fide adjunctionem fecerit, institui potest actio furti, & furtiva condictio *d. §. 26. h. t.* Quid si quis bona fide materia sua ædificet in alieno solum suum existimans? Ea in specie si qui ædificasset, in possessione foret, ei doli exceptionem ad-

adversus aræ dominum concessere veteres. Ea igitur exceptione opposita, ædificium possessor retinere perget, donec materiæ suæ pretium ei solvatur *l. 7. §. ex diverso. ff. de acquir. rer. domin.* Contra si qui bona fide in alieno ædificet, non possideat, is ex regulis Romani juris contra aræ dominum possidentem frustra agit. Apud Romanos enim recepta regula juris erat, sumptus in alieno factos solo retentionis jure servari posse *l. 14. ff. de dol. mal. except.* Enimvero ab ea juris asperitate passim hodie recedi solet. Ei enim, qui bona fide ædificavit in alieno, licet in possessione non sit, actio negotiorum gestorum utilis ad indemnitatem suam consequendam passim accommodatur. Vide Stryk. *in jur. modern. pandect. libr. 6. tit. 1. §. 17.*

XXII. Altera species accessionis industrialis specificatio est. Specificatio fieri dicitur, cum ex aliena materia novam speciem nostro nomine facimus *§. 25. h. t.* Ita id continget quidem, si confletur in calicem alienum aurum, aut ex aliena lana vestimenta fiant. Inter veteres autem jurisconsultos non conveniebat olim, cui tandem addicenda foret nova species ex aliena materia facta: alii specificantem ipsum, alii materiæ dominum prætulerunt. Sabiniani materiam forma præstantiorem existimantes materiæ domino relinquebant novæ speciei dominium. Contra Proculiani formam materia nobiliorem censentes novam speciem specificanti adjudicarunt *l. 7. §. 7. ff. de acquir. rer. domin.* Medium in ea controversia temperamentum exciscundis placuit. Si enim ita distinxerunt, ut, si species ad rudem materiam reverteri posset, in ea præferretur materiæ dominus; si id

si id fieri non posset, ipsi specificanti nova species addiceretur *d. l. 7. §. 7. ff. eod.* Ea exciscundorum sententia æquior Justiniano visa: eam igitur in ipsis rerum articulis obtinere iussit §. 25. *h. t.* Enimvero cuiquam bona fides, aut factum alienum nocere non debet. Proinde siquidem nova species ad rudem materiam reverti nequeat, specificator actione in factum conveniri poterit a materiæ domino, ut ejus æstimationem præstet. Sin species ad rudem materiam redigi possit, specificator in eam rem factas impensas exceptione doli consequitur *l. 23. §. 4. ff. de rei vindic.*

XXIII. Postrema accessionis industrialis species commixtio dicitur. Si res aridæ commisceantur, proprie *commixtio* dici solet: si de liquidis agatur, *confusio* dicitur. Eam tamen in vocabulis differentiam non perpetuo observavere veteres. Jam vero cum mutuo dominorum consensu rerum dominium inter plures communicari queat, rerum quarumcumque commixtione dominorum voluntate facta, eæ inter ipsos statim communes erunt §. 27. *h. t.* Idem obtinere scribit Tribonianus, si commixtio fortuita fuerit. Si tamen de commixtione fortuita accuratius disquiratur, discrimen admitti debet inter liquida, & arida. Liquida plerumque separari nequeunt. Liquidorum igitur commixtione facta, eorum dominium necessario commune fiet, nisi aut facile separari possint, aut nova species post confusionem emerferit *l. 5. §. 1. de rei vindic.* Ita necessitas ipsa suavit, ut in ea specie actio communi dividendo institueretur. Eo autem in judicio cujusque materiæ ratio haberi debet: plus igitur illi addicendum erit, cujus res plaris fuerit *l. 4. ff. de rei vindic.* Contra

tra in aridis post commixtionem adhuc discretum manet, quod cujusque fuerat. Ita quidem discretum post commixtionem manet frumentum meum cum alieno permixtum. Cum tamen & in aridorum commixtione separari vix queat, quod cujusque fuerit, effectus ejus actionis diversus haud erit, quam si res liquidæ confusæ forent. Proinde judex ita se geret, quasi res commixtæ communes essent. Ei igitur plus adjudicabit, cujus materia pretiosior fuerit *d. l. 4. ff. de rei vindicat.* Nunc, quod superest, de accessione mixta pauca subnectamus.

XXIV. Ad mixtam accessionem referri solet *plantatio, satio, fructuum perceptio*. Quod ad plantationem, aut sationem, plantarum, ac segetum dominium ex radicibus æstimarunt Romanæ leges. Id ita placuit, quia, ubi radices ex alieno solo alimenta traherent, segetes, ac plantæ aliæ jam viderentur *l. 26. §. 2. ff. de acquir. rer. domin.* & §. 31. *h. t.* Quod tamen de eo supra monuimus, qui bona fide ædificavit in alieno, id & ad eum extendi debet, qui bona fide in alieno confecerit, plantarumve. Nam is quoque, modo in possessione sit, opposita exceptione doli adversus supervenientem dominum, impensas in alieno factas obtinere poterit §. 32. *h. t.* Quod autem ad plantarum dominium, a Romana jurisprudentia tantisper recesserunt Neapolitanæ consuetudines. Eæ enim dominium arborum ex ramis etiam quodammodo æstimant. Nam ramorum in alienum superexcurrentium fructus inter dominum arboris, & vicinum statuunt communes esse *consuet. univ. de gland. leg.* In consuetudine vero Neapolitana Græci, & Romani sermonis exemplo glandis ap-

pellatio fructus arborum quaruncumque completur. Veteres enim arborem omnem quercum appellabant. Conf. *Schol. Aristoph. in equit. C. l. 236. ff. de verb. signif.*

XXV. Ad mixtam etiam accessionem pertinet perceptio fructuum, qui bona fide percipiuntur ex alieno. Qui enim possidet rem alienam bona fide, iustoque titulo, suos statim facit fructus inde perceptos *l. 48. ff. de acquir. rer. domin.* Negat tamen Ulricus Huberus, fructuum perceptionem inter accessionis species referri oportere; eam potius edicit esse singularem quemdam modum acquirendi domini, & ab accessione diversum *in prælect. h. t. n. 46.* Possessorem bonæ fidei fundi dominio carere scribit: per fructuum igitur perceptionem veluti per accessionem eorum dominum fieri non posse. Id tamen Huberi argumentum facile refelli potest. Ex regulis scilicet Romani juris, quod ad fructus attinet, possessor bonæ fidei est loco domini *d. l. 48. ff. de acquir. rer. domin.* Is igitur exemplo domini veluti per accessionem fructus suos perceptione facit. Neque vero cum Hubero regeras, aliter pronunciaſſe Justinianum ipsum §. 35. *h. t.* Ibi sane non ex jure accessionis, sed *pro cultura*, & *cura* bonæ fidei possessori fructus addici jubentur. Verum cultura, & cura in prædicto institutionum loco ipsum jus colendi, curandi, non vero factum ipsum culturæ, & curæ significat. Cultura autem, & cura spectata ab Justiniano fuit tamquam simplex acquirendi titulus, & causa veluti remota domini; ipsa vero perceptio tamquam modus, seu causa, quam vocant *proximam*, acquirendi domini. Conf. Noodt. *probab. jur. 2. 7.*

XXVI. Ne credas tamen, fructus generatim omnes

omnes sine discrimine possessori cedere. Nam pro fructuum, ac possessoris diversitate de fructibus ex alieno perceptis diversum jus esse placuit. Summa fructuum divisio est in *naturales*, & *civiles*. Fructus naturales Naturæ, & artis beneficio provenire solent. Fructus civiles ex instituto Civitatis percipiuntur: ejusmodi sunt pensiones annuæ, usuræ, & sexcenta id genus alia. Cuicunque fructus sint, ii in *extantes*, & *consumptos* dividi possunt. Fructus consumpti dicuntur, si vel a possessore alienati, vel ab eo in quotidianum familiæ usum conversi fuerint. Si ita consumpti non sint, dicuntur *extantes*. Ipsi autem *extantes* fructus vel *pendentes* sunt, vel *percepti*. Pendentes erunt, si adhuc solo hæreant; percepti dicuntur, si a solo separati jam fuerint. Fructibus ita distinctis, cum malæ fidei possessores omni in re jure careant, ii supervenienti domino fructus omnes restituere debent: non tantum *extantes* igitur, sed *consumptos* quoque §.35. *h.t.* Quin fructus etiam ob suam incuriam non perceptos restituere debent, modo potuerint honeste percipi. Neque enim negligentia possessoris impedire debet, quominus dominus consequatur, quod ipse ex re sua potuisset honeste percipere l.33. ff. de rei vindic. Quod ad bonæ fidei possessorem, in eo distingui placuit inter fructus *extantes*, & *consumptos*. Fructus quidem *extantes* omnes supervenienti domino bonæ fidei possessor restituere debet. Nam licet bonæ fidei possessor fructus suos percipiendo faciat, eorum tamen dominium revocabile tantum acquirit. Ea de causa Paulus bonæ fidei possessorem fructus ex alieno perceptos *interim* suos facere scribit. Eorum enim dominium retinet, donec

fructu dominus superveniat *l. 48. princ. ff. de acquir. rer. domin.* Contra fructuum consumptorum causa possessor bonæ fidei conveniri nequit, licet inde factus sit locupletior. Eam in rem argumentis haud opus. Nam bonæ fidei possessorem fructus omnes consumptos lucrari idem Paulus edicit *in l. 2. §. 4. fin. reg.* Secus tantum id est, si de fructibus agatur ex aliena hereditate perceptis *l. 1. C. de petit. hered.* Id ita de hereditate placuit, quia hereditas est universitas juris: quicquid igitur ex ea percipitur, ad ipsam hereditatem pertinet. Vide Hilligér. ad Donell. *libr. 19. c. 13. lit. C. & sequ.*

XXVII. Ex regulis autem Romani juris non solum post litem contestatam, sed & statim post controversiam motam alienæ rei possessores incipiunt malæ fidei possessores esse *l. 25. §. 7. ff. de heredit. petit.* Id ita cautum censet Bynkershoekius, quia, ubi olim controversia movebatur, actor instrumenta reo cogeatur edere *l. 1. princ. ff. de edend.* Per ipsam igitur instrumentorum conditionem in mala fide reus necessario constituebatur, si res petitoris esset. Inde autem idem Bynkershoekius infert, perperam hodie post litem contestatam, & ipsam etiam litem motam possessores adigi restituere fructus. Nam moribus hodiernis diu post litem contestatam edi solent instrumenta reo *observat. 8. 12.*

XXVIII. Hactenus de originariis acquirendi modis; porro de derivativis agendum: iis Gentium quoque jure dominium in aliis constitutum in alios transferri solet. Ex jure autem Gentium traditio est unicus derivativus acquirendi modus. Ita edicit Tribonianus §. 40. *instit. h. t.* Verum

accuratiores interpretes traditionis necessitatem in transferendo dominio potius ex jure civili repetendam existimant. Sane simplicitas juris Gentium videtur exigere, ut sola domini voluntate per externa signa ostendi solita dominium transferatur. Si verum id fuerit, traditio inter acquirendi modos jure Gentium introductos eo tantum intuitu referri potest, quia apud omnes plerasque Gentes in transferendo dominio ea fuerit adhibita. Conf. Grot. de jur. bell. & pac. 2. 6. 1. & Pufendorf. de jur. Natur. & Gent. 4. 9. 5.

XXIX. Jam vero traditio definiri queat, *modus acquirendi derivativus, quo res corporalis in alium justo titulo transfertur ab eo, cui jus, & animus alienandi fuerit.* Inde autem primo liquet, res tantum corporales veram traditionem recipere. Nam res quidem incorporeales vera traditione transferri nequeunt: in eis locum traditionis habet ex parte tradentis patientia, ex parte accipientis usus, & exercitium l. 1. §. ult. ff. de servit. prad. rustic. Indidem deinde intelligitur, dominium transferri traditione non posse, nisi & ex justa causa, veluti venditione, permutatione quis tradat, & tradenti jus sit alienandi. Si igitur traditio ab eo fiat, qui careat alienandi jure, dominium transferri non potest l. 109. ff. de verb. signif. Ex eadem definitione postremo constat, per traditionem dominium transferri non posse, nisi animo transferendi domini ea fiat. Proinde traditiones depositi, pignoris, aut commodati causa fieri solitæ dominium transferre nequeunt; in eis enim animus alienandi deest. Sed & in traditione venditionis causa facta illud singulare est, quod res emptori tradita ab eo non acquiratur, nisi aut

pretium solutum sit venditori, aut de pretio sit fidei habita, aut alio modo venditori sit satisfactum §. 41. *h. t. C. l. 19. ff. de contrah. empr.* Id ita fortasse placuit, quia mercis dominium venditor non præsumitur transferre velle, nisi ei pretium persolvatur.

XXX. Porro traditio non unius est generis. Passim ea dividitur in *propriam*, *fictam*, *symbolicam*. Propria traditio definiri queat *naturalis rei de manu in manum translatio, quatenus ipsius natura patitur*. Quapropter siquidem res facile moveri possit, translatione de manu in manum ea traditio peragetur; sin res facile moveri nequeat, ea fiet exhibitione præsentis *l. 1. §. 21. ff. de acquir. possess.* Quod si rei immobilis fieri traditionem oporteat, ea expeditur per inductionem in prædium, pedibus in quamlibet ejus partem illatis *l. 3. §. 1. ff. de acquir. rer. domin.* Ficta traditio dicitur, qua fictione juris res in alium transfertur, licet nulla de manu in manum translatio intercedat. Ea autem traditionis species potissimum locum habet, si in eum transferendum sit rei dominium, qui eam jam detinet. Ita quidem si res locata post locationem conductori vendatur, statim post emptionem ejus dominium in conductorem ficta traditione transfertur. Id vero si factum fuerit, res fictione juris in priorem dominum reversa fingitur, ac rursus venditionis causa emptori tradi §. 43. *h. t.* Ficta isthæc traditio *brevi manu* fieri ab Ulpiano dicitur in *l. 43. §. 1. ff. de jur. dot.* Eadem tamen & *longa manu* fieri potest. Longa autem manu in jure res tradi dicitur, si e longinquo tradatur *l. 79. ff. de solution.* Ita, fundo vendito, si cum emptori venditor e lon-

longinqua turri demonstrat, ac vacuam possessionem dicat se ei tradere, traditio facta videbitur perinde, ac si in fundum pedes intulisset emptor *l. 18. §. 2. ff. de acquir. possess.* Denique symbolica traditio appellatur, si per symbola, seu signa expediatur, quæ ex communi consuetudine traditionem designant. Ita vina tradita videntur, ubi claves cellæ vinariæ emptori sint traditæ *l. 1. §. 2. ff. de acquir. possess.* Tradita quoque videri trabes Paulus edicit, quas ex consensu venditoris signarit emptor *l. 14. ff. de peric. & comm. rei vendit.*

XXXI. Jam vero quoquo modo traditio facta fuerit, ea statim dominium in accipientem transfert. Inter interpretes tamen disceptatum video, num ad dominium transferendum traditio quæcumque sufficiat, an in ea vacua quoque rei possessio requiratur. Tota disceptatio eo redit, utrum, si exempli gratia fundum meum tibi vendidero ab alio bona fide possessum, cumque in possessoris absentia tibi tradidero, per eam traditionem tibi fundus acquisitus intelligatur. Nam ea quidem in specie vacua fundi possessio tibi non traditur, cum ea sit penes possessorem absentem. Interpretes quidem haud pauci per traditionem res non aliter nostras fieri posse pronunciant, quam earum vacua quoque possessione tradita. Eam vero sententiam præter alios operose tuetur Vinnius ad *§. 40. b. t.* licet aliud ei placuerit *parit. 1. 20.* Secus post Glossam Donello visum *comment. 4. 10.* ejus vero sententia probabilior videri debet. Nimirum non aliam ob causam traditio per leges præscripta fuit, quam ut in transferendo dominio certius esset voluntatis indicium. Re igitur in controver-

sa specie a domino tradita, de ejus voluntate jam liquet, nec bonæ fidei possessor abiens dominii translationem impedire potest. Neque regeras, civilem rei traditæ possessionem penes absentem esse. Hic enim non de possessione quidem, sed de dominio quæritur, quod & in jure consistit, & ab alterius possessione impediri non debet. Nam possessio facti est, & cum dominio commune nil habet, *l. 12. §. 1. ff. de acquir. possess.* In eam rem decretorius omnino videtur Triphonini locus in *l. 16. ff. de fund. dotal.* Sic enim ibi jurisconsultus. *Si fundum, quem Titius possidebat bona fide, longi temporis possessione poterat sibi quærere, mulier ut suum marito dedit in dotem, eumque petere neglexit vir, cum id facere posset, rem periculi sui fecit.* In ea lege non vacua quidem fundi possessio viro tradita a muliere dicitur: atqui per eam traditionem viro acquisitum dominium secundum jurisconsultum fuit. Scribit scilicet Triphoninus, eum fundum maritum potuisse petere: eo in loco, ut passim in jure alibi, petendi vocabulum rei vindicationem designat: rei autem vindicatio necessario requirit in actore dominium. Stet illud igitur, ad dominium transferendum traditionem quamcumque sufficere, nec vacuam rei possessionem requiri.



T I T U L U S II.

De rebus corporalibus, & incorporalibus.

Rerum divisio in corporales, & incorporales non summa quidem videri debet. Ea enim potius subdivisio quædam est rerum, quæ ad singulos in Civitate pertinent. Eam vero rerum subdiversionem hic præmisit Tribonianus, ut mox opportunius orationem transferret ad servitutes, & id genus alia, quæ res incorporales dicuntur. Perperam autem docuere post Giphanium quidam, hanc rerum divisionem in corporales, & incorporales ex Physicis desumpsisse jurisconsultos. Veri magis speciem habet, eam jurisconsultos a Stoicis mutuatos esse. Stoici enim diu ante jurisconsultos in corporales, & incorporales res omnes diviserant. Ea de re testimonium denunciare licet ipsi Senecæ Philosophiæ Stoicæ peritissimo. Ita enim is inquit *epist. 58. quæ sunt, corporalia, aut incorporalia sunt; nihil tertium.* In ea vero rerum divisione non verbis tantum, sed sententia quoque jurisconsulti convenere cum Stoicis. Corporalia scilicet dixere Stoici, quæ cerni, aut tangi possent; incorporalia vero, quæ mente tantum intelligerentur Cicer. *topic. 5.* Stoicorum igitur exemplo jurisconsulti quoque, quæ tangi, aut cerni possent, res corporales dixerunt; quæ mente tantum intelligerentur, res incorporales appellitarunt. Vide Caium *instit. 2. 1. 2.* Res autem incorporales *in jure consistere* docuere veteres, quia ex ab ipso jure naturam, & definitionem suam

suam viderentur accipere. Jus civile scilicet naturam rerum incorporalium pro arbitrio definit, ac format; eadem vero potestate in res corporales non utitur. Ita sane quid sit ususfructus, ipsum jus civile definit: verum quid sit domus, non ex jure civili, sed ex Naturæ regulis definiendum erit.

II. Ex dictis hætenus facile definire fuerit, quæ res apud jurisconsultos intelligantur corporales esse, quæ contra incorporales. Nimirum res corporales sunt, quæ tangi possunt. Ejusmodi igitur censerī debent prædium, homo, aurum, argentum seu rude, seu signatum quoque §. *vn. h. r.* Jurisconsulti quidem haud semel pecuniam inter res incorporales referunt; inde tamen nullam antinomiam expaveas. Pecunia scilicet spectari potest, vel tamquam quæ cerni quidem, & tangi potest; vel tamquam quantitas, quæ definitam æstimationem in Civitate habet. Priori respectu ea res est corporalis; posteriori res incorporalis videri debet. Eadem diversa ratio generatim spectari potest in rebus omnibus, quæ numero, pondere, mensura constant, ac *fungibiles* appellantur. Eæ enim licet res sint corporales, spectatæ tamen ut quantitas in jure rebus corporalibus opponi solent l. 30. ff. *de legat. I.*

III. Porro res corporales mobiles tantum sunt, aut immobiles: in rebus igitur mobilibus, & immobilibus res incorporales non continentur. Proinde si cui res omnes mobiles, & immobiles legatæ fuerint, actiones, & jura legatum non continebit: hæc enim rebus incorporalibus accenseri debent. Falsus est autem Hotomannus hic, ubi pronunciat, nullam hodie rationem hujus descri-

scriminis haberi oportere. Nam jus civile a rebus mobilibus, & immobilibus res incorporales aperte distinguit *l. 7. §. 4. ff. de pecul.* Recte igitur, & ex regulis Romani juris edixit Sandius, ne reditus quidem annuos sub legato mobilium, & immobilium contineri *4. 4. defin. 6.* Reditus enim annui jura sunt potius, atque inter res incorporales referri debent. Ne quid dissimulem tamen, si mobilia, & immobilia generatim contrahentes hypothecæ subjecerint, jura etiam & actiones hypothecæ subjecta intelliguntur. Ea enim in specie præsumi debet, mobilium, & immobilium vocabulo res generatim omnes a contrahentibus designatas esse. Conf. Huber. *in prælect. h.r. n. 3.*

IV. Facile etiam definire fuerit, quæ res incorporales videri debeant. Nam in eum quidem numerum referenda sunt generatim omnia, quæ mente tantum intelliguntur, & in jure consistunt. Ejusmodi igitur censei debent usufructus, usus, hereditas, &, ne singula memorem, obligationes omnes quoquo modo contractæ. Quod tamen hereditatem, & obligationes rebus incorporalibus accensuimus, id quidem intellige, si jus ipsum hereditatis, aut obligationis spectetur. Res enim hereditariæ, & ex obligationibus deberi solitæ plerumque sunt corporales. Id monuit ipse Tribonianus *§. vn. h.r.* Non desunt tamen, qui contendunt, intelligi non posse differentiam inter res hereditarias, & ipsam hereditatem. Quapropter id quidem discrimen inter argutas jurisconsultorum ineptias referendum existimant. Ab eorum sententia parum videtur abesse Vinnius. Is enim *ad d. §. vn. h.r.* hereditatem definit *ipsum defuncti patrimonium cum oneribus.* Nam si ea
de-

definitio admittatur, saltem si res tantum corporales in hereditate reperiantur, ea res potius corporalis censenda erit. Planius igitur exponamus, oportet, quo tandem respectu res hereditariæ ab hereditate differant. Ea autem differentia facile intelligetur, si hereditatem non in rebus ipsis hereditariis, sed in jure constituatur, quod in heredem a defuncto transit. Eo jure in heredem transmissio, is & ipsum veluti defunctum præsentem exhibet, ejusque patrimonium universum recte persequitur. Hinc scribentes de hereditate jurisconsulti eam nullo quoque cum corpore effectum juris habere docent *l. 50. ff. de heredit. petit.* Convenit igitur cum regulis Romani juris hereditatis definitio a Theophilo tradita *in paraphr. h. t. §. i. δικαιον τι νῦν καταλαμβάνομενον, ὁ ποιεῖ με τῆς ἑτέρας περιουσίας ἀθροον γενεσθαι δευτοτην.* *Jus aliquod, quod mente concipitur, quod facit, ut alieni patrimonii universalis sim dominus.*

T I T U L U S I I I.

De servitutibus rusticorum, & urbanorum prædiorum.

Rerum divisionem in corporales, & incorporales superius Tribonianus exposuit, ut rerum incorporalium tractationem susciperet. Eo apprime pertinent servitutes. Servitus autem in præsentī loco diversa ab ea est, quæ servis accommodari solet. Nimirum cum de servorum servitute quæritur, de vinculo agitur, quo homo homini

mini servit. Verum in præsentî argumento de servitute quæritur, qua non homo hominî, sed prædium aut non domino, aut alterius prædio servire cogitur. Prædium igitur servire dicitur, si quid juris non domino, aut alterius prædio præstare debeat. Ea autem obligatio in jure servitus appellatur. Proinde servitutes sunt appellatæ ratione prædii servientis: nam ratione prædii dominantis jura potius dici debent.

II. Notione servitutum ita constituta, eæ non unius sunt generis. Nam aliæ sunt rerum, personarum aliæ: illas *prædiales*, has *personales* dixere veteres. Priores illas doctores passim *reales* appellant. In prædialibus prædium alterius prædio, in personalibus prædium servit non domino. Et de prædialibus quidem servitutibus hic cum Imperatore videbimus; de personalibus infra sermonem instituemus. Prædiales autem servitutes in *Urbanas*, & *rusticas* distinxere veteres. Rustica, an Urbana esset servitus, ex prædio dominante definiebant. Rusticæ igitur servitutes erunt, si debeantur prædio rustico; Urbanæ, si debeantur Urbano. Cujusmodi tamen prædium esset, non ex loco quidem, sed ex ejus usu æstimarunt jurisconsulti. Hinc olitorii in Urbe horti prædium rusticum haberi debent *l. 198. ff. de verb. signif.* His præstitutis, prædialis servitus haud absurde definiri queat *jus in aliena re constitutum, quo ob alterius commodum prædii servientis dominus aliquid in suo aut pati, aut non facere cogitur l. 15. §. 1. ff. de servit.* Enimvero ut in toto jure civili definitiones periculosæ plerumque sunt; ita & definitio isthæc omnes servitutum prædialium proprietates haud exhibet. Prædialium igitur servitu-
tura

tum communes proprietates juvabit acervatim hinc sistere, ne in ipsis distinguendis usquam erretur.

III. Primum omnium servitus prædialis inde nomen accepit, quia sine duobus prædiis consistere nequit. Ea igitur duo prædia desiderat, quorum alterum dominans, alterum vero sit serviens *l. 1. ff. commun. prædior.* Duo autem prædia aut esse vicina debent, aut ita tandem abesse, ut opportunitas utendi servitute non adimatur *l. 31. ff. de servit. rustic. prædior.* Proinde servitutem ædibus frustra imponi censuere veteres, si alter alteri ædificando non posset officere *l. 38. ff. de servit. prædior. urban.* Ipsa scilicet prædialium servitutum natura videbatur exposcere, ut prædiorum utilitate eæ definirentur: si quid prædiis utilitatem haud afferret: id frustra videbatur actum *l. 15. princ. ff. de servit.* Hinc intelliges, cur edicat jurisconsultus, servitutem prædialem imponi non posse, ut poma decerpere, spatari, coenare in alieno liceat *l. 8. ff. eod.* Ejusmodi enim obligationes & prædiorum utilitatem non complectuntur: & eorum causam meliorem haud faciunt. Si quid autem tale promissum fuerit, non servitus prædialis quidem, sed aut simplex obligatio, aut ad summum servitus personalis constituta videbitur *Conf. Joann. Schilter. exercit. ad pandect. 18. 2.*

IV. Alterum, quod in servitute prædiali requiritur, est causa perpetua *l. 28. ff. de servit.* Causam in servitutibus veteres illud dixere, cujus habendi, vel arcendi causa ipsa servitus constituta foret. Ita sane in stillicidio, & aquæductu causa servitutis est aqua, illic ut a nostris ædibus avertatur, hic ut eam apud nos habeamus. Causa isthæc in prædiali servitute perpetua esse debet. In hoc

hoc argumento perpetuum jurisconsulti dicunt, quod oritur aut ex naturali causa, aut ex facto nostro pro lubitu *l. 28. ff. de servit. prædior. urban.* Proinde servitus quidem aquæductus recte constituetur, si aqua deducatur ex jugi fonte; eadem tamen frustra constituta videbitur, si promissus aquæductus fuerit ex stagno pluvialibus aquis collecto *d. l. 28. ff. eod.* Ex stagno igitur aquæductu promisso, nuda potius obligatio promissa censetur. Prædialis quoque servitus recte promittitur, ut ex taberna casearia in superiora ædificia fumus immitti possit. Ea enim in specie causa servitutis perpetua in voluntate est ejus, qui caseariam tabernam exercet. Is enim ad adjuvandum casei saporem in alterius ædificium pro lubitu poterit fumum immittere *l. 8. §. 5. ff. si servit. vindic.*

V. Rursus cum servitutes res incorporales sint, & in jure consistant, individuae existimari debent. Ea vero proprietas servitutum omnium communis est, neque in prædialibus tantum, sed in personalibus etiam admitti debet *l. 72. princ. ff. de verb. obligat.* Ususfructus tantum dividuitatem recipit. Id ita in usufructu placuit, quia in fruendo consistit, & frui pro parte possumus *l. 5. ff. de usufruct.* Cum igitur servitutes sint individuae, inde facile intelligetur, cur ex pro parte quidem acquiri nequeant *l. 6. §. 1. ff. commun. prædior.* Indidem facile ratio reddi queat, cur unus ex dominis in re communi servitutem prohibeatur imponere *l. 2. ff. de servit.* Ea igitur in specie servitus rata non erit, nisi domini omnes consensum ei præstiterint: quousque factum id fuerit, servitus in suspenso erit *l. 11. ff. de servit. prædior. rustic.*

VI. Denique servitutum prædialium communis quoque proprietas est, ut aut *in pariendo*, aut *in non faciendo* consistant *l. 15. ff. de servit.* Quapropter si quis ab altero stipuletur, ut in suo quid pingat, aliove quo modo sibi prospectum amoeniorem faciat, non servitus prædialis quidem, sed personalis tantum obligatio constituta censebitur. In servitute enim prædiali faciendi obligatio alteri imponi non potest. Perperam vero quidam ex ea juris regula oneris ferendi servitutem excipiunt ob *l. 33. ff. eod.* Scribit ibi quidem jurisconsultus, servitute oneris ferendi constituta, ipsum prædii servientis dominum reficere oportere columnam sustententem alienum onus; id ipsum tamen non ob singularem ejus servitutis naturam fieri oportebat, sed ob pactum potius ea de re interponi solitum. Nam in ea servitute constituenda veteres convenire solebant, ut ipse prædii servientis dominus columnam perpetuo reficeret. Hinc Ulpianus actionem adversus vicinum competere scribit, ut ædificium reficiatur *ad eum modum, qui servitute imposita comprehensus esset l. 6. §. 2. ff. si servit. vindic.* Adeo autem exploratum apud veteres erat, non posse servitutes in faciendo consistere, ut magni nominis jurisconsulti infirmum existimarent pactum, quo quis ultro promississet, se parietem, aut columnam refecturum esse. Vix tandem obtinuit ex sententia Servii, ut ejusmodi pactum in servitute oneris ferendi posset apponi *d. l. 6. §. 2. ff. eod.*

VII. Jam vero triplici ferme modo servitutes constitui possunt; primo scilicet voluntate ejus, ad quem pertinet servientis prædii dominium; deinde jussu judicis in communi dividundo, & fami-

milie eriscundæ judicio; ipsa denique lege, quæ servitutum præscriptionem admisit. Nam ex regulis Romani juris longa possessione, decem annorum scilicet inter præsentis, viginti inter absentes, servitudes præscribi jubentur *l. 10. princ. ff. si servit. vindic.* Veteri quidem Romanorum jure servitudes usucapi non poterant. Nimirum servitudes exemplo aliarum rerum incorporalium possessioni non suberant; sine possessione vero usucapio non procedebat. Cum tamen ipse præscribentis usus possessionis locum habere videretur *l. 1. §. 2. ff. de servit. prædior. rustic.* ad servitudes etiam usucapio paulatim fuit extensa. Ea tamen de causa inquilinorum, colonorumve seu dolus, seu incuria dominis damnosa erat. Proinde lege Scribonia lata sub Augusto fortasse cautum, ne servitudes jus esset usucapi; tantum concessum, ut ipsarum servitutum libertas usucapi posset *l. 4. §. 9. ff. de usurpat. & usucap.* Sed eam legem vicerunt fortasse mores; ei saltem obrogavit edicto Prætor. Utilem enim actionem ei dedit, qui longa quasi possessione, decennii scilicet inter præsentis, vicennii inter absentes, usus servitude foret *d. l. 10. princ. ff. si servit. vindic.* Licet autem, ut infra liquebit, usucapio, & præscriptio æquata ab Justiniano fuerit *l. unic. C. de usucap. transform.* si tamen hodie de servitutibus sit controversia, iis præscriptionis quidem, non usucapionis vocabulum accommodari debet. In usucapione scilicet, ut in tempore admonebimus, necessario requiritur bona fides; secus in servitutum præscriptione est. Nam in earum præscriptione aliud non desiderat Ulpianus, quam ut neque vi, neque clam, neque precario servitude usus quis fuerit per tempus in ju;

50 *Præl. ad Instit. Justin. Lib. II. Tit. III.*
re constitutum d. l. 10. ff. si servit. vindic. Sed
videamus, quibus etiam modis servitutes recte
constitutæ amitti queant.

VIII. Modi, quibus servitutes amittuntur, re-
vocari possunt ad *confusionem*, *remissionem*, *rei*
interitum, *finitum jus concedentis*, *negligentiam*
ejus denique, in cujus favorem eæ sint constitutæ.
Quod ad confusionem, ea facta censetur, ubi præ-
dii servientis simul, & dominantis dominium ac-
quisitum ab eodem fuerit. Cum igitur servitus
sit jus in aliena re constitutum, ubi idem utri-
usque prædii dominus esse cœperit, per ejusmodi
confusionem servitus statim intercidit. Absurdum
est enim in jure civili, ut res sua cuiquam ser-
viat l. 1. ff. quemadmod. servit. amitt. Quod ad
remissionem, ea fieri dicitur, si dominus prædii
dominantis jus suum in alienum prædium ultro
remittat. Cum igitur rerum suarum quisque sit
arbitrarius, si dominus prædii dominantis jus prædio
suo debitum vicino remiserit, servitus statim pe-
rimitur l. 14. §. 1. ff. de servit. Quod ad rei in-
teritum, is quidem continget, si aut dominans,
aut serviens prædium fortasse pereat. Cum igitur
servitutes accessiones sint prædiorum, eæque bina
prædia omnino flagitent, per interitum alterutrius
prædii servitus necessario extinguatur l. 14. princ.
ff. quemadmod. servit. amitt. Quod ad finitum
jus concedentis, id quidem fit, si qui servitutem
concessit, jus tantum temporarium habuerit in
prædium serviens. Nemo scilicet plus juris, quam
ipse habeat, in alterum transferre potest. Proin-
de ubi in prædium serviens jus constituentis fini-
tum fuerit, ipsa quoque servitus statim intercidit
l. 11. §. 1. ff. eod. Per negligentiam denique ser-
vitus

vitutis amitti dicitur, si quis intra tempus in jure constitutum ea usus non fuerit. Ita igitur servitus amittetur, si quis ea usus non sit decennio inter præsentēs, vicennio inter absentes *l. ult. C. de servit.* Enimvero si servitus ita sit constituta, ut alternis tantum annis, aut mensibus exerceri possit, ea duplicato tandem inusus tempore amittetur *l. 7. ff. quemadmod. servit. amittat.*

IX. At vero rusticæ servitutes omnes non utendo per tempus in jure definitum amittuntur sine discrimine. Contra ut amitti non utendo possint servitutes quædam Urbanæ, ad non usum libertatis etiam præscriptio debet accedere. Libertas in servitutibus præscripta intelligitur, si quid factum fuerit servituti contrarium. Ita sane in servitute tigni immittendi libertas ab immittendo tigno præscripta videbitur, si prædii servientis dominus tigni foramen obturarit, idque intra tempus in jure constitutum occlusum habuerit *l. 6. ff. de servit. urban. prædior.* Totius discriminis in ea re ratio inde fortasse manat, quod servitutes rusticæ in ipso exercitio calcis exempli gratia coquendæ, arenæ fodiendæ consistunt. Quapropter, eo exercitio intermisso, prædii dominantis dominus manifesto negligens excidit jure quæsito: nil quicquam autem eum juvare potest, qui, cum posset, servitute usus haud fuerit. Contra servitutes quædam Urbanæ in nuda servientis prædii patientia consistunt. Ea vero patientia perpetuo adesse præsumitur, donec prædii servientis dominus contra servitutis formam aliquid non innovarit. Vide Struvium *exercit. 13. 58.* & Everard. Otton. *de usucap. servit. §. 8.*

X. Porro in servitutibus exponendis Tribonianus

a rusticis exorditur *princ. h. r.* Inter rusticarum autem servitutum species ibidem Tribonianus refert iter, actum, viam, aquæductum. Rusticæ servitutes tamen plures in pandectis extant. Eo enim referri debet pecoris ad aquam appulsus, jus in alieno pascendi, calcis coquendæ, arenæ in alieno prædio fodiendæ. Prætereo eo in genere alias, seu quæ passim in pandectis occurrunt, seu quæ pro diversa rerum rusticarum natura facile excogitari possint. Ceteris igitur omissis, pauca tantum hic admonbo de itinere, actu, via. Est autem iter *jus eundi, ambulandi hominis. Actus est jus agendi jumentum, vel vehiculum. Via est jus eundi, agendi, ambulandi princ. h. r.* Prædictæ servitutes diversa sua latitudine potissimum apud veteres differabant. Nimirum viæ latitudo, nisi aliud contrahentibus placuisset, in porrectum octo pedes patere debebat, in amfractu sedecim *l. 8. ff. de servit. rustic. præd.* Anfractum in via dixere veteres locum, in quo flectendum esset. Latitudo actus in jure non definitur: proinde aut a contrahentibus demonstranda erat, aut ab arbitro statuenda *l. 13. §. 2. ff. eod.* Auctor tamen est Varro, actus latitudinem minimam quatuor patuisse pedes *de lingu. Latin. 4.* In ea re autem veteres quoque Grammatici cum Varrone conveniunt. De itineris latitudine non liquet: ea tamen duos fortasse pedes patebat. Ut enim actus viæ dimidium erat, ita fortasse iter dimidium actus complectebatur.

XI. His ita præstitutis, mendosus videri debet prædictus Triboniani locus *princ. h. r.* Ibi scilicet contra veterum auctoritatem actus describitur via latior. Nam actu constituto, agi, & vehi posse dicitur; viæ vero tantum inesse jus eundi, agendi,

di, ambulandi. Eam difficultatem apprime vidit Connanus. Ad eam autem resolvendam in viæ definitione in prædicto institutionum loco pro eundem *vehundi* legit *comment. jur. civil. 4. 11. 1.* Verum si *vehundi* cum Connano legas, ne ita quidem difficultas resoluta videbitur. Ita enim idem juris in actu, & in via erit. Nam si via jus agendi, *vehundi* complectitur, id ipsum continetur in actu. Nam qui actum habet, is & agere, & vehiculum agere potest *d. princ. h. t.* Hæc, puto, Connanum perpulerunt, ut nodum secaret potius, quam solveret. Nam non solum contra Triboniani mentem, sed & contra veterum auctoritatem edicit, inter actum, & viam nullum discrimen esse. Felicius igitur eum nodum expedivit clarissimus Bynkershoekius *observat. 4. 7.* Is scilicet non diffitetur, cum actum, cum viam habentem vehiculo uti potuisse; ex vehiculorum tamen diversitate actus, & viæ differentiam explicandam monet. Nimirum duplex apud veteres genus vehiculorum adhibebatur, minus unum manibus protrudi solitum, & minorem latitudinem exigens; majus alterum, quod bobus, aut junctis equis vehi oportebat. Ita sane constabunt omnia. Nam actum habens poterit armentum agere, poterit & vehiculo manuali uti. Contra viam habens equos, aut boves poterit curru jungere, & quocumque vehiculi genere rem suam agere.

XII. Urbanorum etiam prædiorum servitutes complures memorat Tribonianus §. 1. *h. t.* Plures quoque in pandectis passim occurrunt. Præter eas tamen plures adhuc excogitari, possent pro habitatione aut amoeniori, aut commodiori reddenda. Ipsarum quædam aut in nostro, aut in alieno quo-

que jus liberius ædificandi præstant. Eo sane spectant servitutes *oneris ferendi, tigni immittendi, projiciendi, protegendi, altius tollendi*. Oneris ferendi servitute constituta, dominus prædii servientis onus nostrarum ædium ferre cogitur suo seu muro, seu columna. Ab ea non longe distat servitus tigni immittendi. Nam, si ea constituta fuerit, vicinus pati debet, ut tignum, aut alia domus nostræ pars requiescat in suo. Longius ab utraque abit projiciendi, & protegendi servitus. Nam per servitutem quidem projiciendi tignum nostrum in alienum aerem promittere possumus, licet id nusquam requiescat in alieno. Ita projiciendi servitus promissa videbitur, si placuerit; ut domus meæ suggrunda supra alienum aerem ædificari possit. Contra protegendi servitute quæsitæ, protectum ædium nostrarum in alienum solum licebit extendere. Ea servitus constitui plerumque solet parietis nostri adversus imbres protegendi causa. Altius tollendi denique servitute constituta, altius, quam leges sinunt, nostras ædes extollere possumus. Ea igitur servitus constitui poterit, si lex aliqua in Civitate in vicinorum gratiam ultra certam altitudinem ædificia extolli vetet. Ejusmodi vero legem saltem post incensam Urbem tulisse Neronem constat ex Tacito *annal.* 15. 43. Rursus servitutes quædam eo pertinent, ut a nostris ædibus arceatur aquæ pluvialis incommodum. Id sane respiciunt servitutes *stillicidii, vel fluminis recipiendi, vel non recipiendi*. Stillicidium in jure dicitur, si ex tecto aqua guttatim casitet. Flumen dici solet, si in canalibus collecta aqua ruat uno agmine ritu fluminis. Stillicidii igitur, vel fluminis recipiendi servitute quæsitæ, nostrarum ædium

ædium flumen, vel stillicidium vicinus in suum recipere cogitur. Non recipiendi servitute constituta, suum flumen, aut stillicidium in ædes nostras vicinus prohibetur immittere. Ea servitus ut intelligatur, oportet, ut ex regulis Romani juris regiones Urbis quasdam incolentes flumen, ac stillicidium vicinarum ædium in suum recipere cogentur. Vide doctores ad §. 1. *h. t.* Quædam denique servitutes ad lumen ædium pertinent, earumve prospectum amœniorem faciunt. Eo referri debet servitus *luminum*, & *ne luminibus officia-*
tur, *prospectus*, & *ne prospectui officia-*
tur; ea denique, quæ *altius non tollendi* dicitur. De iis late doctores ad d. §. 1. *h. t.* In re vix ullius pretii eorum scrinia expilare non lubet.

T I T U L U S IV.

De usufructu,

EXpositis servitutibus prædialibus, de personali-
bus porro videbimus. Eæ personales dicuntur, quia certæ personæ cohærent, & in alios transferri non possunt. Proinde *jura hominum* eas appellat jurisconsultus in l. 15. ff. de servit. Licet autem natura sua prædialis sit servitus, ea personalis evadet, si certæ tantum personæ præstari eam oporteat l. 4. ff. de servit. prædior. rustic. Hinc si in via constituenda placuerit, ut ea tantum utatur præsens possessor, per ejusmodi pactum personalis tantum servitus constituta videbitur. Via igitur successor uti non poterit §. l. 4. ff. de

servit. prædior. rustic. Servitutes autem personales exemplo contractuum in *nominatas*, & *innominatas* haud absurde diviseris. Nam quæ nomen, & causam habent, nominatæ vocari queant: quæ causam tantum habent, innominatæ sunt appellandæ. Servitutes quidem innominatæ in jure complures occurrunt; plures adhuc excogitari possent. Eas tamen in institutionibus omittit Tribonianus, quia & solo contrahentium reguntur arbitrio, & a pactis in ipsarum constitutione conventis unice legem accipiunt. Servitutes tantum nominatas exponit, quia eæ non a contrahentium voluntate, sed ab ipso jure definitionem, ac regulas suas agnoscunt. Servitutum nominatarum species celebriores sunt *ususfructus*, *usus*, *habitatio*. Hoc igitur titulo de usufructu, insequenti de usu, & habitatione videbimus.

II. Primum omnium usufructus definitur a Paulo *jus alienis rebus utendi fruendi, salva earum substantia l. 1. ff. de usufruct.* Usufructus igitur nec nudus usus, nec fructus videri debet, sed jus potius utroque temperatum. In usu scilicet tacite continetur, ut utentis necessitate circumscribatur, & res usuaria utendo non pereat. Id secus in fructu est. Fructus enim & rei abusum importat, neque in fruendo fines habet, aut modum. Usufructum igitur dicere jurisconsulti, quia admixtus in eo usus eam servitutem coercere debet intra fines salvæ substantiæ. Proinde usufructus latior quidem est usu, dominio tamen angustior. Qui enim dominium habet, rem ipsam potest absumere; usufructuario tantumdem haud licet. Inde fit, ut potiori jure usumfructum exerceat in rem suam dominus, quam usufructuarius in alienam. Illud tantum

tum inter utrumque interest, quod usufructus in rem propriam ex jure proprietatis promanat; usufructus in rem alienam oritur ex servitute. His ita constitutis, nil quicquam absurdi complectitur usufructus vulgata distinctio in *formalem*, & *causalem*. Causalem enim dominus in res suas exercet; formalem exercet fructuarius in res alienas. Causalem usumfructum Paulus respexit¹, ubi partem dominii eum dixit in *l. 4. ff. de usufruct.*

III. Usufructus igitur rebus alienis utendi fruendi facultatem in fructuarium transfert *l. 1. ff. de usufruct. & princ. instit. h. t.* Quapropter ad fructuarium pertinebit rei fructuariæ emolumentum omne, seu id per naturam, seu ex instituto Civitatis inde proveniat *l. 7. ff. eod.* Hinc æquitas ipsa suavit, ut tributorum, & publicarum collationum onera ab ipso fructuario solverentur; pro modicis etiam refectionibus idem usufructuarius sumptus sustineret *l. 7. §. 2. ff. h. t.* Neque vero quicquam intererit, seu per nosmet, seu per alios utamur, fruamur. Juris quidem subtilitate inspecta, in colonum usufructus a fructuario transferri non poterat. Verum in ea re Prætor, neglecto rigore juris, colonum tuebatur exceptione, si ei a fructuario usufructus locatus esset. Eandem exceptionem emptori usufructus indulgeri placuit *l. 11. §. 2. ff. de pignor. & hypoth.* Id inde factum, quia licet usufructus servitus personalis esset, eaque de causa cum ipsius fructuarii persona cohereret, ipsa tamen perceptio fructuum, tamquam res facti, ab ejus persona videbatur avelli posse. Quod ad fructus igitur ex re fructuaria percipi solitos, inter fructuarium, & dominum ipsum vix ullum discrimen est. Quia, si agatur de usufructu

legato, aliquando plus juris in usufructus, quam in dominii legato est. Ecce enim si cui legatus est fundus, ejus instrumentum legato non cedit. Contra si cui legatus sit fundi usufructus, instrumenti etiam usufructus ad legatarium pertinebit *l. 15. §. 6. ff. h. t.* Id ita fortasse receptum, quia duriusculum videbatur, usufructuarium ad comparandum instrumentum adigere, quod, finito mox usufructu, ei, aut heredi inutile futurum esset.

IV. At vero licet in fructibus acquirendis parum a dominio usufructus absit, id ipsum tamen ultra-fructus seu naturales, seu civiles extendi non debet. Ad fructuarium igitur non pertinebunt, quæ inter fructus non computantur. Quapropter in fructuario fundo reperto thesauro, is non fructuario quidem, sed proprietario addici debet. Thesaurus enim in ordinario fundi proventu non computatur *l. 7. §. 2. ff. solut. matrim.* Partus etiam ancillarum non ad fructuarium, sed ad propriarium pertinebit. Id ex Bruti sententia Ulpianus placuisse scribit, quia in fructu hominis homo esse non posset *l. 68. princip. de usufruct.* Ejus tamen juris ratio ab Ulpiano allata frigidior quibusdam videtur. Nimirum Ulpiani ratio eo spectat, quod præstantia hominis pati non debuit, ut homo in hominis fructu foret. Atqui præstantia hominis non obstat, quominus in servo usufructus constitutur. Pro Ulpiani ratione tuenda plura protulerunt interpretes. Probabilius videri queat, eam Ulpiani sententiam ex recta fructus intelligentia explicari oportere. Fructus, ut supra monuimus, ipsam absumentis facultatem importat. Eam vocabuli proprietatem Ulpianus fortasse spectans edixit, ancillæ partum ad fructuarium non

per.

pertinere, quia, ut ceteri fructus, is absumi non posset. Nam Ulpiani ævo promiscua servorum cædes per leges interdicta jam fuerat. Vide Bynkershoek. *observat.* 5. 7.

V. Jam vero usufructus constitui potest non in prædiis tantum, sed in armentis etiam, gregibus, ac ceteris ferme omnibus, unde fructus aut naturales, aut civiles redire solent §. 2. *h. t.* Usufructum recipere non posse placuit ea tantum, quæ in quantitate consistunt, & usu consumuntur. Ejusmodi sunt pecunia, frumentum, & res generatim omnes, quæ *fungibiles* appellantur d. §. 2. *h. t.* & l. 11. ff. de usufruct. ear. rer. quæ us. consum. Nimirum ita in usufructu jus est, ut rei quidem fructuariæ fructus fructuario cedant, finito tamen usufructu, rem ipsam in specie restitui oporteat. Absurdum igitur fuisset, ad ea usufructum extendere, quæ usui esse non possent, nisi consumerentur. Neque enim nummi, & ceteræ quantitates usui esse possunt, nisi & consumantur. Usufructu tamen per leges ita coercito, ultimum testatorum arbitrium frequenter impediabatur. Proinde sub Tiberio fortasse à Senatu cautum, ut rerum etiam fungibilium non verus quidem, sed quasi usufructus legari posset. Earum igitur rerum usufructu legato, Senatui placuit, ut ipsarum proprietas in legatarium transferretur; idem tamen per fidejussores caveret, se mortuo, aut capite deminuto, res ejusdem qualitatis, aut earum æstimationem heredi restitutum iri l. 1. §. 7. ff. de usufruct. ear. rer. quæ us. consum. Inter verum autem, & quasi usufructum plurimum interest. Ut enim omittam alia, in vero usufructu dominium non transfertur in fructuarium. Verum in quasi

quasi usufructu rei fructuariæ dominium fructuario tradi debet. Quantitates enim usum præstare nequeunt, nisi consumantur; vix vero quicquam sine dominio consumi potest. Vide Noodt *de usufruct.* 1. 20.

VI. Quo autem modo fructuarius in vero usufructu versari debeat, pluribus enarrat Julianus in *l. 13. §. 4. ff. de usufruct.* Eorum summa eo redit, ne deterior proprietatis causa fiat, neque in alium usum licet utiliore res fructuaria convertatur. Eam ob rem Prætor a fructuario per fidejussores promitti jussit, *se usum, fructurum boni viri arbitrato*, & cum *ususfructus ad se pertinere desierit, quod inde extabit, se restitutum ei, ad quem pertinebit.* Si eam ob rem satisfacere nollet fructuarius, ei usufructus causa actiones a Prætoribus denegabantur *l. 1. ff. usufr. quemad. cav.* Ea vero cautio non tantum ante rei fructuariæ traditionem, sed post eam quoque a proprietario peti potest. Quapropter si, re fructuaria tradita, fructuarius eam cautionem præstare nolit, rem fructuariam proprietarius vindicare poterit *l. 7. ff. usufructuar. quemadm. cav.* Ne autem fructuarius occasionem arripiat in re fructuaria grassandi pro lubitu, cautio isthæc ne jussu testatoris quidem remitti potest *l. 7. C. ut in possession. legator.* Patris tantum reverentiæ datum, ut, si ei in bona filiorum usufructus competat, eam cautionem præstare non teneatur *l. 7. §. 4. C. de bon. quæ liber.* Nunc videamus, quibus modis usufructus acquiri, aut amitti possit.

VII. Quod ad modos, quibus usufructus acquiritur, ii quidem facile definiri possunt. Usufructus scilicet personalis est servitus. Aliarum igitur

tur servitutum exemplo non solum contractibus, aut ultimo voluntatis arbitrio, sed præscriptione quoque potest acquiri §. 1. *h. t.* & *l. penult. C. de usufruct.* Quin jure novo ipsius etiam legis jussu usufructus acquiri solet. Ita quidem in bonis filiofamilias adventitiis usufructus ad patrem pertinet jussu legis *l. 6. C. de bon. quæ liber.*

VIII. Quod ad usufructus finiendi modos, ii aut ex persona fructuarii, aut ab ipsa re fructuaria derivari possunt. Quod ad priores igitur, cum usufructus ipsius fructuarii personæ cohæreat, primo per fructuarii mortem extinguitur §. 3. *h. t.* Cum vero per maximam, ac mediam capitis deminutionem civiliter moriantur homines, per maximam etiam, mediamve capitis deminutionem usufructus perimitur *d. §. 3. h. t.* Olim quidem per minimam quoque capitis deminutionem usufructus intercidebat. Per minimam enim capitis deminutionem immutari persona credebatur. Eam igitur capitis minutionem passus, veluti nova persona factus, usumfructum retinere non poterat. Verum ab ea juris subtilitate recedi jussit Justinianus: nam minimam capitis minutionem fructuario obflare vetuit, ne usumfructum retinere pergeret *l. penult. C. eod.* Ceterum si usumfructum ad heredem quoque pertinere placuerit, is non extinguitur per fructuarii mortem. Ea enim in specie duplex usufructus constitutus videbitur. Primo igitur fructuario mortuo, ad heredem etiam pertinebit. Verum, herede simpliciter memorato, tantum primus heres ad usumfructum vocatus intelligetur *l. 14. C. eod.* Illud singulare est in usufructu relicto filiofamilias, quod post mortem filii transmittatur ad patrem: ejusmodi
enim

enim usufructus & vivo filio ad patrem pertinet
l. ult. C. h. t. Quod si Civitatibus, quæ in per-
petuum vivere solent, relictus sit usufructus, ne
inutilis sit nuda proprietas, eæ centum annorum
spatio usumfructum percipient *l. 56. ff. eod.* Id
autem ita placuit, quia centum annorum vitam
longissimam credidere veteres.

IX. At vero licet maxima anni parte stete-
rit usufructus, ac segete jam matura decesserit
fructuarius, ejus heres in fructus nondum perce-
ptos nil juris habet *l. 13. ff. quib. mod. usufruct.
amitt.* Id ad servandam æqualitatem necessario ad-
mittendum fuit. Nam & maturi fructus adhuc
solo hærentes a testatore relictī fructuario addici
debent, si eos, die legati cedente, pendentes in-
venerit *l. 27. princip. ff. de usufruct.* Dubium ta-
men videri queat, an, locata saltem re fructua-
ria, pro rata temporis dividi mercedem oporteat
inter usufructuarii heredem, & proprietarium,
si qua tantum anni parte steterit usufructus. Ea
in re diversum jus esse placuit, prout de fundis,
aut de rebus agitur, quarum usufructus in usu
ipsarum quotidiano consistit. Si de rebus sit con-
troversia, quarum fructus in quotidiano ipsarum
usu consistit, pro rata temporis, quo usufructus
steterit, heredibus fructuarii mercedes addici de-
bent; quod superest, proprietario adjudicandum
erit *l. 26. ff. eod.* Eam distinctionem æquitas ipsa
suasit. Æquissimum enim videbatur, ut fructuarii
heres consequeretur, quod ipse fructuarius conse-
quutus esset, si ex re fructuaria fructus per se per-
cepisset. Contra si de prædiis agatur, unde fru-
ctus naturales percipiuntur, fructuario decedente
nondum perceptis a colono fructibus, nulla merce-
dis

dis pars ab herede fructuarii peti potest *argum. d. l. 13. ff. quib. mod. usufruct. amittit.* Enimvero si ante fructuarii obitum a colono fructus percepti fuerint, heredi fructuarii merces totius anni debetur, licet mortuus sit fructuarius, antequam secundum legem locationis ea pendenda foret *l. 58. princip. ff. de usufruct.* Ceterum usufructus legati dies ab adita tandem hereditate cedit *l. unic. §. 2. ff. quand. dies usufruct. ced.* Secus jus cavet de proprietate legata. Ejus enim legati dies cedit a tempore mortis *l. unic. §. 6. C. de caduc. tollend.* Cum igitur usufructus dies ab adita tandem hereditate cedat, inde quidem intelliges, cur, si post plures a morte testatoris annos adeatur hereditas, fructus intermedii temporis fructuarius frustra postulet *d. l. unic. ff. quand. dies usufruct. legat. ced.* Enimvero si per heredem steterit, quominus adeatur hereditas, intermedii quoque temporis fructus a fructuario recte petentur *l. 37. ff. de usufruct.*

X. Rursus extinguebatur etiam usufructus olim per ejus cessionem ab usufructuario in jure factam Paul. 3. *sentent. 6. 28.* Jure autem Antejustiniano ut usufructus a fructuario transferri posset, sollemnis ejus in jure cessio per fructuarium facienda erat. Neque tamen cessio isthæc in transferendo usufructu cuicumque proderat. Per eam enim tantum proprietario usufructus utiliter cedi poterat; extraneo frustra cedebatur Paul. *sentent. loc. cit.* Si cessus fuisset extraneo, & extraneo cessio non proderat, & usumfructum amittebat cedens. Nimirum ex regulis Romani juris usufructus servitus personalis erat, & ipsi fructuario cohærebat. Ita in aperta voluntate cedendi,
cum

cum in extraneum transire non posset, in ipsum proprietarium transferebatur. Atque ita quidem ad Justinianum usque jus fuit. Is primum seu per traditionem, seu per cessionem usufructus cessus esset extraneo, usumfructum ad proprietarium redire vetuit: eum post traditionem, aut cessionem ab ipso fructuario retineri jussit. Id autem ita fuit ab Justiniano cautum, ne aut contra voluntatem cedentis in proprietarium usufructus rediret, aut contra juris regulas in extraneum transferretur. His præstitutis, facile intelligetur a paucis intellectus Triboniani locus §. 3. *inst. h. t.* Sic enim ibi. *Item finitur usufructus, si domino proprietatis cedatur; nam cedendo extraneo nihil agitur.* Conf. Noodt. *de usufruct. libr. 2. c. 9.* Nunc, quod superest, videamus, quibus modis ipsius rei fructuariæ respectu usufructus interire soleat.

XI. Ipsius rei fructuariæ intuitu tribus ferme modis usufructus extinguitur, ejus consolidatione scilicet, interitu, mutatione. Quod ad consolidationem, ea fieri dicitur, si rei fructuariæ ipsa quoque proprietas ab usufructuario sit acquisita l. 3. §. 2. *ff. de usufruct. accrescend.* Nimirum nulli in rem propriam servitus competere potest. Proinde si rei consolidatio in fructuario facta fuerit, usufructus statim intercidit §. 3. *h. t.* & l. 5. *ff. si usufruct. petat.* Quod ad rei fructuariæ interitum, is quoque usumfructum necessario perimit. Cum enim usufructus rei fructuariæ inhæreat, & locum accessionis habeat, re fructuaria pereunte, usufructus etiam interire debet d. §. 3. *h. t.* Denique quod ad rei fructuariæ mutationem, ea quoque ubi contigerit, plerumque usufructus extinguitur d. §. 3. *h. t.* Nimirum usufructu cuiquam
lega. ●

legato, certæ rei commodum ei videtur legasse testator. Proinde si res ita mutetur, ut vetus inde commodum redire nequeat, usufructus porro stare non poterit *l. 5. §. 2. ff. quib. mod. usufruct. amitt.* At vero non quævis rei mutatio usumfructum extinguit: ea ejusmodi esse debet, ut post mutationem res fructuaria vetus nomen habere definat. Conf. Vinn. ad *d. §. 3. h. t. n. 5.* Inde autem facile intelliges, cur, ædium usufructu legato, eis exustis, ipsius aræ usufructus non debeatur *d. l. 5. §. 2. ff. eod.* Indidem quoque liquet, cur, gregis usufructu legato, usufructus statim intercidat, si numerus ovium adeo sit imminutus, ut gregem constituere nequeat *l. 31. ff. eod.* Id ipsum tamen secus obtinuit in proprietate legata. Nam si legata domus combusta fuerit, ejus area a legatario vindicari poterit: grege quoque legato, si numerus ovium ita decreverit, ut grex esse definat, quotcumque oves supersint, a legatario recte vindicantur *l. 22. ff. de legat. 1.* Totius differentiæ ratio inde pendet, quod, ut supra monuimus, usufructus certæ rei relinquitur: re autem mutata fructus inde percipi nequit, quem solum testator legasse præsumitur. Contra proprietatem & tota relinquitur, & ejus partes singulæ. In ea igitur nil quicquam est, quod legato contineri non debeat.

XII. Nondum hinc abire me sinunt interpretes. Passim enim ab eis doceri video, usumfructum extinguí quoque *non utendo per modum.* Ea in re auctoritatem Triboniani produciunt in *§. 3. h. t.* Ibi enim cum finiendi usufructus modum recenseri ajunt. Multorum autem sententia fuit, ita usumfructum perimi, si eo non utatur fructuarius ad

modum, qui in ejus constitutione fuerit adjectus. Verum ceteris quidem servitutibus modus aliquis imponi potest: id palam edicit Papinianus *in l. 4. §. 1. ff. de servitut.* Non video tamen, quis tandem modus adjici in usufructu constituendo possit: unus adjici modus in usufructu potest, de utendo fruendo scilicet arbitrio boni viri: hunc modum tamen usufructus natura omnino flagitat, neque necesse est, ut de eo expresse conveniant contrahentes. Aliud igitur in prædicto loco Tribonianus latet. Id vero facile intelligitur, si advertatur, non simpliciter dixisse Tribonianum, usufructum finiri *non utendo per modum*, sed *non utendo per modum, & tempus*. Per modum autem, & tempus non utitur, qui per modum temporis in jure definiti usufructu abstinet. Modus enim, & tempus modum temporis apud Tribonianum designat. Nam figura ibi Tribonianus utitur, qua rem unam per duo vocabula frequentissime veteres designare solent. Vide Noodt. *de usufruct. libr. 2. c. 9.* Id probabilius videri debet, quod ibidem addit Tribonianus, de eo usufructus finiendi modo constitutione sua cavisse Justinianum. Ea autem constitutio extat *in l. 16. C. de usufruct.* Atqui ibi definit Justinianus, usufructum amitti non utendo per modum temporis a se præfiniti. Extinguitur igitur usufructus non simpliciter non utendo per modum, sed non utendo per modum temporis prædicta Justiniani lege præscripti. Modus autem temporis, intra quod inusu usufructum amitti jussit Justinianus, decennium est inter præsentis, vicennium inter absentes *d. l. 16. C. de usufruct.*

XIII. At vero ne inutilis domino sit nuda proprietas

prietas, ubi finitus usufructus fuerit, is ad proprietatem redit §. 4. *h. t.* Exinde autem & suæ rei fructus dominus ipse percipiet, & pars domini usufructus erit, ut loquitur Paulus in *l. 4. ff. de usufruct.* Enimvero si conjunctim pluribus legatus sit usufructus, si quis ex conjunctis deficiat, pars usufructus deficiens ad proprietatem non revertetur, sed conjunctis accrescet. Eam ob causam Tribonianus *d. §. 4. h. t.* ad proprietatem tandem usumfructum redire scribit, ubi *totus* finitus is fuerit. Jus igitur accrescendi locum habet non solum in proprietate conjunctim legata, sed in usufructu quoque, ut passim liquet ex titulo *ff. de usufruct. accrescend.* De toto accrescendi jure latius infra videbimus sub titulo *de legat.* Opportunum tamen hic fuerit advertere, ea in re inter proprietatem, & usumfructum legatum duplex interesse discrimen. Primo enim, proprietate legata, inter conjunctos statim jus accrescendi cessat, postquam in legato conjuncti partem quisque suam agnoverint. Verum, conjunctim usufructu legato, jus accrescendi conjuncti habent non ab initio tantum, sed & quandocumque deficiat ex conjunctis quispiam. Pars igitur ab altero conjuncto quæsitæ, postea tamen amissa aliis conjunctis accrescet *l. 1. ff. de usufruct. accrescend.* Deinde, conjunctim proprietate legata, accrescendi jure non utitur, qui partem suam ab initio non agnovit *l. unic. §. 10. C. de caduc. tollend.* Contra, pluribus conjunctim usufructu legato, accrescendi jure non caret, qui partem suam ab initio non agnovit *l. 10. ff. de usufruct. accresc.* Diversi juris rationem eleganter indicat Ulpianus, quia scilicet *usufructus quotidie constituitur,*

tur, & legatur, non, ut proprietas, eo solo tempore, quo legatur l. 1. §. 3. ff. eod. Multiplex scilicet legatum est usufructus, &, cum singulis quibusque diebus fructus in fundo nascentur, singulis quibusque diebus is legari intelligitur. Quandoque igitur pars usufructus defecerit, in partem deficientem conjunctus admitti debet. Contra proprietas semel legatur, ejusque legatum est unum. Proinde, ubi quis semel partem suam repudiarit, legati vi pereunte, deficientem partem frustra desiderat. Quæ tamen diximus, non ultra usufructum legatum extendi debent. Nam si usufructus contractu sit constitutus, in eo jus accrescendi locum non habet, ut late ostendit Cujacius ad *l. 64. ff. de contrah. emptiõn.* Id vel inde liquet, quod leges omnes, quæ jus accrescendi in usufructu memorant, de usufructu legato perpetuo loquuntur, numquam de usufructu contractibus constituto.

T I T U L U S V.

De usu, & habitatione.

ALtera servitutum personalium species usus est. Usus haud absurde definire queas *jus utendi rebus alienis salva earumdem substantia*. Usus percipi debet neque ad compendium, neque ad abusum usque, sed intra usus ipsius fines, quatenus scilicet utentis, ejusque familiæ poscit quotidiana necessitas *l. 12. §. 1. ff. de us. & habitat.* Constituitur autem, & finitur usus iisdem ferme modis, qui-

quibus constituitur, & finitur usufructus *princip. instit. h. t.* Inter utrumque tamen complusculæ sunt differentiæ. Primo enim usus utentis necessitate definitur. Ex re igitur usuaria ultra necessitatis modum aliquid sumi nequit. Contra usufructus rei emolumentum omne complectitur. Hinc licet usufructus divisionem recipiat, ac pro parte legari queat *l. 5. ff. de usufruct.* usus tamen neque ullam divisionem admittit, neque pro parte legari potest *l. 19. ff. de uf. & habitat.* Usus scilicet necessitate finitur: ei igitur quidpiam demi nequit: si secus fiat, quod superest, idoneum non præstat usum. Deinde usufructus idem futurus apud omnes vendi, locari potest *l. 11. §. 2. ff. de pignor. & hypoth.* Id ipsum tamen in usu non licet. Nimirum percipiendus est usus ex re usuaria, quatenus exposcit quotidiana necessitas: necessitatis pro diversitate hominum diversi sunt gradus, & solet præ altero alter plus indigere. Ita usum in alios transferri non placuit, ne fraus fieret rei usuariæ domino, si in egentiores hominem transferretur *l. 8. princip. ff. de uf. & habitat.* Enimvero res ipsa aliquando suadet, ut usus ab usuario in alium transferri possit. Ita quidem silvæ remotioris usu legato, ligna ejus cædua vendi non prohibentur; aliter ex legato usuarius nullam utilitatem percepturus esset *l. 20. princ. ff. cod.*

II. Porro quid ex rebus usuariis percipere usuarius liceat, generatim definiri vix potest. Nam pro diversitate rerum usuariarum diverse de usuarii facultate responderi debet. Ita quidem, gregis usu legato, eo tantum ad stercorendum usuarium uti posse censebat Labeo; lacte, agnis, lana eum uti non posse, quia isthæc magis in fructu forent *l.*

12. §. 2. ff. de us. & habitat. & §. 4. h. t. Verum benignior ea in re Ulpianus fuit : is enim modicum quoque lactis usufructuario concedendum edixit d. l. 12. §. 2. ff. eod. Largius tamen agi cum eo placuit, cui fundi usus legatus esset. Is enim ad quotidianam familiæ necessitatem pomis, lignis, oleribus uti non prohibetur §. 1. h. t. Ex oleo etiam, frumento, ceterisque rebus, quæ nascuntur in fundo, tantum ei conceditur, quantum exposcit quotidiana necessitas d. l. 12. §. 1. ff. eod. Illud tamen addubitari queat, an, si de frumento, ac ceteris frugibus agatur, pro rata usufructuum conferre oporteat culturæ sumptus. Ea in re affirmans sententia probabilior videri debet. Aperte enim Paulus pronunciat in l. 18. ff. eod. communi sumptu usufructuarii, & heredis reficiendam rem esse, si inter utrumque communis sit usus rei legatæ. Ceterum, quod supra monuimus, quotidiana tantum necessitate usum circumscribi, non ita intelligi debet, quasi in dies singulos cum sportula usufructuarius ad proprietarium itare debeat. Æquitas enim ipsa suadet, ut simul capiat usufructuarius, quod sufficiat in anni necessitatem.

III. Inter servitutes personales etiam referri debet habitatio, jus scilicet alienas ædes inhabitandi. Ea autem servitus constituitur iisdem fere modis, quibus constituitur usus, & usufructus; iisdem etiam modis intercidit. Illud tamen in habitatione olim singulare placuit, quod per minimam capitis deminutionem non amittebatur l. 10. princip. ff. de us. & habitat. In ea re ab usu, & usufructu ideo recessit habitatio, quia ex Modestini sententia in facto potius, quam in jure consisteret l. 10. ff. de capit. minut. Quæ enim

De usuc. & longi temp. præscript. 71

enim facti erant, post minimam capitis deminutionem olim retinebantur. Conf. doct. ad *d. l. 10. ff. de capit. minut.* Ceterum ante Justinianum inter ædium habitationem, & usum vix quicquam intererat. Hinc plerique veteres censuerunt, eam exemplo usus aliis locari non posse. Secus tamen Marcello visum. Is enim, habitatione legata, eam a legatario censuit separatim locari posse §. 5. *instit. h. t.* Marcelli sententia ab Justiniano confirmata fuit *l. 13. C. de usufruct.* Proinde jure novo inter ædium usumfructum, & habitationem vix quicquam interest.

T I T U L U S VI.

De usucapionibus, & longi temporis præscriptionibus.

EXpositis sub hujus libri priori titulo acquirendi modis jure Gentium institutis, ad civiles acquirendi modos orationem hic transfert Tribonianus. Modos autem acquirendi civiles in *universales*, & *singulares* divisere veteres. Universalibus acquirendi modis alicujus universa jura acquiruntur; singularibus acquirendi modis res singulæ acquiri solent. De universalibus acquirendi modis infra ad titulum decimum cum Imperatore videbimus: hic de singularibus acquirendi modis sermonem instituemus. Civiles autem acquirendi modi singulares complusculi apud veteres Romanos erant. Plurimi olim intererat res adipisci per modos acquirendi civiles præsertim ob dominium

Quiritarium inde acquiri solitum. Eam ob rem civiles acquirendi modi frequentissime olim adhibebantur. Verum, domini Quiritarii, & bonitarii discrimine ab Justiniano sublato, modorum acquirendi civilium infrequentior usus evasit. Proinde non de modis omnibus acquirendi civilibus sollicitus fuit in institutionibus Tribonianus. Adolescentibus eos tantum exposuit, qui magis necessarii viderentur. Ejusmodi esse censuit usucapionem, donationem, legatum, fideicommissum singulare denique. Nos ejus sequuti vestigia de usucapione sermonem hic instituemus; de reliquis tribus civilibus acquirendi modis infra videbimus.

II. Primum omnium per usucapionem, seu præscriptionem acquirimus alienæ rei dominium eam possidendo per tempus in jure definitum. Recte autem Imperator usucapionis originem a jure civili repetit, & civilibus acquirendi modis eam accenset *princip. h. t.* Scriptores quidem complures præclari nominis usucapionem, seu præscriptionem potius ab jure Gentium repetendam contendunt. Eorum potissimum argumentum est, quod sine præscriptione humanæ societatis concordia sperari nequeat; omnium etiam ferme Gentium consensu placuerit, ut diuturna possessione alieni territorii dominium acquiri posset. Eo fere redeunt, quæ in eam sententiam disserunt Grotius *de jur. bell. & pac. 2. 4.* & Pufendorfius *de jur. Natur. & Gent. 4. 12.* Id tamen dissidium facile componi potest, si duplex præscriptio distinguatur, quarum altera a jure Gentium, altera a jure civili proflu- xerit. Duplicem autem præscriptionem admittendam esse demonstrasse videtur Christianus Thoma- sius ex diversis utriusque præscriptionis fundamen-

tis *jurisprud. divin.* 2. 10. Nimirum præscriptionis jure Gentium introductæ fundamentum est tacita derelictio consensu Gentium præsumi solita adversus eos, qui neque vi, neque clam, neque precario res suas ab aliis diutius possideri sinunt. Contra præscriptionis institutæ jure civili fundamentum est poena adversus eos indicta, qui in rebus suis negligenter agunt, neque de ipsis recipiendis cogitant. Eo accedit, quod pro utriusque præscriptionis diversitate diverse de tempore pronunciari debet, intra quod præscriptio sit absolvenda. In præscriptione scilicet jure Gentium introducta ejus temporis definitio relinqui debet arbitrio boni viri, qui pro rerum diversitate de præscriptionis tempore diverse decernat. Conf. Pufendorf. *loc. cit.* §. 9. Contra tempus præscriptionis civilis definitur a jure Civitatis, de quo infra liquabit.

III. Quæcumque autem præscriptionis origo fuerit, ad perimendas in Civitate lites nil quicquam ea opportunius excogitari potest. Falso igitur edixit Cujacius, præscriptionem juri Gentium adversari ad *l. 1. ff. de usucapion.* Neque cum Cujacio regeras, præscriptionem juri Gentium adversari, quia dominium invito aufert. Primo enim alienare sua sponte videtur, qui rem suam usucapi patitur *l. 28. ff. de usucapion.* Deinde usucapionis effectui tacite dominus assentitur, si in Civitate recepta sit usucapio. Vid. Hugon. de Roy *de eo, quod just. est* 3. 3. Prætereo, quod dominium ab ipso jure Civitatis manat; summus autem Imperans dominio leges dicere in Civitate pro arbitrio potest; transferre etiam illud in alterum, si ratio Civitatis ita suaserit. Stet illud igitur, æquitati
juris

juris Gentium civilem præscriptionem non adversari. Vid. Donell. *comment.* 5. 30.

IV. Jam vero de usucapione hoc circumfertur Decemvirale carmen. *Usus auctoritas fundi biennium, ceterarum rerum annuus usus esto* Gothofr. *in tab. 6.* Sententia totius legis eo redit, prædia ab alio possessa intra biennium tantum, res mobiles, aut se moventes tantum intra annum a domino vindicari posse; eo tempore circumacto, novo possessori per usucapionem acquiri. Conf. Gothofred. *in probat. ad d. tab. 6.* Porro mirum videri non debet, intra anni, aut biennii angustias usucapionem coercuisse Decemviros. Nimirum tempore latæ legis Romanum Imperium angustissimis finibus continebatur. Intra tempus igitur lege præstitutum res suas ab aliis possessas commode cives vindicare poterant. Cum vero Decemvirorum ævo intra Italiæ fines consisteret Romana potentia, tantum in Italico solo constituta prædia usucapi poterant. Inde factum, ut, prolato tandem accessione Provinciarum Imperio, fundi provinciales usucapione fuerint exempti. Secus in mobilibus tamen obtinuit. Ea enim seu Romæ, seu in Provinciis constituta forent, per usucapionem acquiri non vetabantur Ulpian. *fragm.* 19. 8. Peregrini tantum, si jus commercii non impetrassent, usucapione uti non poterant. Nam adversus *hostes*, quo vocabulo peregrini designabantur, perpetua rei vindicatio domino competeat. Cicer. *pro Cæcin.* 26.

V. Ab initio igitur saltem in rebus immobilibus extra Italiam usucapio non procedebat. Ita in Provinciis a bonæ fidei possessoribus nullus litium finis sperari poterat. Quapropter ut litium

De usuc. & longi temp. præscript. 75

occasiones præciderentur, ad fundos etiam provinciales non veram usucapionem, sed præscriptionem edicto suo Prætores cœperunt extendere. Per eos enim cautum edicto fuit, ut prædiorum in Provinciis bonæ fidei possessores, decennii, vel vicennii præscriptione adversus petitores opposita, securi forent. Proinde a suis initiis præscriptio nuda fuit exceptio, qua possessione decennii inter præsentēs, vicennii inter absentes a possessore bonæ fidei repellebatur actor. Conf. Donell. *comment.* 5. 4. n. 5. & ad *tit. C. de except. n. 15.* Ita veteris juris asperitas per Prætores mollita fuit. Eam vero jurisprudentiam litibus perimendis opportunissimam lubenter sunt amplexi jurisconsulti, ut ex ipsorum fragmentis passim in pandectis liquet *l. 4. C. 14. ff. pro empt.*

VI. Porro, ea præscriptio per Prætorem inventa, cum nuda esset exceptio, ab initio suo dominium in possessorem transferre non poterat. Proinde si possessio olim amissa foret, possessori bonæ fidei ne utili vindicatione quidem rem petere fortasse licebat. Verum contra juris rigorem paulatim invaluit, ut utilis saltem rei vindicatio bonæ fidei possessori accommodaretur, ubi amisisset possessionem *l. 10. princ. ff. si servit. vindic.* Ita ea de re ad Justinianum usque receptum jus fuerat. Verum Justinianus per præscriptionem dominium acquiri jussit perinde, ac per alios civiles acquirendi modos. Hinc si post præscriptionis tempus exactum bonæ fidei possessor amisisset possessionem, ad rem petendam directam vindicationem ei concedi jussit *l. 8. C. de præscript. trigint. vel quadrag. annor.* Idem Augustus, rerum Italicarum, ac Provincialium sublato discrimine, & prædia

dia ubicumque posita per præscriptionem acquiri jussit, & usucapioni præscriptionem æquavit *l. un. C. de usucap. transform.* Cum tamen usucapionis tempus in jure Decemvirali præscriptum videretur angustius, idem Justinianus longius tempus sine locorum discrimine præscriptioni, seu usucapioni constituit. Res igitur mobiles, ac se moventes possessione triennii acquiri jussit; res vero immobiles possessione decennii inter præsentis, vicennii inter absentes *d. l. unic. C. de usucap. transform.*

VII. Ex novissimis igitur Justiniani legibus, quod ad tempus, & acquisitionis effectus, inter usucapionem, & præscriptionem vix quicquam interest. Conf. Donell. *comment.* 5. 4. Neque tamen usucapionis, & præscriptionis vocabulo semper promiscue uti licet. Ut enim alia præteream, usucapio ultra vicessimum annum numquam excurrit; præscriptio ultra procedit, & vel ad centum annos extendi potest, ut infra liquabit. Si hinc discedas, usucapio a præscriptione non differt; nam per usucapionem, ac præscriptionem idem dominium acquiri solet. Utraque igitur definiri queat *civilis modus acquirendi domini per continuationem possessionis per tempus in jure definitum l. 3. ff. de usucap. & usurpat.* Neque tamen seu usucapio, seu præscriptio a sola temporis prærogativa pendet. Nam præter tempus requiritur etiam justus titulus, bona fides, possessio non interrupta. Res quoque ejusmodi esse debet, ut præscriptionem admittat. Juvabit igitur ea omnia accuratius enarrare.

VIII. Primum omnium locus usucapioni esse non potest, si justus titulus, seu causa ad transfe-

De usuc. & longi temp. præscript. 77

rendum dominium apta in possessore desit *princ. instit. h. t.* Is autem titulus falsus esse non debet. Proinde neque pro empto, neque pro donato, aliove quo titulo usucapiendi jus erit, si neque emptio, neque donatio, neque alia acquirendi causa intercesserit §. 6. *h. t. & l. 27. ff. de usucap. & usurpat.* Specialis etiam in usucapione titulus esse debet. Proinde ne titulo quidem generali pro suo res usucapi poterit. Neque enim generali titulo pro suo quid usucapere licet, nisi cum eo generali titulo alter specialis adsit. Opportune ea de re Ulpianus in *l. 1. princ. ff. pro suo. Pro suo possessio talis est, cum dominium nobis acquiri putamus, & ex ea causa possidemus, ex qua acquiritur, & præterea pro suo: ut puta ex causa emptionis & pro emptore, & pro suo possideo.* Eo usque autem in usucapione titulus est necessarius, ut ne falsa quidem possessoris existimatio eum supplere possit. Non procedit igitur usucapio, si rem se emisse quis falso putet *d. l. 27. ff. de usucap. & usurpat.* Enimvero in rebus incorporalibus titulus quoque præsumptus ad præscriptionem prodest. Ejusmodi titulum inducit patientia domini, qui alterum diuturno tempore nec vi, nec clam, nec precario in suo uti servitute patitur. Proinde sordabit Ulpianus, ei, qui diuturno usu jus aquæ ducentæ per alienum sit nactus, necesse non esse docere de titulo, quo eam facultatem sibi quaesierit *l. 10. princ. ff. si servit. vindic.*

IX. Præter justum titulum bona etiam fides in usucapione requiritur. Ut autem bona fides in possessore esse dicatur, sufficit, eum ignorare, rem alienam esse. Ita sane bona fides in emptore adigit, si eum, qui vendidit, aut dominum crediderit,

rit, aut vendendi jus saltem habere *l. 109. ff. de verbor. signif.* Ea tamen ignorantia in errore facti versari debet. Nam juris error in acquirendo non prodest *l. 17. C. sequ. ff. de jur. C. fact. ignorant.* Ceterum in re dubia potius bona fides in possessore præsumi debet. Inde fit, ut, ubi possessor de alterius dominio dubitare coeperit, bonam fidem non statim amittat. Nam mala fides incipit, vel ubi alienum jus explorarit, vel res in iudicium deducta fuerit *l. 10. C. de acquir. possess.*

X. Porro ex regulis Romani juris tantum a possessionis initio bona fides spectari debet. Proinde si post quæsitam possessionem superveniat mala fides, usucapio recte procedet *l. 48. §. 1. ff. de acquir. rer. domin.* Secus tantum id esse placuit in fructibus, qui per perceptionem acquiri solent. Nam ut ii bonæ fidei possessori cedant, non sufficit ab initio bona fide possedisse prædium, nisi & perceptionis tempore bonam fidem possessor habeat *d. l. 48. §. 1. ff. eod.* Mirum autem videri non debet, si in acquirendo per usucapionem prædio ab initio tantum spectanda sit bona fides; in ejusdem vero fructibus acquirendis perceptionis etiam tempore bona fides spectari debeat. Nam in acquirendo per usucapionem prædio una quidem fit acquisitio. Contra in perceptione fructuum plures intercedunt acquisitiones. In singulis igitur perceptionibus bona fides adesse debet. Enimvero id discrimen ignorat jus Pontificium. Nam ex ejus regulis in rebus omnibus usucapiendis non solum ab initio, sed intermedio quoque tempore bona fides spectari jubetur *c. 5. C. 20. X. de præscript.*

XI. Rursus sine possessione contingere nequit usucapio. Possessionem autem non qualemquam

in-

intellige, sed civilem. Ad usucapionem igitur ex tantum possessio prodesse potest, quæ cum domini affectu conjuncta est, & naturali detentioni solet opponi. Quapropter si qui in possessione sunt alieno nomine, eis possessio isthæc ad usucapionem prodesse nequit *l. 33. ff. de usucap. & usurpat.* Ejusmodi possessio est inquilini, coloni, commodatarii. Civilem quoque possessionem in usucapione continuatam oportet esse. Nam si qua interruptio fiat, usucapio non procedit *l. 3. ff. eod.* Interruptionem possessionis *usurpationem* dixere veteres *l. 2. ff. eod.* Eadem vel naturalis est, vel civilis. Naturalis usurpatio fit, si vi aliquis de possessione dejiciatur *l. 5. ff. eod.* Civilis usurpatio fiet per contestationem litis, aut per solam libelli oblationem *l. 10. C. de acquir. possess.* Utrovis modo possessionis usurpatio facta fuerit, possessio statim interruptitur, & præteritæ possessionis tempus ad usucapionem non prodest. Hinc, impleta usucapione inter judicii moras, possessione interrupta per litem victus possessor adversus actorem ad usucapionem uti non potest *l. 18. ff. de rei vindic.*

XII. At vero licet oporteat, possessionem continuatam esse, necesse tamen non est, ut ea in eodem possessore continuetur. Hinc ad usucapionem implendam recte utetur successor alienæ possessionis additamento §. 7. *h. r.* Si igitur per quinquennium prædium possederit venditor, post alterum possessionis quinquennium in emptore usucapionis tempus absolvitur §. 8. *eod.* Ab initio quidem soli successores universi juris ejusmodi accessionibus in usucapionibus uti poterant: verum Severi, & Antonini rescripto ad successores etiam singulares hoc possessionis additamentum fuit ex-

ten.

tensum d. §. 8. h. r. In ea re tamen inter heredem, & successorem singularem interest. Quod enim ad heredem, is in vitia, ac virtutes defuncti succedit. Cujusmodi igitur sit ipsius possessio, unice definiendum erit ex persona defuncti. Quapropter si mala fide defunctus possidere cœperit, bona ipsius fides heredi non proderit. Proinde ne a sua possessione quidem is usucapionem inchoare poterit *l. 11. ff. de divers. tempor. præscript.* Contra successoris singularis ea in re melior est conditio. Is enim, si auctor mala fide possidere cœperit, a possessione sua usucapionem inchoare non prohibetur, si ipse rem acceperit bona fide. Is enim cum universi juris successor haud sit, malam fidem auctoris non habet *l. 5. ff. de divers. tempor. præscript.*

XIII. Denique procedere nequit usucapio, si eam res non admittat. Permulta autem usucapionem admittere nequeunt vel ob privilegium ipsis tributum, vel ob vitium, quo sunt affecta. Ob privilegium usucapi non possunt res extra commercium positæ, res fisci, & bona vacantia, quæ ei nunciata jam fuerint §. 4. h. r. Ob privilegium etiam prohibentur usucapi res Civitatum, Ecclesiarum, impuberum, minorum, &, ne percenseam singula, res generatim omnes lege, vel testamento alienari prohibita *l. 2. C. pro empr. & l. 16. ff. de fund. dotal.* Ob vitium vero, quo sunt affectæ, vetantur usucapi res furtivæ, aut vi possessæ. Quod ad rem quidem furtivam, ejus usucapionem omnino vetuere Decemviri. In eam sententiam vulgatum est Decemvirale carmen: *rei furtivæ æterna auctoritas esto.* Enimvero ex jurisconsultorum interpretatione lex isthæc ita fuit
acce-

De usuc. & longi temp. præscript. 81

accepta, ut res furtiva ab ipso tantum fure, ne-
tquam vero ab aliis vetaretur usucapi. Id tamen
iniquum posteritati visum. Proinde anno fortasse
Urbis 556. cautum lege Atinia, ut res furtiva a
dominis perpetuo vindicari posset; a nemine au-
tem posset usucapi, nisi in potestatem domini re-
versa foret Gell.*noct. Attic.* 17.7. Ita sane de rebus
furtivis jus fuerat olim. De rebus tamen vi pos-
sessis ante legem Juliam, & Plautiam secus obti-
nuit. Lex enim Atinia impedimento non erat,
quominus vi possessa prædia possent usucapi. Nam
ex regulis Romani juris prædii furtum fieri non
posse credebatur §. 2. *h. t.* Quapropter primum
lege Plautia, deinde & Julia cautum, ne rerum
vi possessarum ulla usucapio foret *d. §. 2. h. t.* Lex
isthæc Julia ea ipsa est, quam de vi publica, &
privata tulit Julius Cæsar, quo tempore dictator
erat. Conf. Heinec. *histor. jur. libr. 1. c. 3. §. 98.*
In eam a Cæsare relata fuit & lex Plautia, quæ
de rebus vi possessis antea caverat. Hinc intel-
liges, cur lex Plautia Juliæ præponatur *in l. 33.*
§. 2. ff. de usucap. & usurpat. Perperam igitur Tri-
bonianus Juliam Plautiæ præposuit *d. §. 2. h. t.*

XIV. Hactenus de requisitis usucapionis, seu
præscriptionis egimus. Si quid eorum deesset olim,
res usucapi quidem haud poterant. Ea vero de
causa actiones perpetuæ competeabant, quas nulla
temporis præscriptio perimebat. Enimvero Civi-
tatis intererat, lites immortales haud esse, & ali-
quem tandem sollicitudini finem imponi. Quod igi-
tur ad actiones civiles, si perpetuæ forent, eas tri-
ginta annorum præscriptione tolli jusserunt Hono-
rius, & Theodosius *l. 3. C. de præscript. trigint.*
vel quadragint. annor. Verum sub Anastasio sub-

utilitatibus suis contendebant quidam, prædicta constitutione actiones quasdam non contineri, easque vere perpetuas censendas esse. Eas igitur Anastasius quadraginta saltem annorum præscriptione sopiri iussit *l. 4. C. eod.* Ita quadraginta etiam annorum nata præscriptio, eamque contra fiscum, aut Principem opponi placuit, si de fiscali, aut patrimoniali fundo lis esset *l. 14. C. de fund. patrim.* Eadem præscriptione quadragenaria infringi iussit Justinianus actionem hypothecariam, si ageretur adversus ipsum debitorem, aut heredem *l. 7. C. de præscript. trigint. vel quadragint. annor.* Eadem præscriptione denique elidi iussit Justinianus actiones omnes, de quibus semel contestata lis foret *l. 9. C. eod.* Quod vero ad crimina, ea præscriptione viginti annorum perimi voluere Principes *l. 2. C. ad leg. Cornel. de fisci.* Ea autem viginti annorum præscriptio adversus ipsum parricidium opponi potest. Vid. Anton. Matth. ad *libr. 48. ff. tit. 19. §. 1.*

XV. Ex dictis hætenus aperte liquet, ex regulis quidem Romani juris triginta, aut quadraginta saltem annorum præscriptione perimi actiones omnes. Conf. Donell. *commentar. 5. 31. n. 6.* Enimvero vulgo doctores statuerunt, Romanam Ecclesiam sola centenaria præscriptione repelli posse. Ea in re doctores errarunt ob *authent. quas actiones. C. de sacrosanct. Eccles.* Quicumque enim ejus authenticæ fuerit auctor, is Romanæ Ecclesiæ centenariæ præscriptionis privilegium tribuit contra Justiniani mentem *in novell. 131. c. 6.* Justinianus quidem Ecclesiarum, Civitatum, & piorum locorum actiones centenaria tandem præscriptione infringi iussit *l. 24. C. de sacrosanct. Eccles.*

claf. & novell. 9. Ejusmodi tamen præscriptionem statuisse videtur Imperator fraude Sacerdotum E-
mesi circumventus. li enim diplomatum quorum-
dam supposititiorum ope familias quasdam bonis suis
nitebantur exuere. Conf. Procopium *histor. arcan.*
28. Proinde Justinianus, fraude fortasse comperta,
præscriptiones adversus Ecclesias, & loca pia rur-
sus intra spatium annorum quadraginta coercuit
d. novell. 131. c. 6. Veteri igitur privilegio per
Principem revocato, ipsi Pontifices sanctioris æta-
tis in ea re nusquam jus singulare aliquod Roma-
næ Ecclesiæ tribuerunt. Instar omnium esse potest
Gregorius Magnus apud Gratianum *caus. 16. quæst.*
4. c. 2. Hoc privilegium Romanæ Ecclesiæ primus
asseruit Joannes VIII. apud eundem Gratianum
loc. cit. quæst. 3. can. ult. Eum Pontificem sequutus
seu Innerius, seu glossator alius in prædicta authen-
tica Romanæ Ecclesiæ centenariam præscriptionem
tribuit. Rectius contendendi posset, Civitates ipsas
centenaria tantum præscriptione hodie repelli posse
ob *d. l. 24. C. de Sacrosanct. Eccles.* Quod enim ad
Civitates, ei legi derogatum ab Justiniano non
fuit in *d. novell. 131. c. 6.* Conf. Cujac. *obser-*
vat. 5. 5. Sed videamus, an ex regulis supra
propositis in Regno Neapolitano præscriptio sit
admittenda.

XVI. Ubi in Provinciis Neapolitanis regnari
coëptum, sub ipso fortasse Nortmannico Principa-
tu apud nos præscriptio obtinuit. Saltem Frideri-
cus II. Nortmannorum in Regno successor Regia
constitutione sua ea ferme omnia confirmavit, quæ
ea de re jure civili novissimo cavebantur *constit.*
duram. de præscription. Tantum præter regulas
Romani juris constitutum ab eo fuit, ut contra

fiscum, aut Principem sola centenaria præscriptio opponi posset *constit. quadragenalem. de prorogat. præscript.* Legitimas etiam in Regno præscriptiones servari iussit Ferdinandus Catholicus *pragm. 1. de præscript.* Jus igitur Neapolitanum scriptum præscriptionem & fovet, & jubet. Verum a renata fere jurisprudentia dissidium apud nos fecere doctores, an in Regno Neapolitano præscriptio admittenda esset. Matthæus quidem de Afflictis eo inclinare videtur, ut præscriptione tricenaria, vel quadragenaria omnes in Regno actiones infringi queant *in decis. 13. n. 2. & sequ.* Is tamen sui oblitus præscriptiones replicatione ignorantie pronunciat elidi posse *decis. 37. n. 1. & sequ.* Ursillus vix Afflicto constantior in Regno præscriptionem agnoscit, licet pro ea vix judicari moneat: de ipsius enim requisitis perraro constare scribit ad *d. decis. 13. n. 9.* Mox tamen idem Ursillus religiosior fortasse factus ipsam præscriptionem centenariam per replicationem saltem ignorantie edicit eludi posse ad *d. decis. 37. n. 2.* Eam vero sententiam eo potissimum argumento tuetur, quia peccatum remitti nequit, nisi restituatur ablatum. Quasi vero Principi non liceat, de dominio leges in Civitate scribere, isque auctor peccandi sit, si præscriptionem recipi jubeat. Denique, ne multus sim, Antonius de Marinis præscriptionem tricenariam in Regno utiliter opponi censet, si cum privatis agatur *resolut. 2. 115. n. 10.*

XVII. In tanto doctorum dissidio rerum judicatarum non minor incertitudo. Ea de re jus in Regno certius restitutum videri queat per definitionem in generalibus comitiis a Sacro Consilio evulgatam anno 1738. Tunc enim temporis omnes
ejus

ejus Senatus patres censuerunt, præscriptioni, qua actiones extinguuntur, in quocumque Regni foro locum esse oportere, modo conditionibus a jure civili, Pontificio, ac lege municipali præstitutis plane sit confirmata. Propterea neque debitorem, qui ob conscientiam debiti semper est in mala fide, neque heredem, licet bonæ fidei, qui possessori malæ fidei successerit, præscriptione juvari umquam posse. Ceterum in tertio possessore bonam fidem præsumendam esse, ideoque lapsu triginta annorum a die natæ actionis, ac deductis temporibus jure deducendis, legitima præscriptione eum recte uti posse. Ad hanc tamen excludendam licere actori apertis argumentis probare, illum possessorem sive ab initio, sive intra præscriptionis spatium vere in mala fide fuisse, probationibus præsumptæ malæ fidei prorsus rejectis. Licet autem definitio isthæc Regiis quoque literis confirmata fuerit anno 1743. de eo tamen argumento verissime dici potest, leges per mores subactas esse. Nam ex recepta in foro consuetudine ne ipsa quidem centum annorum præscriptio inter privatos prodesse solet. Sane si post lapsum centum annorum rei meæ dominium ab alio possessæ probavero, ipsa centum annorum præscriptio mihi frustra opponetur. Si quid autem video, in foro Neapolitano locus præscriptioni patet, si aut de servitutibus sit controversia, aut de præscribenda instrumentorum via, quam *exequutivam* vocant. Per præscriptionem etiam in Regno intercidunt actiones illæ, quæ intra certum tempus institui jubentur in jure civili. Ita quidem ex regulis Romani juris apud nos inofficiosi querela præscriptione quinquennii elidi potest *l. 8. §. ult. ff. de inoffic. te-*

stam. Ex jure civili quoque crimina generatim omnia apud nos præscriptione vicennii infringi solent ex *l. 12. C. ad leg. Cornel. de fals.* Id ipsum tamen intellige, modo ne de criminibus agatur, quibus brevioris temporis præscriptionem leges opponi sinunt.

T I T U L U S VII.

De donationibus.

ALter modus acquirendi civilis *donatio* Triboniano est *princ. h. t.* Id ipsum tamen intellige, quatenus donatio gratuitam ipsam rei donatæ traditionem complectitur. Quatenus enim beneficam de dando conventionem designat, ea non acquirendi modus, sed titulus videri debet. Ceterum cum naturaliter plerique omnes ad liberalitatem propensi simus, præsens acquirendi modus ex jure potius Gentium est repetendus. Perperam igitur Tribonianus hic civilibus acquirendi modis donationem accenset. Saltem jure Romano novissimo donatio naturalis acquirendi modus censi debet. Non negarim quidem, donationem ante Justinianum fuisse modum acquirendi civilem. Nimirum in donatione olim mancipationis ritus adhibebatur Brummer. ad *leg. Cinc. 13.* Quæcumque enim res donaretur, eam per mancipationis solemnitatem in donatarium transferri oportebat. Ea de re ipsis lapidibus testimonium denunciare licet. Ita sane vetus Romæ marmor: *hoc monumentum L. Titurinus Sabinus, se vivo, donavit*
L.

L. Sanio Symphoro, *mancipavitque sestertio nummo uno*. Quamobrem ad Justinianum usque ob mancipationis solemnitatem civilis acquirendi modus donatio fuit. Enimvero in donationibus Justinianus mancipationis ritum contemni jussit, easque simplicitate juris Gentium regi voluit *l. 37. C. de donat.* Exinde igitur donatio naturalis acquirendi modus evasit. Novi autem juris in institutionibus oblitus Tribonianus civilibus acquirendi modis eam accensuit.

II. Jam vero donatio haud absurde definiri queat *liberalis in alium rei collatio*. Donationis tamen duo sunt genera. Altera fieri dicitur *mortis causa*, altera *inter vivos princ. h. t.* Mortis causa donatio ab initio neque dominium in donatarium transfert, & pro lubitu revocari potest. Ea igitur donatio minus propria cenferi debet. Est autem mortis causa donatio, quæ propter mortis suspicionem fit, seu eam suaserit imminens mortis periculum, seu mortalitatis sola cogitatio §. 1. *h. t.* Quapropter an mortis causa donatum fuerit, non ex mortis quidem periculo, sed ex verbis, quæ humanam mortalitatem inculcant, æstimari debet. Proinde si in extrema fati necessitate quis positus sine mortis cogitatione donet, potius inter vivos, quam mortis causa donasse videbitur *l. 42. §. 1. ff. de mort. caus. donat.* Contra si in optima valetudine constitutus quispiam ex mortalitatis cogitatione donet, donatio isthæc mortis causa facta videri debet *l. 2. et sequ. ff. eod.* Mortis autem causa donari potest non solum ob mortis nostræ, sed ob alienæ quoque cogitationem. Ita quidem & pater ob cogitationem mortis filii, & frater ob cogitationem mortis fratris mortis causa recte donat *l.*

18. *princ. ff. eod.* Ceterum qui mortis causa donat, insita vivendi cupidine optat, se potius rem donatam habere, quam donatarium; deinde donatarium potius, quam heredem suum; denique heredem suum potius, quam donatarii *l. 35. §. 2. ff. eod.* Proinde donatio mortis causa rescinditur, non tantum, si donatorem donationis poeniteat, sed etiam si aut cessante periculo is supervixerit, aut ante donatorem donatarius obeat *d. §. 1. h.r.*

III. Jam vero non conveniebant jurisconsulti veteres, num donatio mortis causa legato similis censenda foret, an ad contractum potius innominatum accederet, in quo aliquid datur futuram ob causam. Ita donatio isthæc inter contractum, & legatum fluctuavit ad Justinianum usque. Enimvero decisione sua Justinianus donationem mortis causa potius jure legati censi jussit. Exemplo legati igitur eam ratam haberi voluit, si coram quinque testibus expedita foret *l. ult. C. de donat. caus. mort.* Ne credas tamen, per eam Justiniani constitutionem donationes mortis causa legis omnino similes fuisse factas. In ea enim exæquatione id potissimum spectavit Justinianus, ut ob infirmationis defectum ejusmodi donationes infringi non possent. Si hinc discesseris, veteres differentie inter legata, & donationes mortis causa hodie adhuc servari debent. Ita sane secundum jus vetus secus, atque in legatis obtinet, donatio mortis causa ab hereditatis aditione non pendet, sed post donatoris obitum statim firmitatem accipit *l. 32. ff. eod.* Præterea si legetur in singulos annos, pro annorum diversitate diversa legata erunt. Primi igitur anni legatum purum videri debet: insequentium annorum legata conditionem habent,
si le-

si legatarius supervixerit. Mortuo igitur legatario ante diem legati cedentem, ad ejus heredem legatum non pertinebit *l. 4. ff. de ann. legat.* Contra mortis causa donatio in singulos annos una est. Pertinebit igitur etiam ad heredes, nisi secus donatori placuerit *l. 35. §. ult. ff. de mort. caus. donat.* Ne multus sim denique, absenti & ignoranti legari potest : donatio mortis causa acceptationem requirit, & in absentem, aut ignorantem conferri nequit *l. 38. ff. cod.* Sed, his omissis, de donationibus inter vivos sermonem instituiamus.

IV. Donatio inter vivos, ubi perfecta fuerit, temere revocari non potest *§. 2. h. t.* Proinde ea tantum vera, & absoluta donatio censi debet. Apud veteres vero Romanos pro arbitrio cives res suas donare poterant, neque lex ulla solemnitates aliquas in donationibus præscribebat. Enimvero ubi peregrinæ opes prodigiam intulerunt in Urbem, inconsultis donationibus quidam patrimonium suum exhauriebant. Proinde serio cautum oportuit, ne donandi temeritate cives ex liberalibus prodigi fierent ; suis vero. profusis aliena invaderent. Enimvero contrarium libertati fuisset donandi facultatem prorsus adimere. Eo deventum est igitur, ut donationes quibusdam saltem solemnitatibus subjicerentur, quæ eas, si non omnino tollerent, saltem difficiliiores redderent. Eam ob rem opportune lata fuit lex Cincia a Marco Cincio Alimento tribuno plebis anno Urbis 549. Ea autem & ultra certam summam donationes sunt vetitæ, & in eis peragendis mancipationis ritus iustus est adhiberi Brummer. ad *leg. Cinc. c. 12. C. sequ.* Mancipationis solemnitas eo pertinebat, ut

do-

donator maturiori consilio de donatione decerneret. Nimirum inter lætitiā aliquando mortales de rebus suis plus nimio sperare solent, aut certe benigniores videri volunt. Opportune igitur lex Cincia mancipationis necessitatem in donatione præscripsit. Per mancipationem enim quoddam veluti spatium furori donandi concedebatur. Nam inter testium advocatōem, & cetera mancipationis sollemnia frigescebat tantisper donandi ardor. Interea vero consultius de rebus suis statuere poterat, qui pridie exempli gratia inter faustas natalis acclamationes temere quid promississet. Eadem fortasse de causa Constantinus & scripto fieri donationes iussit, & actis publicis insinuari. Vide Gothofred. ad *l. 1. C. Theodos. de sponsal.*

V. Ex dictis hactenus aperte liquet, mediæ jurisprudentiæ leges eo collineasse, ut, quoad fieri posset, donationes coercerentur. Verum juniores Principes vetustissimam illam donandi licentiam ferme restituerunt. Nam Theodosius quidem, & Valentinianus scripturam in donationibus jusserunt impune negligi *l. 29. C. de donat.* Justinianus vero necessitatem insinuationis remisit, si ultra quingentos aureos donatio non pertingeret *l. 36. C. eod.* Sed & ultra processum in ea re ab Justiniano fuit. Cum enim jure veteri sine stipulatione donationes infirmæ censerentur, eas ratas is haberi iussit, licet nudo pacto promissæ forent *l. 35. §. 5. C. de donat.* Idem etiam Augustus donationum licentiam in immensum auxit. Nam vel partem, vel totum hereditatis assem patrifamilias donare concessit *d. l. 35. §. 4. C. eod.* Hinc in Regno donationum effrænis illa licentia, cum præsertim apud nos exoleverit insinuationis necessitas: ei saltem contra ju-

ris regulas in donationibus passim renunciari solet. Enimvero si effusiori donatione legitima illis imminuta fuerit, queis agere de inofficioso licet, saltem ad legitimæ quantitatem usque post donatoris obitum donatio rescindi potest *l. 1. C. sequ. C. de inoffic. donat.* Inofficiosam vero donationem impugnare possunt non solum tempore donationis nati jam liberi, sed & qui post donationem suscepti fuerint *l. 5. C. eod.*

VI. Porro possunt donare omnes, qui liberam rerum suarum administrationem habent. Tantum ratio juris haud patitur, ut eis donare liceat, qui ob potestatis vinculum una veluti persona cum donatore censentur. Ea quidem de causa pater filiosfamilias donare nequit. In ea re tamen inter vetus, & novum jus interest. Nam jure veteri ejusmodi donatio inutilis prorsus erat *l. 1. §. 1. ff. pro donat.* Ea convalescebat tandem, si a patre in morte confirmata foret Paul. 5. *sent. tit. 11. §. 3.* Hinc Diocletianus, & Maximianus donationem filiosfamilias a parente factam potius destinationem paternæ voluntatis, quam perfectam donationem videri jubent *l. 11. C. de donat.* Verum jure novo per mortem parentis, soluto veluti potestatis vinculo, ejusmodi donatio solo silentio confirmatur *l. 25. C. de donat. int. vir. C. uxor.* Idem potestatis vinculum faciebat olim, ne quid uxori donari posset a viro. Cum enim plerumque mulieres per matrimonium transfirent in viri manum, uxores respectu viri filiasfamilias videbantur. Inde inter virum, & uxorem personæ unitas. Ea autem juris fictio faciebat, ut, si quid donasset uxori maritus, sibimet donasse censeretur. Enimvero ubi nuptiæ veteri ritu fieri desierunt, prædi-

Cum

Etum potestatis vinculum donationes inter conjuges impedire non poterat. Ita se mutuo amore conjuges spoliare coeperunt, & veluti venalicia facta sunt matrimonia. Cum igitur donationum inter conjuges prohibitio saluberrima in Civitate foret, alias rationes excogitari placuit, quibus ea porro prohiberentur. Ipsa igitur consuetudo inter conjuges donationes prohibuit, ne venalicia matrimonia forent. Hinc moribus eam prohibitionem tribuit Ulpianus in *l. 1. ff. eod.* Ceterum mores ita receptos confirmavit quoque Senatusconsultum sub Antonino. Id extat adhuc in *l. 1. princ. ff. eod.* Sic autem ibi Senatus. *Majores nostri inter virum, & uxorem donationes prohibuerunt amorem honestum solis animis aestimantes, famæ etiam conjunctorum consulentes, ne concordia pretio conciliari videretur.*

VII. Jam vero cum Senatusconsultum donationes inter conjuges interdicens saluberrimum videretur, ejus sententiam interpretationibus suis extenderunt jurisconsulti. Ita non tantum inter se conjuges donare prohibiti, sed ad eos etiam extensa est prohibitio, qui in ejusdem patris potestate forent. Hinc non tantum maritus, sed & ipsius frater, qui in ejusdem patris potestate est, frustra uxori donat *l. 3. §. 2. ff. donat. int. vir. & uxor.* Et generatim affirmare licet, ex interpretatione jurisconsultorum fuisse prohibitas donationes omnes, quibus obliqua via senatusconsulto fraus fieret. Hinc jure pandectarum mater filio donare nequit, si is in mariti potestate sit. Eo jure scilicet filiusfamilias parenti acquirit adventitia; a matre igitur filio facta donatio in ipsius patris utilitatem redit *d. l. 3. §. 4. ff. eod.* Cum tamen
ho-

hodie adventitiorum saltem proprietatem filiusfamilias sibi quærat *l. 6. C. de bon. quæ liber.* nihil impedimento est, quominus mater filio donet. Moribus autem obtinuit, ut injustorum quoque conjugum donationes prohibita censerentur. Id ita receptum Ulpianus scribit, *ne melior esset conditio eorum, qui deliquerunt d. l. 3. §. 1. ff. eod.*

VIII. Cum vero inter conjuges donationes per leges infirmarentur olim; eæ & pro lubitu revocari a donatore poterant, & per donatoris mortem solo ejus silentio confirmata non censebantur. Proinde si res donata tradita donatario forent, donatoris heres eas vindicare non vetabatur. Cum tamen durum, & avarum videretur, conjugum superstiti res donatas per heredes eripi, sub Antonino Caracalla de veteri rigore aliquid remissum fuit. Sub eo igitur a Senatu cautum, ipsum quidem donatorem poenitere posse; in ejus morte tamen donationem solo silentio confirmari; donatoris igitur heredem res donatas frustra repetere *l. 32. §. 2. ff. eod.* Ceterum jure Antejustinianeo si res donata nondum tradita forent, eas conjux donatarius frustra petebat, licet per silentium in morte donatio confirmata censeretur. Secus tamen Justinianus edixit. Is enim ab herede donatoris donationem impleri jussit, licet vivus donator res donatas non tradidisset *novell. 162. c. 1. Conf. Bynkersk. observat. 5. 18.*

IX. Donationes autem inter vivos, si rite perfectæ fuerint, pro lubitu revocari nequeunt *§. 2. d. 1.* Pro lubitu inquam. Eæ enim justas ob causas rescindi non prohibentur. Justæ donationis rescindendæ causæ religioni judicis remittebantur olim.

olim. Verum longa inde litium, & injuriarum
 seges. Proinde quinque tantum ob causas Justinia-
 nus donationes rescindi concessit *l. ult. C. de re-
 voc. donat.* Ex ea vero constitutione donationes
 revocari poterunt, si donatarius atroces injurias in
 donatorem effuderit; si illi impias intulerit manus;
 si vitæ ejus insidiatus fuerit; si grave damnum bo-
 nis ejus intulerit, si pacta denique donationi ap-
 posita implere noluerit. Ibidem ab Imperatore
 cautum, ut prædictas ob causas ipsi tantum do-
 natori liceret agere; si in silentio decessisset dona-
 tor, heredibus actio non competeret. Licet au-
 tem prohibuerit Justinianus, ne aliæ donationis
 rescindendæ causæ allegari possent; passim ta-
 men contra ejus mentem alias quoque causas pas-
 sim admittunt interpretes superioribus majores, aut
 pares. Id quibusdam saltem in causis æquitatem
 habet. Ita sane æquum videri debet, ut dona-
 tio revocetur, si in rebus angustis alimenta do-
 natarius donatori neget. Conf. Struv. ad *pandect.
 exercit. 40. tit. 15.* Sed & communis fere prag-
 maticorum sententia est, ob supervenientiam li-
 berorum donationes revocari posse. Ad eam ve-
 ro sententiam confirmandam passim utuntur *l. 8.
 C. de revocand. donat.* Licet autem lex isthæc de
 donatione tantum loquatur a patrono liberto fa-
 cta, æquitas fori tamen ad donationes omnes eam
 extendit. Id in foro fortasse receptum ex juris
 Longobardici regulis. Nam jus Longobardicum la-
 te olim in Regno Neapolitano servatum ob super-
 venientiam liberorum donationes rescindi jubet in
Longobard. libr. 2. tit. 14. l. 14.

X. Aliud donationum inter vivos genus enarrat
 Tri-

Tribonianus §. 3. *h. r.* idque ob dotis potissimum securitatem olim invaluit. Donatio isthæc *ante nuptias* ab initio dicta fuit, quippe quam ante initum matrimonium fieri oportebat. Enimvero ejusmodi donationem, constante etiam matrimonio, fieri concessit Justinianus: proinde eam *donationem propter nuptias* appellari jussit *d. §. 3. h. r.* Verum & donationis propter nuptias apud nos hodie nullus est usus, & de ejus apud Romanos origine, causis, effectibus latius edisserui *in jur. Regn. libr. 2. tit. 7.* Actum igitur hic non agam. Cum tamen & donationes sponsalitiæ frequentissimi sint usus in Regno, eamque jurisprudentiæ partem in institutionibus Tribonianus omiserit, de eo potius argumento hic pauca delibabimus.

XI. Donationes sponsalitiæ inter sponfos ante nuptias fieri solitæ senatusconsulto de prohibitis donationibus inter conjuges non vetabantur *l. 27. ff. de donat. int. vir. & uxor.* Ejusmodi vero donationes & puræ ab initio videbantur olim, & a reliquis donationibus inter vivos non differebant. Hinc, ne si repudio quidem sponsalia soluta forent, a sponfis repeti res donatæ poterant, modo ne sub futurarum nuptiarum conditione expressim donatum esset *l. 1. §. 1. ff. de donat.* Ita ea de re receptum jus Romæ fuit ad Constantinum usque. Enimvero cum sponforum liberalitas ex affectu erga futurum conjugem plerumque proficisci soleat, donationibus sponsalitiis Constantinus futurarum nuptiarum tacitam conditionem inesse jussit *l. 15. C. de donat. ant. nupt.* Ita donationes sponsalitiæ Constantinus ceteris donationibus æquavit, quæ sub conditione fiunt. Quod ad earum vero rescissionem

Con-

Constantino placuit, ut si per eum, qui donationem accepisset, nuptiæ sequutæ non essent, rerum donatarum condictio donatori competeret. Sin facto donantis sponsalia soluta forent, non solum res donatas ab eo condici vetuit, sed & earum exactiorem donatarium habere jussit, si post promissionem traditæ fortasse non essent *d. l. 15. C. eod.* At vero uter sponsus voluntatem mutasset, non mutationis causam Constantinus spectari jussit. Id sapienter ab eo cautum, ut sponsaliorum sanctitas religiosius servaretur. Ea in re igitur sponsus audiri non debet, licet suspectos sponsæ mores arguere velit. Serum enim videri queat, accusare mores, qui solemni sponsaliorum repromissione approbati videntur, si de crimine agatur, quod ante sponsalia fuerit admissum. Conf. Jacob. Gothofr. ad *l. 2. C. Theodos. de sponsal.*



T I T U L U S VIII.

Quibus alienare licet, vel non.

Ipsa naturalis æquitas suadet, ratam haberi voluntatem ejus, qui rem suam alteri ea mente tradit, ut statim accipientis fiat. Cum tamen in res singulorum dominium eminens summo Imperanti competat, secundum ipsius leges dominiorum translationes expediri debent. Si igitur jus publicum impedimento fuerit, ne domini voluntate quidem rerum dominia transferri poterunt. Inde fit, ut, inspecto jure civili, aliquando dominus alienare nequeat; contra aliquando non dominus recte quidem alienet *princ. h.t.* Ejusmodi argumentum, quod paradoxum videri queat, hoc titulo Tribonianus exequitur. At vero hoc potissimum institutionum loco de prohibitione alienationis differi oportebat. Id autem edico, prædico, ne me quisquam calumnietur, si in præsentī titulo tantisper a vestigiis Triboniani recessero.

II. Primum omnium prohiberi potest rerum alienatio auctoritate vel publica, vel privata. Prohibetur alienatio auctoritate publica, si ab ipsa lege vetita ea fuerit: prohibetur auctoritate privata, si testamento, vel contrahentium conventionē ea sit interdicta. Quod ad primum igitur, ab ipsa lege prohiberi solet alienatio vel ipsarum rerum respectu, vel personarum intuitu. Rerum ipsarum respectu alienari jus civile vetat sacra, sancta, religiosa, publica, litigiosa: prætereo id

genus alia, de quibus aut supra actum, aut infra agetur. Ad præsens autem argumentum dotale prædium potissimum Tribonianus refert. Id enim maritum licet dominum per legem Juliam alienare non posse scribit *princ. h. t.* Pridem tamen ostendi *in jur. Regn. libr. 4. tit. 5. §. 8.* jure Justiniani novissimo dotalia prædia in dominio uxoris esse. Perperam igitur Tribonianus novi juris oblitus dominium fundi dotalis viris asseruit *loc. cit.*

III. Lex autem Julia a Triboniano memorata *princ. h. t.* est lex Julia de adulteriis, ut ex Paulo constat *recept. sent. 21. 2.* Eandem ab Augusto latam ostendit Brissonius libro singulari ad *leg. Jul. de adult.* Ea lege cautum, ne viri, invita uxore, dotale prædium alienare possent: idem vero obligare sunt vetiti, quamvis consentiret uxor *l. 4. ff. de fund. dot.* Ut salva igitur dqs uxori foret, id potissimum lex fieri vetuit, quod facilius mulier concessura esset. Exemplis scilicet comperitum erat, vix induci mulieres, ut dotale prædium omnino venderent; in eo tamen obligando se præstare faciliores sibi persuadentes, res obligatas mox lui posse. Enimvero ne quid usquam periculi mulieri foret, a viris dotale prædium & alienari, & obligari vetuit Justinianus, seu consentirent, seu dissentirent uxores. Cum vero lex Julia ad fundum dotalem tantum Italicum pertineret, ejusque præscripto maritus dotale prædium provinciale alienare posset; ad fundos etiam provinciales legem Juliam extendi jussit Justinianus *d. princ. h. t. & l. unic. §. 15. C. de rei uxor. action.* At qui factum inquires, ut lege Julia prædia tantum Italica prohiberentur alienare viri, neutiquam vero provincialia? Id ita cautum

tum ego crediderim ob Italici prædii singulare pretium, & ingentiolem jacturam, quam ob ejus alienationem subiisset uxor. Nam, quales erant divitiarum temporum, damnum provincialis prædii levius videbatur Augusto, neque legis providentia dignum. Sed videamus, quæ tandem alienationes non rerum quidem, sed personarum intuitu prohibeantur.

IV. Ipsarum personarum intuitu non solum alienare nequeunt minores, & impuberes §. 2. *h. t.* C. l. 3. C. de restit. in integr. sed & bonis interdicti prodigi, ac filii familias respectu bonorum, quorum usufructus parenti quaritur l. 4. ff. de reg. jur. C. l. ult. §. 5. C. de bon. quæ liber. Enimvero curatorum consensu minores, tutorum auctoritate pupilli alienare non prohibentur, modo ne de rebus agatur, quorum alienatio sine decreto magistratus est interdicta. Sine magistratus decreto rustica tantum prædia alienari vetabantur olim. Eadem solemnitate tamen Constantinus alienari jussit non solum urbana prædia, sed res etiam mobiles pretiosas, & quæ servando servari possent l. 22. C. de administr. tut. Hinc, si res ejusmodi fuerint, earum in Regno hodie non consistet alienatio, nisi causa cognita decretum interponatur, *expedire pupillo alienationem injuri* de Ros. in civil. decret. prax. c. 7. n. 57. C. sequ. Cum vero sine tutoris auctoritate pupilli res suas alienare nequeant, recte inde Tribonianus infert, a pupillo pecunia data mutuo sine tutoris auctoritate, nummos accipientis non fieri d. §. 2. h. r.

V. Auctoritate privata prohibita censetur alienatio, si vel conventionem contrahentium, vel testatoris jussu vetita ea fuerit. Utrovis modo pri-

vatim prohibita fuerit alienatio, post contrahentium, aut testatoris obitum, prohibitio isthæc res ipsas afficiet, easque perpetuo comitatur. Proinde si adversus defuncti, aut contrahentium voluntatem res alienari prohibitæ alienatæ fuerint, perpetua earum vindictio ei competet, in cujus gratiam alienatio sit interdicta. Apertus in eam sententiam est Papiniani locus *in l. 59. §. 3. ff. de legat. 2.* Verum opportunum hic fuerit advertere, non qualemqualem alienationis prohibitionem fideicommissum inducere. Ejusmodi prohibitio fideicommissum tandem inducet, si in alicujus personæ, aut familiæ gratiam vetetur alienatio. Si id factum non fuerit, alienationis prohibitio nudum consilium, aut præceptum exitu inutile, non fideicommissum censendum erit. Ea enim in specie nemo jus agendi nanciscitur. Audi ea de re Marcianum *in l. 114. §. 14. ff. de legat. 1. Divi Severus, & Antoninus rescripserunt, eos, qui testamento vetant quid alienari, nec causam expriment, propter quam id fieri velint, nisi invenitur persona, cujus respectu hoc a testatore dispositum est, nullius esse momenti scripturam, quasi nudum præceptum reliquerint.* Nunc breviter subnectamus, quinam non domini recte tamen alienent.

VI. Ex regulis igitur Romani juris quædam quoque personæ dominio quidem carentes recte tamen alienant. Ita sane curatores, aut tutores res minorum, aut impuberum recte vendunt *l. 109. ff. de verb. signif.* Creditores etiam, licet pignoris dominio careant, illud tamen alienare non prohibentur *§. 1. h. t.* Id æquitas ipsa suavit. Si enim facultas isthæc denegata creditori fuisset, nullum

ex

ex pignore commodum in eum redire posset. Nam moras usque neciendo debitor numquam ære alieno se liberaret. Quamvis autem non convenerint contrahentes, ut vendi possit a creditore pignus, post moram debitoris tamen adhuc id vendi potest. Ea tamen in specie una saltem denunciatio fieri debitori debet *l. 4. C. de distract. pignor.* Quin, jure pandectarum inspecto, licet ab initio diserte placuerit, ne pignus vendi jus sit, id etiam vendi a creditore poterit, modo id debitori ter denunciatur *l. 4. ff. de pignor. action.* Verum de pignoris distractione constitutionem suam Justinianus servari voluit *in l. 3. C. de jur. domin. impetr.* In ea Imperator primum observari jussit, quæ de pignoris venditione pacti contrahentes forent. Si ea de re nihil ab initio conventum esset, altero post denunciationem anno alienandi pignoris facultatem creditorem habere voluit. Si emptor non inveniretur, certum tempus luendo pignori per judicem præstitui debitori jussit. Si intra id tempus non lueretur a debitore pignus, creditorem a Principe impetrare voluit facultatem possidendi pro domino. Sed & ea facultate concessa per Principem, debitori adhuc indulgit, ut intra alterum biennium pignus luere posset. Verum post biennium quoque debitore cessante, justum pignoris dominum creditorem haberi jussit. Ea tamen in specie si debitum excederet pignoris pretium, actionem ad debitam quantitatem usque creditori dedit. Pignus igitur non tantum sub hasta vendi, sed & adjudicari creditori potest. Quid autem intersit inter pignoris adjudicationem, ejusque sub hasta venditionem, exposui *in jur. Regn. libr. 4. tit. 3. §. 5.*

TITULUS IX.

Per quas personas cuique acquiritur.

CUM possit alter alterius instrumentum esse, jus quidem Gentium impedimento non est, quominus per alterum alteri dominium, aut obligatio acquiratur. Nam & ex alterius pacto petendi jus alteri deferri potest, & fides, cuicumque promissa fuerit, exolvi debet. Inde factum, ut Respublicæ, & Civitates, quæ inter se solo Gentium jure reguntur, ratas haberi jubeant conventiones, quas alii pro aliis ineunt. Ejusmodi autem pacta in foederibus haud infrequenter occurrunt. Mirum igitur videri non debet, si apud Civitates hodie non paucas pacta per alios in aliorum utilitatem inita servari jubeantur. Conf. Hert. ad *Pufendorf. de jur. Natur. & Gent.* 3. 9. 5. Enimvero ab ea Gentium simplicitate recesserunt Romani veteres. Nam seu ut frequentiores lites præciderentur, seu ut rerum suarum accuratius quisque satageret, neque dominium, neque obligationem per alterum alteri voluerunt acquiri. Ita secundum veteris juris subtilitatem ne per procuratoris quidem operam quidpiam olim acquiri poterat. Is tamen veteris juris rigor contractibus expediendis impedimento erat. Ita paulatim iurisperiti eo rem perduxerunt, ut saltem per procuratores acquiri posset. Vide doctores ad §. 6. *h. r.*

.II. Ex dictis hætenus aperte liquet, ex regulis Romani juris, si a procuratore discesseris, aliis
per

per alios acquiri non posse §. 6. *h. t.* Tantum ob potestatem maritalem, patriam, dominicam, quicquid nanciscebantur uxores, filii, servi, jure veteri ipsis patribusfamilias sine discrimine acquirebatur §. 1. *U. 3. U. d. §. 6. h. t.* Et quod ad servos quidem, ii jure quoque novissimo nolentibus etiam, & invitis dominis generatim acquirunt *d. §. 3. h. t.* Solam hereditatem domino per servum acquiri non placuit, nisi eam servus jussu domini adiret. Cum enim æri alieno, & ceteris oneribus hereditariis obstringatur heres, periculum erat, ne libera aditione servi deterior domini conditio fieret *d. §. 3. h. t.* Enimvero quod ad uxores, filiosque familias, jus novum a veteri longe distat. Uxores enim, ex quo exolvere nuptiæ per conventionem in manum, viris desierunt acquirere. Tantum in re dubia, si quid possideat mulier, id ex mariti rebus provenisse præsumi debet. Id ita placuit, ut in mulieribus turpis quæstus suspicio vitari posset *l. 51. ff. de donat. int. vir. U. uxor.* Filii quoque familias, ex quo Rempubicam invadere Principes, non omnia quidem parentibus, sed & plura sibi cœperunt acquirere. Hodie igitur pro peculiorum diversitate filii familias quædam parentibus, quædam acquirunt & sibi. Proinde ut intelligatur, quæ parentibus, quæ sibi filii familias acquirant jure novissimo, peculiorum diversitas paucis est prænarranda.

III. Primum omnium peculium definitur ab Ulpiano, *quod jussu parentis, aut legis filiosfamilias conceditur a paternis rationibus separatim, eo deducto tamen, quod ipsi parenti debetur l. 5. §. 3. ff. de pecul.* Ibidem illud ita dictum jurisconsultus existimat, quasi *pusillum patrimonium*. Ea ta-

men originatione Stoicam sapit allusionem. Nam ex Grammaticæ regulis peculium potius ita dictum videtur, quasi *pusillum pecudum*. A vero enim haud abludit; parentes olim ad liberorum industriam excitandam cuique filio pusillam gregis partem separatim curandam dare solitos. Ita enim inter juvenilem æmulationem, & studium promerendæ paternæ laudis parentum commodis filii diligentius inservituri erant. Unde unde autem sit origo vocabulo, peculium filiorum olim unius generis erat, nec a servili diversum *princ. instit. quib. non est permiff. facer. testam.* Enimvero, delato ad Principes rerum arbitrio, ut in aliis plerisque capitibus patria potestas imminuta fuit, ita & jus acquirendi per liberos tantum non omnino parentibus fuit ademptum. Paulatim autem eo deventum, ut quadruplex peculii genus distingueretur. Aliud *castrense*, aliud *quasi castrense*, aliud *adventitium*, aliud *profectitium* dici solet. Ex iis jure novissimo solum profectitium in arbitrio parentum est; reliqua pertinent ad filiosfamilias. Juvabit igitur singulorum peculiorum incunabula aperire, & eorum jus enarrare.

IV. Inter diversa peculiorum genera, quæ in filiorum dominio sunt, castrense est vetustissimum. Ejus enim initia ab ipso fortasse dictatore Cæsare sunt repetenda. Sub ejus ætate scilicet segnius pro Republica depugnabant adolescentes. Exinde enim frequentiora ad internecionem civium; quam ad proferendos imperii fines fuere bella. Proinde ut signa tirones lubentius sequerentur, peculium castrense Julius Cæsar excogitavit. Quocumque sub Principe hoc peculium fuerit inventum, exploratum est illud, a Neronis ævo id certi juris fuisse.

se. Ea enim de re aperte testatur Juvenalis æqualis Neroni scriptor *sat. ult. vers. 51.* Id autem peculii genus adeo proprium filiorum est, ut in eo patrisfamilias jure censeantur. De eo igitur non solum contractibus inter vivos, sed & testamento libere statuere possunt §. 6. *de testam. milit.* Ejusmodi porro erat, quicquid ob militiam filiosfamilias donatum esset, & quod in militia is quævivisset, modo ipsius militiæ occasione quæsitum esset. Nam quod etiam sine militia filiusfamilias acquisiturus fuisset, castrense peculium non censebatur *l. 11. de castr. pecul.*

V. Sat antiqui etiam instituti est peculium quasi castrense, ejusque mentio in ipsis pandectis haud infrequens. Id autem peculii genus fuit inventum, ut ad liberales artes acrius inflammarentur adolescentēs. Eo vero peculio continetur, quicquid togata militia filiosfamilias nacti fuerint seu patrocínio causarum, seu scientiarum professione, seu publicorum munerum emolumentis. Et jure quidem Antejustiniano inter castrense, & quasi castrense peculium latissimum discrimen erat. Nam ante Justinianum filiosfamilias de castrensi peculio pro arbitrio statuere poterant seu contractibus, seu testamento quoque. Verum quod ad peculium quasi castrense, ejus plena proprietas, ac libera quidem administratio tantum inter vivos ad filiosfamilias pertinebat; de eo testari non poterant, nisi in eminentiori dignitatis gradu constituti forent §. 6. *instit. de milit. testam.* Enimvero liberalior more suo Justinianus filiosfamilias de peculio quoque quasi castrensi liberam testamenti factionem concessit *l. 37. C. de inoffic. test.* Ab eodem Justiniano cautum, ut filii testamentum de peculio
quasi

quasi castrensi scriptum inofficiosi querela oppugnari non posset. Id ipsum tamen intellige, si per emancipationem patria potestas resoluta non fuerit. Ubi enim emancipatus est filius, ejus peculium statim evadit patrimonium; cum reliquo vero patrimonio peculio quoque quasi castrensi confuso, ejus testamentum inofficiosi querelæ suberit *d. l. 37. §. 1. & 2. C. cod.* Sed & in foro hodie testamentum filii de peculio quasi castrensi querelæ subesse creditur seu ob *novell. 115. c. 4.* seu potius ob glossæ auctoritatem ad *d. l. 37. C. de inoffic. testam.*

VI. Atque hæc una peculia veteres quidem Imperatores filiis familias concesserunt. Si quid præter castrense, aut quasi castrense peculium filiis acquisitum esset, id sine discrimine parentibus acquirebatur. Enimvero sub Christianis Principibus tertium peculii genus paulatim evaluit: id *adventitium* doctores appellant, ejusque saltem proprietatem ad filios pertinere placuit. Primo scilicet iniquum Constantino visum, patri acquiri bona liberorum materna; iniquius adhuc in ejusmodi bonis ipsos extraneos a patre filiis præferri posse. Ne quid igitur tale contingeret, is bonorum maternorum proprietatem ad filios pertinere jussit; eorum tantum usumfructum patri reliquit *l. 1. C. Theodos. de bon. matern.* Atque id unum peculii adventitii genus ab initio fuit inventum. Ulterius tamen processerunt juniores Principes. Primo enim Gratianus, Valentinianus, ac Theodosius, quod de bonis maternis cautum a Constantino fuit, ad bona generatim omnia materni generis extenderunt *l. 7. C. Theodos. cod.* Mox eodem quoque privilegio censerī placuit, quæ seu a conjugibus, seu sponſis

Per quas personas cuique acquiritur. 107

sponsis donata forent conjugibus, aut sponsis in potestate positis *l. 1. C. de bon. quæ liber.* Sed ea in re Justinianus omnem egressus est modum. Is enim bonorum generatim omnium, quæ a patre in filiosfamilias profecta non forent, tantum usumfructum parentibus deferri iussit, ipsis liberis proprietatem addixit *l. 6. C. eod.* Illud etiam de peculio adventitio contra jus vetus constitutum a Justiniano fuit, ut, emancipato filio, dimidium ususfructus adventitiorum omnium pertineret ad patrem. Olim enim filium pater emancipans ipsam proprietatem tertiæ partis adventitiorum retinere poterat *l. 6. §. 3. C. de bon. quæ liber.*

VII. At vero jure novissimo duplex peculium adventitium distingui debet: alterum *ordinarium*, seu *minus plenum*; alterum *extraordinarium*, seu *plenum* a doctoribus appellari solet. Peculium adventitium ordinarium est, cujus ex regulis juris ordinarii proprietates pertinet ad liberos, ususfructus pertinet ad parentes. Peculium adventitium extraordinarium dicitur, cujus & proprietates, & ususfructus est penes liberos. Jure autem Romano novissimo compluribus quidem in casibus peculii adventitii proprietates una cum ususfructu liberis deferri jubetur. Primo enim eo jure censi placuit res filiisfamilias a Principe, vel ab Augusta donatas *l. 7. C. de bon. quæ liber.* & hereditates renuente patre a liberis aditas *l. 8. princ. C. eod.* Deinde eodem quoque jure censentur res filiisfamilias relictæ, aut donatæ ea sub lege, ne ususfructus ad patrem pertineat *novell. 117. c. 1.* hereditates etiam, ad quas una cum parentibus filiisfamilias admittuntur *novell. 118. c. 2.* Ipsorum denique parentum bona, quæ liberis deferri iussit Justinianus, si pa-

si parentes diverterent ex causis in jure non desinitis *novell. 134. c. 11.*

VIII. Ex dictis hætenus aperte liquet, hodie in solum peculium profectitium jus vetus parenti competere. In peculio autem profectitio continetur, quicquid aut ab ipso patre, aut ab aliis patris intuitu in filiosfamilias collatum fuerit §. 1. *instit. h. t.* Ejus igitur patre vivo sola administratio ad liberos pertinet; id ipsum, parente mortuo, ut reliquæ res hereditariæ, ceteris fratribus in potestate retentis conferendum erit *l. 12. C. de collat. C. l. 6. C. de bon. quæ liber.* Ex peculio tamen profectitio illud emolumentum manat in filium, quod, nisi diserte ademptum in emancipatione fuerit, emancipatum tacite sequitur *l. 31. §. 2. ff. de donat.* Patris etiam publicatis bonis, filio separari debet, nec fisco desertur *l. 3. §. 4. ff. de minor.*

T I T U L U S X.

De testamentis ordinandis.

AD singulares acquirendi modos legata quoque, & singularia fideicommissa pertinent. Proinde ut materia de singularibus acquirendi modis absolveretur, ratio ordinis postulare videbatur, ut de legatis, & fideicommissis singularibus sermonem hic institueret Tribonianus. Cum tamen legata, & fideicommissa ex hereditate præstari soleant; hereditas autem universalis sit acquirendi modus; ad universales acquirendi modos orationem convertit
Tri.

Tribonianus in §. 7. per quas person. cuiqu. acquir. Hereditatis enim argumento præmisso, legatorum, ac fideicommissorum ambages facilius intelligi posse videbantur. Universales acquirendi modi complures sunt. Inter eos frequentioris est usus hereditas. Hereditas autem deferri vel testamento, vel ab intestato potest. Testatoris in testamento voluntas legibus derogat de intestatorum hereditate latis: heres igitur testamentarius legitimo præferri debet. Hinc in eo per universitatem acquirendi modo enucleando Tribonianus primum exponit hereditatem testamento deferri solitam. Ut autem testamentariæ hereditatis argumentum adolescentes facilius intelligerent, primum omnium de testamentis ordinandis sermonem instituit. Ordinari scilicet testamenta dicuntur, si in iis solemnia adhibeantur in jure præscripta l. 2. C. de codicill. Ex testamentis autem non rite ordinatis hereditas vindicari nequit. Antequam tamen testamentarias leges exhibeamus, opportunum fuerit inquirere, utrum ex Gentium, an civili jure testamenta, ac successiones testamentariæ promanarint.

II. Veteres interpretes fere omnes passim asserunt, testamentum, & ex eo successionem ex jure Gentium promanasse. Verum ex jure Gentium sine possessione dominium retineri non potest, &, amissa possessione, dominium statim extinguitur. Vide *libr. 1. tit. 1. §. 3. & sequ.* Inspecto igitur jure Gentium, & possessio in persona defuncti cum fato mortalitatis extinguitur, & defunctus rerum suarum dominium porro non retinet. Per testamentum diu post testatoris obitum in heredem rerum hereditariarum dominium transmittitur. Facile igitur inde liquet, neque testamen-
tum,

tum, neque successionem testamentariam ex jure Gentium recte repeti. Quapropter rectius fortasse constituemus, testamentum, & ex eo successionem ex jure civili deducenda esse. Sane si jus aliquod ex jure Gentium per testamentum in heredem transire posset, id in ipsum transferri oporteret aut vivo testatore, aut eo jam mortuo. Illud absurdum est fingi, cum se vivo testator jus aliquod in heredem transferri nolit. Hoc jus Gentium fieri vetat: testator enim extrema necessitate defunctus jus in alios transferre nequit, quod ipsemet per mortem amiserit. Vide tota de re Bynkershoek. *observat.* 2. 2.

III. Hæc serio Grotius fortasse reputans non alia ratione censuit, testamentum cum jure Gentium conciliari posse, quam ei vocabulo tribuendo significationem prorsus absurdam, & a communi diversam *de jur. bell. & pac.* 2. 6. 14. Ibi enim testamenti vocabulo intellexit alienationem in mortis eventum, retenta per testatorem interim suarum rerum possessione, ac plenissimo fruendi jure. Leibnitius etiam non aliter credidit, testamentum ex jure Gentium sustineri posse, quam per animorum immortalitatem testatores rerum suarum dominos fingendo post mortem; heredes vero tamquam testatoris procuratores in rem suam. Ipsi jurisconsulti veteres testamentum juri Gentium contrarium censuerunt, idque ex jure civili unice repetendum existimarunt. Ut autem, salvo jure Gentium hereditas ab heredibus videretur acquiri, complures ea in re fictiones excogitarunt. Nam & momentum testamenti conditi cum momento mortis conjungi oportere docuerunt, & momentum aditionis cum momento mortis. Eas ve-

ro fictiones invenerunt jurisconsulti, ut commodè fingi posset, eodem momento mortis testatorem heredi sua bona tradere, neque contra jus Gentium ea per aditionem tandem acquiri. Sed, his omisissis, videamus, quæ vetustissima apud Romanos testamenta fuerint, & quibus solemnibus jure novissimo eadem ordinari debeant.

IV. Vetustissimis rei Romanæ temporibus duo testamentorum genera obtinuerunt, alterum in pace, alterum a militibus prodituris ad prælium fieri solitum §. 1. *inst. h. r.* Quod ad testamentum, quod in pace fiebat, id in calatis populi comitiis fieri oportebat, tamquam si jubenda lex foret. Hinc & solemnia rogationis verba adhibebantur in legibus ferendis adhiberi solita: *velitis, jubetis, Quirites, ut L. Valerius L. Titio tam jure, legeque heres sibi fiet, quam si ejus filius esset.* Comitiorum solemnitas eo pertinebat, ne, si extra familiam avita sua prædia testator legare vellet, id contra jus publicum, & legem Romuli fieri videretur. Scilicet ex lege Romuli prædia penes familias suas perpetuo esse jubebantur. Sane scribit Varro, bina jugera viritim divisisse Romulum, eaque ad proximiores heredes necessario deferri jussisse *de re rustic. libr. 1.* Cum igitur jus publicum privatorum arbitrio mutari non posset, inutile futurum erat, si quid secus de prædiis statuisset domestico suo testamento testator. Proinde, ut testatores de rebus suis pro lubitu statuere possent, per populi comitia testamentum firmari placuit. Nam, per populum testamento firmato, nova veluti lege, quæ veteri derogaret, familiæ proximis prædia adimi videbantur. Ita heredi in populi comitiis nuncupato potius ipsius populi jussu,

fu, quam testatoris arbitrio deferri fingeatur hereditas. Haud absimiles fuerunt jurisconsultorum artes ad sustinenda testamenta militum, quæ in procinctu fieri dicebantur. Nimirum ejusmodi testamenta in cinctu Gabino fiebant. Eo sumpto milites statim prodibant ad prælium, & pro incolumitate Reipublicæ devoti Diis manibus censebantur. Proinde docuerunt jurisconsulti, ratam haberi oportere extremam voluntatem eorum, qui pro publico arcendo periculo se devovissent Liv. 10. 28.

V. Jam vero uterque testandi ritus non diu apud Romanos obtinuit. Nam testamenta quidem in procinctu ante Ciceronis ævum exoleverunt, ut ipse testatur *de natur. Deor.* 2. 3. Citius etiam exoleverunt testamenta in comitiis fieri solita. Scilicet per leges duodecim tabularum libera testamenti factio patrifamilias concessa fuerat. Quis igitur sani capitis voluntatem suam a populi suffragiis pendere voluisset, cum privatim domi pro lubitu testari posset? Per leges autem duodecim tabularum aliud testamenti genus est introductum, idque ob solemnia mancipationis adhibita testamentum *per æs, & libram* est appellatum. In eo, scriptis a testatore tabulis, præsentibus aderant hereditatis emptor, antestatus, libripens, testes denique rogati quinque: iis præsentibus, emptori heredem repræsentanti mancipari, seu vendi fingeatur hereditas. His rite peractis, a testatore veluti voluntatem confirmante suam, ita nuncupatio testamenti fiebat: *hæc uti in his tabulis, cerisque scripta sunt, ita do, ita lego, ita testor; itaque vos Quirites testimonium præbitore.* Hæc omnia constant ex Ulpiani fragmentis *tit.* 20.

VI. Porro hoc quoque testamenti genus a jurisconsultis fuisse videtur inventum, ut patresfamilias jus publicum impune ludificari possent. Nimirum libera quidem testandi facultas per duodecim tabulas concessa fuerat; ea facultate tamen ita testator videbatur uti oportere, ne contra vetustissimam Romuli legem prædia extra familiam testamento suo transferret. Ut igitur pro lubitu de rebus suis testator statuere posset, fabulam ita instruxerunt jurisconsulti, ut hereditatis emptori non legari quidem, sed vendi videretur hereditas. Ea de causa in hoc testamento mancipatio locum invenit. Cetera ejusdem testamenti solemnities eo collineabant, ut non privata, sed publica auctoritate viderentur in heredem bona transferri. Nam quinque testes quinque potiores populi classes designabant; nuncupatio vero testamenti veterem populi rogationem significabat. Conf. Bynkersh. *observat. libr. 2. c. 2.* Fatum autem testamenti per æs, & libram fuit sat diuturnum. Sane id in usu ætate sua fuisse testatur Ulpianus *fragm. tit. 20. §. 2.* Hinc recte fortasse Gothofredus edixit, sub Theodosio Juniore tandem ejusmodi testamentum exolevisse ad *l. 1. C. Theod. de testam. & codicill.*

VII. At vero ob tot in testamento per æs, & libram solemnitates suprema civium judicia facillime periclitari poterant. Proinde ex Prætoris edicto aliud testamenti genus evaluit. Naturalem enim simplicitatem sequutus edicto Prætor non hereditatem quidem, sed bonorum possessionem se daturum promisit ex testamento, quod septem testium signis obsignatum esset Ulpian. *fragm. tit. 23. §. 6. & §. 2. h. r.* Inventum autem a

Prætoris testamentum vetustissimum Romæ fuit, & ante Ciceronis ævum usurpabatur 1. *in Verz.* 45. Id ipsum simplicitate sua celeberrimo in usu erat. Cum tamen destitueretur auctoritate legum, sæpiusculè inutile evadebat, si jure civili alius in hereditate præferri juberetur Ulpian. *d. tit. 23. §. 6.* Cum igitur testamentum per æs, & libram scrupulosis subtilitatibus prægravaretur; Prætorium vero non semper jus certum in heredem transmitteret; posterior ætas aliud testamenti genus excogitavit. Ex Theodosii autem junioris ævo ex testamenti scripto paragi solitis hoc unice testamentum adhiberi placuit *l. 21. C. de testam.* Id ipsum in Regno frequentissimi est usus hodie. Juvabit igitur ejus originem, & solemnia hic exhibere.

VIII. Testamentum, de quo acturi sumus, ipsis moribus ab initiis suis receptum videtur: ab ipsius autem Constantini ætate ejus frequentissimus usus erat, ut constat ex *l. 1. C. Theod. de testam. & codicill.* Primus Theodosius junior, abrogato testamento per æs, & libram, eo tantum modo testari jussit, qui per scripturam testari vellent *l. 21. C. de testam.* Porro ex ea Theodosii constitutione ut ratum sit ejusmodi testamentum, eo jam scripto, coram septem testibus speciatim rogatis judicii sui contestationem debet testator uno contextu peragere; ab ipsis autem testibus testamenti tabulæ subscribendæ sunt, & signandæ: ipse quoque testator, ejusve nomine testis octavus subscribere testamento debet. Ea subscriptio tantum in testamento *ὁλογραφω*, quod scilicet ab ipso testatore scribitur, omitti potest ex Justiniani constitutione *in l. 1. C. eod.* Hoc testamentum, quatenus scripturam desiderat, *scriptum* dici solet; quatenus

nus ignoratur heres in eo scriptus, *myſticum* appellatur. Vocatur & *mixtum*, quia quædam ex jure civili veteri, quædam ex edicto Prætoris, ex Principum denique constitutionibus quædam agnoſcit. Conf. doctores ad §. 3. *h. t.* Nunc de testamento ſine ſcriptura fieri ſolito pauca ſubnectamus.

IX. Aliud apud nos hodie obtinet teſtamenti genus, quo coram ſeptem teſtibus ſpeciatiſſime rogatis voce, & propalam nuncupatur heres. Id ſi factum fuerit, *perfectiſſimum* teſtamentum appellat Tribonianus §. 14. *h. t.* Hoc teſtamentum, quod paſſim ob nudam heredis nuncupationem *nuncupativum* appellant, iſtis moribus apud Romanos invaluit, & vetuſtiſſimum Romæ fuit. Ut enim omittam alia, auctor vitæ Horatii ſcribit, eum decedentem heredem Auguſtum palam nuncupariſſe. Mores ita receptos lege firmarunt Theodoſius, & Valentinianus in l. 21. §. 2. *C. de teſtam.* Hoc teſtamentum frequentiſſimi eſt uſus in Regno hodie, & *apertum* dictitari ſolet, quia in eo heres propalam nuncupatur. Ejuſmodi autem teſtamentum, ne qua controverſia ei fiat, notariſſimorum opera in ſcripturam plerumque redigitur: id tamen ſi factum fuerit, nuncupativum eſſe non deſinit. In eo palam & voce heredem nuncupandum edicit Ulpianus in l. 21. *princ. qui teſtam. facer. poſſ.* Paſſim tamen recepti mores per relationem etiam ad certam ſchedulam heredem demonſtrari ſiunt. Id ita invaluit argumento ſortasſe deſumpto ex l. 77. *ff. de hered. inſtit.* Hinc teſtamentum ita conditum *relativum* doctores appellant. Vid. Schilter *exercit.* 38. §. 43.

X. At vero apud Romanos olim executioni

testamenta statim demandabantur, si solemnia in jure præscripta in eis forent adhibita. Proinde si testamentum nullo manifesto vitio laboraret, ubi competenti judici oblatum id foret, rerum hereditariarum possessio heredi decernebatur. Si quis contradictor existeret, post possessionem heredi traditam causa contradictionis disceptabatur *l. 3. C. de edict. Div. Hadrian. toll.* Verum in Regno Neapolitano testamentum privatim a testatore conscriptum promptam exequutionem haud habet, licet in eo solemnia Romani juris fuerint adhibita. Testamentum ita scriptum exequutioni tandem mandabitur, ubi prævio termino, quem *summarius* vocant, de ejus veritate constiterit Marad. ad *singul.* 175. *n. 4.* Ut vero paratam exequutionem apud nos habeant testamenta, codicilli, & scripturæ generatim omnes, Regionum tabellionum auctoritate firmari debent *pragmat. 2. de contract.* Quo autem modo, atque intra quantum temporis a testatoris obitu aperiendæ sint testamenti tabulæ, latius edisserui in *jur. Regn. libr. 2. tit. 8. §. 2. & sequ.* His igitur omissis, de testium qualitate in re testamentaria videamus.

XI. Primum omnium adhibentur in testamento testes non nudæ probationis gratia, sed ut testamentum suas solemnitates habeat. Aliis enim in rebus ad nudam probationem testes vel duo sufficiunt *l. 12. ff. de testib.* Neque vero generatim omnes adesse possunt testamento testes. Justum in testamento testimonium dumtaxat eorum esse scribit Tribonianus, *cum quibus testamenti factio est §. 6. h. t.* Verum verba isthæc rem per se incertam incertiores faciunt. Neque enim Tribonianus exponit, qui tandem sint illi, quibuscum est

te-

testamenti factio. Ea in re verisimilior videri debet Ottonis sententia existimantis, testamenti factionem in prodicto Triboniani loco dici esse cum illis, qui comitiis olim interesse poterant ad *inst. h. t.* Si verum id fuerit, facile rationem reddes, cur mulier, impubes, furiosus, mutus, surdus, prodigus, atque intestabiles generatim omnes adesse testes in testamento nequeant. Hi enim omnes comitiis interesse non potuerunt, quamdiu in populi comitiis facta sunt testamenta. At vero testium conditio testamenti tempore unice spectari debet. Proinde si mortis, aut aditionis tempore deterior ea fiat, id quidem heredi non oberit *l. 22. §. 1. ff. qui testam. fac. poss.* Quin, occultum in teste vitium testamenti tempore testamentis obesse vetuere Principes, modo testis publice legitimus crederetur, cum ab eo testimonium dicebatur *§. 7. h. t.* Id ita placuit, ne testamenta sæpius infirmarentur, si detectum mox in teste vitium eis obesse posset. Hinc fortasse argumento petito respondit Ulpianus, infirmari non oportere, quæ servus fugitivus decreverit Præturam per fraudem adeptus, cum liber publice crederetur *l. 3. ff. de offic. Prætor.*

XII. Quod ad heredis testimonium, eorumve, qui ei potestatis vinculo conjuncti forent, pro testamentorum diversitate diversum jus fuerat olim. Quod ad testamentum Prætorium, in eo quidem heredes, aliosve eis potestate conjunctos testes adhiberi noluit edicto Prætor, ne domesticum testimonium cuicumque prodesset *l. 20. princip. ff. qui testam. facer. poss.* Secus erat in testamento civili per æs, & libram ordinari solito. In eo scilicet negotium testamentarium non cum herede ipso,

sed cum emptore familiæ geri fingebatur. Emptor familiæ, ut supra monuimus, heredem quidem designabat, heres tamen ipse non erat. Hinc familiæ emptor, eique potestate conjuncti testes advocari non poterant; contra neque heres, neque ei potestate conjuncti testes esse prohibebantur. In eo enim testamento plerumque ignorabatur heres. Conf. Bynkersh. *observat.* 8. 24. Proinde si nosset quispiam, sibi destinari hereditatem, is a dicendo testimonio se excusabat. Id ipsum tamen nudum consilium jurisconsultorum fuit, neque necessitatem habebat §. 10. *h. t.* At vero, ut supra vidimus, ab ipsa Theodosii junioris ætate testamentum per æs, & libram usurpari desiit. Exinde igitur heredes in testamento testes adhiberi sunt vetiti. Proinde falsus est Justinianus *in d.* §. 10. *h. t.* ubi prædicat, se primum heredis in testamento testimonium omnino prohibuisse. Ceterum heredis quidem testimonium necessario vetari oportebat, quia & universi juris successor erat, & diversus a testatore non censebatur. Enimvero cum legatarius, eive potestate conjuncti universi juris successores videri nequeant, ii testes adhiberi non prohibentur *d. l.* 20. *princ. ff. qui testam. facer. poss.*

XIII. Pro instituto hætenus testamentorum solemnia exequuti sumus. Nunc opportunum fuerit advertere, testamenta quædam non rite facta pro justis haberi placuisse. Primo enim si quis extremam voluntatem suam supplicis libello descripserit, eoque Principi oblato roget, ut in sacra scripta recipiatur, ubi factum id fuerit, ea contestatio voluntatis justî testamenti jure censebitur *l.* 19. *C. de testam.* Idem juris erit, si quis supremam voluntatem suam judici Civitatis, aut municipio

offe-

offerat, & in acta publica referri curet. Nam ea quidem scriptura licet testamenti solemnibus destituta, ut cetera monumenta publica, perpetuam firmitatem habet *d. l. 19. C. eod.* Rusticorum etiam testamentum procul a Civitatibus factum ratum haberi jussit Justinianus, licet imperfectum esset *l. 31. C. eod.* Ibi enim ab Imperatore cautum, ut si quo in loco septem testes inveniri non possent, exequutioni mandaretur rustici testamentum, si in eo quinque saltem testes forent adhibiti. Favore cognationis quoque posterius testamentum, in quo legitimi scripti fuerint heredes, priori licet perfecto derogat, modo de posteriori testamento deponant testes jurati quinque *l. 21. §. 3. C. eod.* Denique ob liberorum favorem in testamento parentis, in quo ipsi liberi instituti fuerint, nulla solemnitate est opus. Id tantum in eo requiritur, ut de parentis voluntate constet seu scriptura, si scriptum sit testamentum, seu per testes duos, si heredes voce sint nuncupati. At vero id privilegium liberis tantum prodesse potest. Quapropter si liberis admixti fuerint heredes extranei, eorum partes liberis jubentur accrescere *d. l. 21. §. 1.* Si hinc discedas, nullius effectus sunt testamenta reliqua, in quibus neglectæ fuerint solemnitates in jure præscriptæ. Cum igitur adeo momentosa sint testamenti solemnia, falsitatis poenam tabelliones subeunt, si ipsorum negligentia ea fuerint omissa *l. 29. C. eod.*

T I T U L U S X I.

De testamento militari.

Quæ de testamentis ordinandis exposuimus superiori titulo, ad paganorum tantum testamenta pertinent. Nam si miles jure militari testetur, sine testamenti vitio scrupulosas legum solemnitates negligere impune potest. Martiæ scilicet Civitatis intererat, cum militibus indulgentius agere, quos hostis, & sonitus armorum ingruens legum voces audire non sineret. Eam ob rem quidem testamentum in procinctu olim fuerat inventum. Ejusmodi tamen testamentum ante Ciceronis ætatem jam exoleverat. Proinde serio consultum oportuit, ne militiam Romani defugerent, si ob omissa in testamento solemnia supremum eorum arbitrium calumniam pati posset. Sub ipsius quidem principatus initia Julius Cæsar liberiores testamenti factionem militibus concessit; eam tamen concessionem temporalem fuisse narrat Ulpianus in *l. 1. princ. ff. de testam. milit.* Vetustiores etiam Principes militum in re testamentaria privilegium numquam perpetuum jusserunt esse. Primus Nerva, ejusque successor Trajanus privilegium militum, quod ad testamentorum solemnia, perpetuum esse jussit. Exinde igitur magistratibus in Provincias proficisci solitis mandari cœpit, ne in testando milites testamentorum solemnibus subjicerent; iidem testamenta facerent, quomodo possent, aut vellent *d. l. 1. princ. ff. de testam. mi.*

milit. Ita ex regulis Romani juris ut ratum sit militis testamentum, non aliud in eo requiritur, quam ut de militis voluntate constet *princ. instit. h. t.* Proinde si voce miles nuncuparit heredem, vel duo testes probationem voluntatis conficient: sin ab ipso milite scriptum sit testamentum, sine testibus ullis firmitatem habebit. Quin imo in testamento scribendo militi licebit uti pro atramento sanguine, ense pro stilo, clypeo, arena pro tabulis *l. 15. C. de testam. milit.*

II. Porro perperam Tribonianus militum privilegium in testando ab eorum imperitia repetit *princ. instit. h. t.* Sat enim constat, selectissimos cives olim militiam sequi solitos. Rectius igitur cum Ulpiano statueris, id militum privilegium suasisse ipsa belli pericula, quæ juris cogitationem plerumque adimunt *l. un. ff. de bonor. possess. ex testam. milit.* Ceterum ante Justinianum olim militibus jure militari testari licebat, ubicumque in æstivis, hybernisque agerent: igitur expeditionis angustiarum expectandarum non erant, ut fieret privilegio locus. Hinc Ulpianus ex sola persona militis militare testamentum æstimari jubet *fragm. tit. 23. §. 10.* Verum Justinianus militum privilegium tantum intra tempus expeditionis coercuit: si alibi testarentur milites, eorum testamenta secundum paganorum solemniam ordinari jussit *l. 17. C. de testam. milit.* Est autem expeditio neque ipsa pugna, neque intermedium belli tempus, sed spatium illud, quo milites procedunt in armis, seu invadant, seu expectent hostem.

III. Porro militum favori concedi placuit, ut in testamento suo aliis quoque privilegiis uti possent. Ita sane contra juris regulas cum pluribus

testamentis miles obire potest *l. 19. ff. de testam. milit.* Si testamento etiam miles aliquem scribat heredem, mox eodem testamento eundem jubeat exheredem esse, ei adimetur hereditas. Nam in pagani testamento sola heredis exheredatione in eodem testamento facta hereditas non potest adimi *l. 17. §. 2. ff. eod.* Præterea partim testato, partim intestato militi obire licet, ejusve testamentum inofficiosi querela rescindi nequit *l. 19. princip. ff. eod. & l. 27. §. 2. ff. de inoffic. testam.* Militum denique favori concessum, ut eis mutis simul, & surdis testamenti sit factio, si post amissum linguæ, & aurium usum signis evidentissimis voluntatem suam coram commilitonibus queant ostendere *§. 2. instit. h. r.* Novo quidem Justiniani jure paganis etiam surdis, & mutis testari licet, modo scripto, vel lingua possint id facere *l. 10. C. qui testam. facer. poss.* Eo vitio tamen affecti pagani frustra testantur, si aut literas non didicerint, aut verbis heredem nuncupare nequeant. Ita militibus surdis, & mutis privilegium militare competit post ipsam *l. 10. C. eod.* At vero militari olim privilegio militibus uti licebat, quamdiu in numeris essent. Nam quocumque missionis genere militia dimissi forent, privilegium amittebant *§. 3. instit. h. r.* Neque tamen statim post missionem testamenta militum militari jure valere desinunt. Veteranis enim post honestam, vel caulariam missionem intra annum fato cedentibus, eorum testamentum ante missionem factum adhuc militari jure censebitur *d. §. 3. h. r. & l. 21. ff. eod.* Sed in his diutius immorari nolum vix ullius apud nostrates usus rara felicitate pacatorum temporum.

T I T U L U S XII.

Quibus non est permiffum facere testamentum.

A Libi ostendiffe videor , testamenti factionem
jus Gentium ignorare , eamque ex jure Ci-
vitatatis repeti oportere . Vide *libr. 2. tit. 1. §. 2.*
& *sequ.* Quatenus igitur cuique testari liceat , di-
metiendum est ex legislatoris arbitrio . Athenis qui-
dem vetustissima Draconis lege civibus adempta
fuit testamenti factio . Ita per id temporis apud
Athenienses heredes erant sui cuique liberi , aut
agnati . Solon primus testamenti factionem indulfit
Atheniensibus . Is tamen eam facultatem limitibus
angustissimis coerceri jussit . Primo enim , ne quid
inclementius statueretur in filios , parentes cum li-
beris decedentes testari vetuit *Demosth. orat. 2. in*
Stephan. Deinde ipsis orbis testamenti factionem
ademit , si morbo , seniove languescerent . Pericu-
lum enim erat , ne ita affecti homines valetudinis ,
aut ætatis vitio de agnatis maligne statuerent .
Rem docet *Isæus orat. 5.* Denique viros etiam
uxoriis blandimentis illectos testari noluit , ne mu-
lierum illecebris ultimum testatoris judicium cor-
rumperetur . Vide *Plutarchum in Solon.* Enimi-
vero Romani veteres liberrimum jusserunt esse te-
statorum arbitrium . Sane in duodecim tabulis ita
cavete Decemviri ; *paterfamilias uti legasset super*
pecunia , tutelave suæ rei , ita jus esto . At vero
licet latissima testandi facultas apud Romanos ef-
set , non cujusvis tamen testamentum admitteba-
tur .

tur. Alii enim defectu status, alii animi, alii corporis vitio testari non poterant. De omnibus pro instituto videndum.

II. Quod ad primum igitur, defectu status olim testari non poterant peregrini, servi, filii familias *princ. h. t.* Quod enim ad peregrinos, ii juris Quiritium expertes erant. Cum igitur testamenti factio manaret ex jure Quiritium, frustra testabantur, quicumque cives haud essent. Peregrinis tamen concessum, ut secundum leges Civitatis suae testari possent Ulpian. *fragm. 20. 14.* Quod ad servos, filiosve familias, ipsa ratio Romani juris a testamenti factione eos arcebat. Nimirum in duodecim tabulis solis patribus familias testamenti factio concessa fuerat. Ne igitur juri publico privatorum pactis officii videretur, ne cum dominorum quidem, aut parentum consensu servi, filii familias testamenti factionem usurpare poterant *l. 3. ff. qui testam. facer. poss.* Aliunde olim filiorum peculia ad patrem promiscue pertinebant. Proinde pecunia quoque carebant, de qua testari possent. Cum tamen donatio mortis causa contractus potius rationem habeat, patre consentiente, filius familias mortis causa donare non prohibetur *l. 9. §. 2. ff. de donat.*

III. Ita quidem de filiis familias sub libera Republica receptum jus fuerat olim. Enimvero ubi ad belli, pacisque studia promovenda discrimen peculiorum fuit inventum, servi quidem sub veteri jure manserunt: verum filii familias, si castrense peculium nacti forent, saltem a Neronis aëvo testamenti factione coeperunt uti. Vide *libr. 2. tit. 9. §. 5.* Et ab initio quidem filii familias de castrensi peculio testamenti factio concessa fuit, quam diu

diu sub numeris essent *l. 1. ff. de testam. milit.* Ultra tamen processit Hadrianus. Is enim filiosfamilias licet sacramento solutos de castrensi peculio testari permisit *princ. h. t.* In peculium quasi castrense eadem facultas filiisfamilias jure veteri non competebat. De eo enim ad Justinianum usque testari non poterant, nisi in eminentiori dignitatis gradu constituti forent §. 6. *inst. de milit. testam.* Verum liberalior more suo Justinianus de peculio quoque quasi castrensi filiisfamilias testamenti factionem concessit *d. §. 6. de milit. testam. & l. ult. C. de inoffic. testam.* Cum ibi tamen Imperator solum peculium quasi castrense memoret, jure novissimo filiusfamilias de ipso peculio adventitio, quod *irregulare* vocant, testari nequit. De ejusmodi quidem peculio pro lubitu Justinianus filiosfamilias statuere jussit *novell. 117. c. 1.* verbum tamen *διοικησις*, quo ibi utitur Imperator, ad actus tantum inter vivos referri debet, ut Græce periti norunt. Novum autem in jure non est, ut testamenti factione careant, qui de rebus suis actibus inter vivos pro lubitu statuere possunt. Conf: Vinn. ad *princ. h. t. n. 6.* Quid tamen in peculium adventitium maternum per consuetudines Neapolitanas filiosfamilias in testamento liceat, exposui *in jur. Regn. libr. 1. tit. 5. §. 8.* Nunc videamus, quinam propter animi vitium testari nequeant.

IV. Propter animi vitium testari non possunt impuberes, dementes, ac bonis interdicti prodigi. Licet autem impubes ad pubertatem perveniat, ac demens, aut prodigus resipiscant, testamentum in ætate pupillari, dementia, aut prodigalitate conditum non convalescit. Id suavit regula Catonia-
na,

na, quæ vitiosa ab initio consistere aliquando vetat *l. 1. princ. ff. de regul. Caton. C. §. 1. h. t.* Enimvero si quis ante prodigalitatem, aut dementia testatus fuerit, licet in prodigalitate, dementia ve decesserit, testamentum conhibet adhuc. Nam neque testamentum recte factum, neque alia negotia recte gesta prodigalitas, aut dementia superveniens infirmare potest *d. §. 1. h. t.* Vetus enim juris Romani regula durare jubet, quæ semel utiliter sunt constituta, licet casus extiterit, unde incipere non poterant *l. 85. ff. de reg. jur.* Quid de testamento in dementia, aut furoris intervallo condito? Ea de re veteres non convenisse scribit Justinianus; se tandem post retro Principes id testamentum ratum haberi jussisse *l. 9. C. qui testam. facer. poss. C. d. §. 1. h. t.* Secus de prodigo statuunt passim interpretes. Ejus enim testamentum in prodigalitatis intervallo factum irritum esse docent ex regulis Romani juris; Leonem tandem in Oriente ratum haberi jussisse prodigi testamentum, si videretur in prodigalitatis intervallo factum *novell. 39.* Verum & falluntur interpretes, & sua constitutione Leo jus statuit perpetuo Romæ receptum. Nimirum prodigi testamentum irritum censuere veteres, quia prodigus a furioso parum abesset: Prodigus ad furiosum accedit; præ furioso tamen deterius conditionis censi non debet. Atqui ipsius furiosi testamentum ratum apud Romanos erat, si sapienter scriptum esset, & videretur in furoris intervallo factum, ut constat ex Valerio Maximo *libr. 7. c. 8.* Ea de re saltem hodie dubitari nequit ob *d. l. 9. C. qui testam. facer. poss.* Utcumque id apud Romanos fuerit, in Regno saltem ratum haberi solet prodigi testamentum,

tum, modo fapienter fit fcriptum, & frugi hominis videatur de Rof. *in civil. decret. prax. c. 3. n. 39.* Nunc, quod fupereft, pauca de iis delibemus, qui vitio corporis testari non poterant.

V. Vitio corporis olim testari non poterant mutus, & furdus Paul. 4. *sent. 1. 18. l. 9. §. 1. ff. und. cogn. C. §. 3. b.t.* Id autem ipfa ratio, juris civilis neceffario flagitabat. Nam fiquidem vitium conjunctum effer, ita affecti homines, ne per rerum quidem naturam testari poterant. Sin vitium discretum foret, muto quidem factio testamenti non erat, quia testes rogare non poterat; furdo vero, quia aurium vitio ei denegabatur audire testes sibi testimonium perhibentes. Ita licet vitium discretum effer, mutus, aut furdus tantum a Principe testamenti factionem impetrare poterat. In eo quidem privilegio concedendo Principes se difficiles non præbebant. Nam vicefimæ vectigal ex hereditatibus tantum testamento delatis fiscus sperare poterat. Muti tamen, qui literas non didiciffent, ne per Principis quidem privilegium testari poterant: nam nec libello, nec voce ei poterant offerre preces. Ita de furdis, ac mutis jus fuerat olim ad Justinianum ufque. Is primum natos quidem furdos, & mutos testari vetuit; talibus ob infortunium factis testamenti factionem indulfit, si literas scirent. Quod si vitium discretum effer, eos sine privilegio Principis testari juffit, si voce, vel fcripto supremum arbitrium pollent ostendere l. 10. C. *qui testant. facere poff.* Quid de cæco? Is cum testes rogare poffit, eosque sibi testimonium perhibentes audire queat, inter ipsas veteris juris subtilitates testamenti factionem habebat Paul. *libr. 3. sentent.*

tit. 4. §. 4. Enimvero ne qua fraus in cæci testamentum obreperet, in ejus testamento Justinus formam quamdam accuratorem præscripsit *l. 8. C. eod.* Cæci scilicet voluntatem per tabularium describi jussit; si deesset tabularii copia, per testem octavum. Voluntati ita descriptæ præter ordinarium testium numerum per ipsum tabularium, aut testem octavum subscribi voluit; palam etiam recitari, ac describi per dignitates, & reliqua indicia nomen heredum. Nam sola nominum commemoratio aliquid ambiguitatis afferre poterat. Sed de tota re vide Strykium *de cautel. testam. c. 14.*

T I T U L U S XIII.

De exheredatione liberorum.

PRæter externa testamenti solemnia, quæ hætenus exequuti sumus, solemnia quoque quædam interna sunt adhibenda, ut testamentum rite consistat. Eo primo pertinet heredis institutio, sine qua extremum testatoris judicium jure testamenti censi nequit *l. 17. §. 2. ff. de testam. milit.* Eodem deinde pertinet liberorum exheredatio, si eos parens instituere nolit. Prior illa solemnitas ab omnibus testatoribus servari debet: hæc tantum ab illis, qui mortis tempore liberos in potestate habent *princ. h. t.* Hanc postremam solemnitatem hoc loco potissimum Tribonianus enucleat. Quod autem ad liberorum exheredationem, in veteri Romanorum jure non imponebatur testatori necessitas instituendi, aut exheredandi in potestate libe-

liberos. Præteritionis igitur vitio testamentum infirmari non poterat, si in potestate liberi præteriti in eo forent. Res apprime liquet ex Cicerone *de orat.* 1. 38. Ibi scilicet apud Centumviros disceptatum scribit, an ratum habendum esset patris testamentum, in quo ob falsum rumorem de morte filii eum parens præteriisset. Id igitur ostendit, nullo olim cum testamenti vitio a parentibus præteriri potuisse liberos. Aliter facile fuisset filio ob præteritionis vitium testamentum infringere, neque paternæ voluntatis quæstio apud Centumviros instituta esset. Enimvero ea parentum facultas iniquior posteritati visa. Ita favore liberorum invaluit, ut parentes in potestate liberos aut instituerent, aut nominatim exheredarent. Si secus fieret, eos per oblivionem præteritos videri placuit; præteritionis vero vitio inutile testamentum esse *l. 30. ff. de liber. & posth. hered. instir.*

II. Neque vero præteritionis vitium respectu liberorum omnium testamentum infirmabat olim. Veteri jure scilicet, ut admonuimus, impune parentes præterire poterant in potestate liberos. Hinc ob ipsam veteris juris reverentiam ea in re jurisconsulti discrimen statuerunt inter masculos primi gradus, ac foeminas, ceterosque liberos, qui gradus ulterioris essent. Masculo primi gradus a parente præterito, testamentum omnino inutile censuerunt: filia vero, aut masculis gradus ulterioris a parente præteritis, rato testamento manente, eis jus tantum accrescendi ad certam portionem accommodarunt. Scriptis autem heredibus eos accrescere voluerunt suis quidem in partem virilem, extraneis in dimidiam Ulpian. *fragm. tit. 22. §.*

17. *¶ princ. h. t.* Ejus discriminis causam inde desumpserunt jurisconsulti, quod masculi primi gradus arctiori veluti vinculo cum parente conjungerentur. Id ex eo constare videbatur, quod in emancipationibus peragendis filia quidem, ceterique liberi gradus ulterioris una mancipatione e potestate parentum exhibant. Contra in masculis primi gradus emancipandis post tertiam tandem mancipationem jus patris perimebatur *l. 8. §. 1. ff. de injust. rupt. irrit. fact. testam.* Indidem factum fortasse fuit, ut masculos primi gradus nominatim exheredari oporteret; filiarum vero, ceterique liberi formula etiam inter ceteros exheredari possent *d. princ. h. t.* Inter ceteros videbantur exheredati liberi, si ita cavisset testamento pater. *Titius filius meus heres esto: ceteri liberi exheredes sunt.* Vide doctores ad *d. princ. h. t.*

III. Quod ad postumos, ii olim a parentibus neque institui, neque exheredari poterant. Jure veteri scilicet frustra instituebantur, aut exheredabantur incertae personae Ulpian. *fragm. 22. 4.* Postumi autem incertae personae vel inde videri debebant, quod incertum erat, unus, an plures, mares, an foeminae nascituri forent. Ita necessario fiebat, ut testamentum postumum agnascendo rumperet, ac suprema civium judicia subverterentur. Proinde aequitate quadam jurisconsultorum invaluit, ut postumi etiam, qui post mortem testatoris sui heredes nascituri essent, institui, aut exheredari a parente possent *§. 1. h. t.* In postumis autem exheredandis nullum gradus discrimen fecere veteres. Tantum interesse placuit foeminas inter, & masculos. Masculos nominatim exheredari oportebat: foeminae vel nominatim, vel inter ceteros

teros exheredari poterant. Ut tamen inter ceteros utiliter exheredarentur, eis aliquid legandum erat, ne per oblivionem præteritæ viderentur Ulpian. *fragm.* 22. 21. C. §. 1. h. r.

IV. At vero postumorum institutio, aut exheredatio contra juris antiqui regulas recepta videbatur. Ea igitur facultate ita utendum censuerunt jurisconsulti, ut ab antiquo jure quam minime recederetur. Ita facultatem instituendi, aut exheredandi postumos ad veros postumos coercuerunt, eos scilicet, qui sui nascituri forent intra decem menses a morte patris l. 3. §. 1. ff. de *injust. rupt. irrit. fact. testam.* Ea igitur recepta jurisprudentia, quasi postumi veluti agnascendo testamenta adhuc rumpebant. Proinde serius ocus in jure civili cautum, ut quasi postumi quoque institui, aut exheredari possent. Quasi postumorum genus non unum erat. Ejusmodi primo erant Aquiliani, nepotes scilicet, qui post mortem avi nati ex filio præmortuo suscepti forent. Ii Aquiliani sunt appellati, quia primus Aquilius jurisconsultus viam ostendit, qua institui, aut exheredari possent. Deinde quasi postumi videbantur etiam primi, & secundi Vellejani. Ii Vellejani sunt dicti, quia de ipsis etiam instituendis, aut exheredandis cautum fuerat lege Junia Velleja sub Claudio. Conf. Anton. Schulting. ad Ulpian. *fragm. tit. 22. n. 53.* Primi autem Vellejani ex primo legis Junia Velleja capite dicebantur, qui post testamentum a parente conditum vivo testatore tamen sui heredes agnascerentur. Secundi Vellejani ex secundo ejusdem legis capite appellabantur nepotes, qui ante testamentum avi non sui nati in locum defuncti patris mox successissent. Præterea alia quasi

postumorum genera, de quibus late doctores ad
l. 29. ff. de liber. & postum. hered. instit. & ad
§. 2. h. t.

V. Quæ hætenus de liberis instituendis, aut exheredandis diximus, ad emancipatos non pertinebant. Jus enim civile emancipatos pro extraneis haberi jubebat. Nam per emancipationem liberi de familia sponte exeuntes ab ea prorsus se abdicabant. Verum enimvero naturalem potius æquitatem, quam juris civilis rigorem ea in re spectavit edicto Prætor. Nimirum post emancipationem filii adhuc filii esse pergunt. Proinde Prætor emancipatos utriusque sexus aut institui, aut exheredari jussit. Si secus factum a testatore foret, contra testamenti tabulas eis bonorum possessionem dabat *§. 3. h. t.* Prætoris igitur beneficio res eo redibat, quasi facta non foret emancipatio *l. 6 §. 1. ff. de bonor. possess.* Quid de adoptivis? Adoptivi liberi post adoptionem ad patris adoptivi familiam pertinebant. Proinde olim, quamdiu consistebat adoptio, tantum ab adoptivo patre instituendi, aut exheredandi erant. Filius igitur in adoptionem datus ne ex Prætoris beneficio quidem in patris naturalis familia jus sui heredis nancisci poterat. Jus enim Romanorum publicum prohibebat, apud duas familias jus sui heredis habere quempiam. Si tamen a patre adoptivo filius fuisset emancipatus, is in patris naturalis familia jus statim reciperebat, quod emancipatis concessit edicto Prætor. Quapropter, nisi a patre naturali aut institutus, aut exheredatus fuisset, ut emancipati ceteri, ad bonorum possessionem contra tabulas admittebatur *§. 4. h. t.* Sed ea de re plura desino. Nam de adoptivis Justinianus constitutionem suam servari

vari jussit in l. 10. C. de adoption. Eam enucleavimus libr. 1. tit. 11. §. 9. Actum non lubet agere.

VI. Atque hæc veteris Romani juris differentia fuit sexus, & gradus, natorum, & postumorum, quod ad liberos instituendos, aut exheredandos. Verum ab his principiis recedi jussit Justinianus in l. 4. C. de liber. præterit. Ibi scilicet primo exæquati sunt liberi ratione sexus. Hodie igitur ipsæ foeminae, nisi instituantur, nominatim exheredari debent. Si secus fiat, filiae quoque seu præteritæ, seu non nominatim exheredatæ testamentum infirmare poterunt, non emancipatæ quidem ex jure civili, emancipatæ ex edicto Prætoris §. 5. h. r. Rursus. Ibidem Justinianus liberos exæquavit ratione gradus. Proinde hodie seu primi gradus sint liberi, seu ulterioris, vel institui, vel nominatim exheredari debent. Aliter liberi quidem in potestate testamentum infringunt ex jure civili, emancipati ex jure Prætorio contra tabulas bonorum possessionem petunt d. §. 5. h. r. Ibidem denique discrimen sustulit Justinianus inter natos, & postumos. Hodie igitur ipsæ foeminae seu natæ, seu postumæ, nisi instituantur, nominatim exheredari debent. Si secus fiat, generatim testamentum infringent suæ quidem heredes ex jure civili, per emancipatos susceptæ ex jure Prætorio d. §. 5. h. r. Illud tamen hic adverti velim, ex regulis Neapolitani juris, si masculi superstites testatori fuerint, filias neque institui, neque exheredari oportere. Nimirum in Regno Fridericus in legitimis parentum hereditatibus foeminas per masculos excludi jussit constit. in aliquibus. de success. filior. comit. & bar. Si igitur in intestati successione filiae jubentur

excludi, eas in testamento parens impune prætere-
 rere poterit. Recepta est enim in jure regula,
 facilius ex testamento, quam ab intestato quem-
 piam excludi posse.

VII. Quæ de liberis instituendis, aut exhere-
 dandis hætenus exequuti sumus, ad paganorum te-
 stamenta pertinent. Milites enim liberos impune
 prætereunt: eorum autem præteritio vim exhere-
 dationis habet §. 6. *h. t.* At vero militi qui-
 dem licet solo silentio exheredare liberos, si is
 non ignorarit, liberos sibi esse superstites. Si e-
 nim is falso crediderit, se orbum esse, ea quidem
 in specie paternæ voluntatis benigna præsumptio
 testamenti rationem haberi vetat *l. 9. C. sequ. C.*
de testam. milit. Matris etiam, ac parentum ma-
 ternorum præteritio pro exheredatione est. Id ta-
 men non ex privilegio quidem, sed ex ipsa libe-
 rorum conditione manat. Mater scilicet, ac pa-
 rentes maternæ lineæ patria potestate non utuntur
 in liberos. Cum igitur ipsos suos heredes haud
 habeant, ceterorum extraneorum exemplo eos so-
 lo silentio exheredare poterunt §. 7. *h. t.* Neque
 vero immutatum id fuit *novell. 115. c. 3.* ubi sine
 iusta causa parentes liberos exheredare sunt vetiti.
 Nam exheredandi vocabulum pro liberorum diver-
 sitate diverse debet intelligi. Si de testamento pa-
 tris agatur, eo vocabulo expressa exheredatio de-
 signatur. Sin de testamento matris sit controver-
 sia, simplex etiam præteritio eo vocabulo conti-
 netur *d. §. 7. h. t.* Conf. Huber. *in prælect. ad*
insti. h. t. n. 14.

T I T U L U S XIV.

De heredibus instituendis.

FRustra quis heres instituitur, nisi cum eo sit testamenti factio, seu, quod eodem rexit, nisi capere ex alieno testamento possit §. 4. *de hered. qualis. & differ.* Cum vero in defuncti civis universa jura succedat heres, generatim omnes, qui persona civili carent, testamenti factionem haud habent. Ejusmodi exempli gratia sunt servi poenae, deportati, haeretici, apostatae, filii perduellium, peregrini denique. Quod tamen ad peregrinos, ii hodie ut libere testari possunt, ita & heredes institui non prohibentur seu ob mores passim ita receptos, seu ob Friderici Aenobarbi constitutionem *de statut. & consuetudin.* §. 10. Ut tamen rebus hereditariis apud nos potiri peregrini queant, intra Regni fines domicilium constituere debent: aliter subsunt saltem *valimento*, quod vocant: Quod ad servos, eos & in contractibus, & testamentis personam civilem a dominis jus Romanum mutuari patitur. Servos igitur heredes instituere licet seu proprios, seu alienos *princ. h. t.* Cum vero jacens hereditas sustineat defuncti personam, servus etiam jacentis hereditatis recte heres instituetur §. 2. *instit. h. t.* Jacens hereditas in jure dicitur, quae nondum est adita, sed adeunda speratur.

II. Jam vero apud veteres regula juris erat, frustra heredem cum institui, qui cernere non posset

hereditatem, seu decernere heredem se esse velle Ulpian. *fragm.* 22. 5. Ita Dii, templa, Civitates, vici, & ipsa publice recepta collegia hereditates ex testamento nancisci non poterant. Verum ea in re paulatim a veteri subtilitate descitum. Quod enim ad Deos, senatusconsultis, Principumve constitutionibus eorum complusculis indulgeri placuit, ut heredes possent institui Ulpian. *loc. cit.* §. 6. Quod ad Civitates, cum benignior natura fideicommissorum esset, senatusconsulto Aproniano sub Hadriano fortasse cautum, ut eis per fideicommissum relinqui posset hereditas *l. 26. ff. ad senatusc. Trebellian.* Enimvero senatusconsultum Apronianum ob juris antiqui reverentiam de solis Civitatibus fuit acceptum. Id igitur sub Marco Antonio ad vicos, & collegia quoque fuit extensum, modo auctoritate publica firmata forent *l. 20. ff. de reb. dub.* His tandem initiis Leo Imperator verbis quoque directis quibuscumque universitatibus hereditates ex testamento deferri concessit *l. 12. C. de hered. instit.* Ibi quidem solas Civitates memorat Imperator; argumentum tamen a Civitatibus ad universitates, & collegia licita recte transfertur *l. 1. princ. ff. quod cujusque. univers.*

III. Quod ad mulieres, eæ seu suæ heredes, seu extraneæ testatori forent, jure Decemvirali heredes institui non vetabantur. Nam in duodecim tabulis & latissima testandi facultas patrifamilias concessa fuit, neque ibi hereditatis capiundæ jure privatae sunt foeminae. In ea tamen testandi licentia fraus obliqua via fiebat vetustissimæ Romanorum. Legi, quæ cujusque prædia penes familiam perpetuo jubebat esse. Foeminis enim a parente scriptis heredibus, per nuptias avita prædia in alienas,

familias passim transferebantur. Id ipsum mulieris luxus incitamentum erat. His igitur incommodis obviam itum lege Voconia lata a Q. Voconio Saxa tribuno plebis anno Urbis 584. Eo plebiscito præter alia placuit, ne census quispiam foeminam institueret heredem, licet unica filia ea foret, alique testatori liberi non superessent Cicer. 1. in Verr. 43. & Augustin. de Civit. Dei 3. 21. In lege Voconia censi vocabulo non civis quilibet designabatur, sed qui patrimonium alicujus momenti haberet, & in tabulis censualibus in aliquam ex quinque prioribus classibus relatus esset. Lex igitur eo potissimum pertinebat, ne divitiæ confluerent ad foeminas. Hinc ab eo, qui in quinque prioribus classibus census haud esset, mulieres heredes scribi non vetabantur. Ex eorum etiam, qui censi forent, hereditate ad centum usque nummorum millia mulieres capere poterant. Perizon. in dissertat. de leg. Vocon. edit. Lugdun. Bataavor. pag. 159. & sequ.

IV. Jam vero lege Voconia. sat cautum videbatur, ne hereditates redirent ad foeminas. Verum ea lata, statim innotuit, quam facile saluberrimæ leges eludi possent. Nimirum lege sua Voconius ab eorum tantum hereditatibus, qui in prioribus classibus scripti forent, mulieres excluderat. Ditiores igitur, qui mulieres scribere vellent heredes, in postrema classe inter proletarios se censeferi curabant. Lex enim Voconia eorum hereditates spectasse non credebatur, qui tantum capite censi essent, & in postrema classe descripti forent. Conf. Montesqu. esprit des loix 27. Qui igitur ita agerent, cum legis ludibrio hereditatem, si vellent, trans mittebant ad foeminas. Neque tamen
hic

hic fraudum finis. Ubi enim fideicommissa fuerunt inventa, qui hereditates ad scēinas redire vellent, fideicommittebant heredum, ut eas mulieribus mox restituerent Cicer. *de fin.* 2. Ipsi quoque Prætores legem Voconiam iniquiorem existimantes scēinis scriptis heredibus non hereditatem quidem, sed, quod eodem redibat, bonorum possessionem dabant. Licet autem quod ad testamentarias mulierum hereditates diu ante Justinianum lex Voconia exoleverit, ea tamen, quod ad legitimas hereditates, obtinuit ad Justinianum usque. Is primus in legitimis hereditatibus masculis mulieres æquari iussit *l. 14. C. de legit. heredit.* Nunc expendamus, quo tandem modo testator extrema sua iudicia componere debeat, & quomodo seu interna, seu externa institutionis forma sit ordinanda.

V. Quod ad primum, jus civile publicum veluti legislatorem testatorem fingit. Hinc legislatoris exemplo testator in heredibus instituendis verba usurpare debet, ex quibus de ipsius mente liquido constare possit. Nil tamen interest jure novissimo, quæ verba in institutione testator adhibeat. Nam, veteri verborum subtilitate contemta, testatoris voluntatem ratam haberi Constantinus iussit, quibuscumque verbis expressa foret *l. 15. C. de testam. & quemadm. testam. ordin.* Rursus eadem legislatoris similitudo suadet, ut certa demonstratione designetur heres: si secus fiat, institutio non consistet *l. 4. C. eod.* Ex veteris autem jurisprudentiæ regulis ipso institutionis tempore de persona heredis constare oportebat: si per id temporis heres incertus esset, is frustra vindicabat hereditatem Ulpian. *fragm.* 22. 4. & §. 25. *instit. de legat.* Verum ob heredis incertitudinem
Ju.

Justinianus institutiones vitari vetuit, modo cum eventus aliquis postea demonstraret §. 27. *instir. cod.* Præterea idem legislatoris exemplum exposcit, ut arbitrio suo testator de herede statuatur, neque institutionem in alienam voluntatem conferat. Hinc ea formula frustra instituetur heres: *quos Titius voluerit, heredes sunt* l. 32. *princ. ff. de hered. instir.* Idem denique legislatoris habitus flagitat, ne captatoria sit institutio. Captatoria dicitur institutio, si quempiam testator instituat ea lege, ut heres ipse testatorem heredem scribat l. 1. *ff. de his, quæ pr. non script. habent.* Ejusmodi scilicet institutionem tamquam bonis moribus adversam Senatus obtinere vetuit. Ea enim in specie non benevolentiam suam erga heredem testator ostendit, sed heredis potius hereditatem captat: qui autem alterius captat hereditatem, ejus plerumque captat & mortem. Enimvero ut captatoria sit institutio, in ea non tempus quidem præteritum, sed futurum contineri debet. Captatoria igitur erit institutio, si quis exempli gratia ita testamento caveat: *qua ex parte Titius me heredem scribet, ex ea heres esto.* Quapropter si qua institutio remunerationis causa fiat, ea captatoria cenferi nequit. Ita sane vitio captationis haud subest institutio isthæc: *ex qua parte anno superior Titius me heredem scripsit, ex ea heres esto.* Vide Bynkersh. *de captat. instir. c. 8. & sequ.* At vero si futurum tempus in institutione contineatur, ea captatoria videri debet, seu in illum, cujus captatur hereditas, seu in alium collata fuerit, modo per interpositam personam alterius hereditas captata fuerit. Ita sane captatoria erit institutio, si quis filium alterius scribat heredem ex
ca.

ea parte, qua ipsemet ab heredis patre instituetur *l. 171. §. 1. ff. de hered. instit.*

VI. Porro cum paganum quempiam testato simul, & intestato jus decedere non patitur *l. 7. ff. de regul. jur.* post certum tempus, aut ad certum tempus institui non potest heres *§. 9. instit. h. t.* Nimirum potestate juris heres defunctum exhibet; ex juris præscripto quoque defunctum heres perpetuo exhibere debet. Atqui si post certum tempus, aut ad certum tempus instituatur heres, is defunctum perpetuo non exhibebit. Neque tamen inutilis institutio erit, si certum tempus ei fuerit appositum. Nam favore testamentorum invaluit, ut tempus pro non scripto haberetur; eo autem detracto potestate juris, institutio firma consisteret *l. 34. ff. de hered. instit. & d. §. 9. instit. eod.* Id ipsum tamen intellige, si tempus certum institutioni fuerit appositum. Si enim institutioni appositum sit tempus incertum, id conditionis loco censetur. Tempus enim incertum conditionem facit *l. 75. ff. de condit. & demonstrat.* Ita sane si quis instituatur, ubi Caius decesserit, id tempus tamquam incertum conditionem faciet. Nam fieri potest, ut ante Caium moriatur heres: id autem si factum fuerit, testamento corrumpente ob defectum conditionis, locus legitimæ successionis patebit. Sed, his omiſſis, de externa ipsius institutionis forma pauca subnectamus.

VII. Quod ad externam institutionis formam, ea & pure, & sub conditione recte peragitur *§. 9. h. t.* Condicio proprie in jure dicitur, quæ ab incerto pendet eventu. Proinde si in præteritum, aut præsens conditio collata fuerit, ea proprie conditio dici nequit *l. 10. §. 1. ff. de condition. instit.*

fit. Jurisconsulti tamen eam etiam conditionem appellant, quæ in præteritum, aut præsens confer-
tur: hinc ejus quoque conditionis existentiam heres
docere debet, ut hereditate potiri queat *l. 111. ff. de condit. & demonstrat.* Condicio autem non
unius est generis. Passim ea dividitur in *casualem*,
potestativam, & *mixtam*. Casualis pendet ab e-
ventu fortuito; potestativa ab heredis arbitrio;
mixta partim ab heredis arbitrio, partim ab e-
ventu fortuito. Cuicunque condicio sit, ea nisi
impleatur, heredi non defertur hereditas. Id ipsum
tamen intellige, modo ne is, in cujus utilitatem
condicio deficit, impedimento fuerit, quominus
impleatur *l. 5. §. 5. ff. quand. dies legat. vel fi-
deicom. ced.* Quod si plures conditiones institutio-
ni fuerint appositæ, siquidem conjunctim, omni-
bus parendum erit; sin alternatim, unam impleri
sufficiet *§. 11. h. t.* Neque tamen quælibet con-
ditio omnibus heredibus imponi potest. Heredibus
quidem extraneis quamlibet conditionem licet in-
jungere: verum jure pandectarum olim suis here-
dibus ea tantum condicio imponi poterat, quæ in
ipsorum potestate foret *l. 4. princ. ff. de hered. instit.* At minus hodie parenti licet. Nam jure
codicis liberis saltem in sola legitima institutis ne
condicio quidem imponi potest, quæ ab ipsorum
potestate pendet. Quæcumque igitur condicio sit
eis imposita, ipsius juris potestate detrahitur *l. 32. C. de inoffic. testam.* Ejus jurisprudentiæ ratio in-
de pendet, quod liberorum legitima nullo onere
gravari potest: atqui ipsa potestativa condicio onus
quoddam videri debet.

VIII. Aliquando impossibilis quoque condicio
institutioni solet apponi. Videamus igitur, quid ea
de

de specie sit in jure cautum. Primum omnium impossibilem conditionem non tantum eam appellant jurisconsulti, quæ per ipsam rerum naturam existere nequit, sed & quæ quid continet, quod cum pietate, legibus, moribusve pugnat. Nam ut divine Papinianus ait in *l. 15. ff. de condit. instit. quæ facta lædunt pietatem, existimationem, verecundiam nostram*, & , ut generaliter dixerim, contra bonos mores fiunt, nec facere nos posse credendum est. Utravis vero conditio institutioni fuerit adjecta, ea detrahatur potestate juris. Conditione igitur heredi remissa, institutio rata manet §. 10. *h. t.* & *l. 9. ff. de condit. instit.* At vero conditio institutionem non vitiabit; si cum natura re vera pugnet. Si enim per se possibilis sit conditio, atque heredis respectu tantum impossibilis videatur, frustra hereditatem is vindicabit *l. 4. §. 1. ff. de statulib.* Impossibilem quoque conditionem continet institutio, quæ *perplexæ* dicitur. Quæ enim in ea continentur, ita se cum pugnant, ut exitum habere nequeant. Ejus institutionis exemplum ita Marcianus affert in *l. 16. ff. de condit. instit. Si Titius heres erit, Sejus heres esto: si Sejus heres erit, Titius heres esto.* Ejusmodi tamen institutio prorsus infirma censei debet *d. l. 16. ff. eod.* Eodem jure censebatur olim institutio, quam *præposteram* jurisconsulti dixerunt. Præpostera institutio in jure dicitur, quæ confertur quidem in præsens, a futura conditione tamen pendere præcipitur. Verum præposteras institutiones, aut contractus ratos haberi jussit Justinianus: tantum conditionis appositæ eventum expectari voluit, ut deferretur tandem hereditas, aut contractus exequutio peti posset *l. 25. C. de testam.*

IX. Jam vero discrimen fecere veteres, utrum conditio impossibilis institutionibus, an contractibus foret apposita. Si enim conditio impossibilis institutioni fuisset aposita, institutionem, ut supra vidimus, consistere censuerunt. Sin ea contractibus fuisset adjecta, per impossibilem conditionem eos vitari pronunciarunt *l. 31. ff. de obligat. & action.* Differentia isthæc inde profluxisse videtur, quod in impossibilem conditionem contrahentes consentientes præsumendi forent joculari velle. Neque enim serio egisse videri debent, qui contractibus conditionem apponunt, quam sciant impossibilem esse. Contra in testamento paterfamilias aut in exitu vitæ positus, aut certe de mortalitate cogitans præsumi nequit joculari velle; eum igitur contra animi sui sententiam conditionem impossibilem protulisse censuere veteres, neque ea de causa institutionem infirmari oportere. Nunc, quod ex præsentis titulo superest, de hereditatis divisione, ejusque partibus pauca delibemus.

X. Tota hereditas a jurisconsultis as appellatur. Neque vero solius hereditatis solidum, sed & usufructuum, & ceterarum omnium ferme rerum assis vocabulo designari solet. Hinc *in assẽm satisfacere, possidere, satisdare, vendere, vindicare* dictum invenies. Exemplum prostant apud Calvinum *in lexic. juridic. voc. as.* Id vero vocabulum apud veteres tam late patuit, quia partes duodecim complectitur. Numerus enim duodenarius perfectionis symbolum credebatur olim, & omnium perfectissimus, ut scripsit Hermias *in Phædr. Platon.* Ejus rei causam primus protulit Duarenus *2. disput. 36.* Ibi enim ex Galeno observat, nullum alium numerum in tot partes æque commode dividi posse

posse. Nam is quidem, ut Galenus scripsit, *habet dimidium, & bessem, & quadrantem, septuncemque, & ipsum numerum duodenum*. Ea de causa hereditas a jurisconsultis as dicta fuit, & in duodecim divisa partes: singulæ etiam partes suo vocabulo sunt designatæ, ut in aliorum solidorum partibus fieri solet. Pars scilicet hereditatis duodecima *uncia* est appellata, binæ uncia *sexrans*, tres uncia quadrans, quatuor *triens*, quinque *quincunx*, sex *semis*, septem *septunx*, octo *bes*, novem *dodrans*, decem *dextrans*, aut *decunx*, undecim *deunx*. Cum vero testator & minus uncia, si velit, legare possit, ipsam hereditatis unciam in minores etiam partes dividerunt jurisconsulti, iisque designandis propria vocabula destinarunt. Neque tamen testator hereditatem in partes duodecim distribuere cogitur necessitate juris. Ei enim in plures partes, si velit, hereditatem parti licet §. 5. *h. r.* In eo autem argumento ita receptum jus Romæ fuit, ut, si partes duodecim excessisset testator, ad alias partes duodecim progressus factus intelligeretur *l. 17. §. 3. ff. de hered. instit.* Proinde si, partibus assis expletis, alius quoque heres esset sine parte scriptus, in partes viginti quatuor divisa videbatur hereditas. Ei igitur, qui fuisset sine parte scriptus, dimidium hereditatis deserebatur *d. l. 17. §. 3. ff. eod. & §. 6. h. r.*

XI. Ex dictis hætenus apprime liquet, solemnem assis distributionem testatorem non cogi sequi; in præsentī quoque negotio omnia ad ejus mentem accommodari oportere. Poterit igitur testator non solum in viginti quatuor uncias hereditatem dividere, sed & pauciores, aut plures, quam

quam duodecim partes, ex ea facere. Id autem si factum a testatore fuerit, in duodecim uncias potestate juris hereditas resolvi debet. Quapropter si in divisione per testatorem facta ex duodecim partibus quid super sit, aut desit, id ipsis heredibus pro rata hereditaria accrescet, aut decrescet §. 7. *h. t.* Quid si ex certa re unus heres sit scriptus? Ea in specie detracta certæ rei mentione, heredi scripto tota adjudicatur hereditas *l. 1. §. 4. ff. cod.* Ejus jurisprudentiæ ratio inde pendet, quod ex paganis quispiam testatus simul, & intestatus obire nequeat §. 5. *h. t.* Id adeo verum est, ut ea in specie complures existiment, ne ipsum quidem testatorem jus accrescendi prohibere posse. Conf. de Ros. *consultat. jur. 34. n. 18. & sequ.* Atque id verum quidem videtur, subtilitate juris civilis inspecta. Æquitas fori tamen vix hodie patitur, ut contra testatoris mentem tota hereditas addicatur ei, cui jus accrescendi testator ademērit. Quapropter in eo conflictu juris, & æquitatis eo potius inclinandum videtur, ut re sibi adscripta contentus heres, aut suppleta quarta, reliquam hereditatem legitimis heredibus jure taciti fideicommissi restituat. Vide Gomez. *resol. tom. 1. c. 10. n. 10.*



T I T U L U S XV.

De vulgari substitutione.

SUBstitutionis vocabulum multiplicem in jure notionem habet. Vox enim isthæc non solum institutioni secundi, aut ulterioris heredis accommodatur, sed de fideicommissis etiam frequenter accipitur. Hinc passim doctores substitutionem dividunt in *fideicommissariam*, & *directam*. In directa substitutione verbis directis heredi heres substituitur. In substitutione fideicommissaria verbis precativis testator heredi mandat, ut alteri restituatur hereditas. In re dubia substitutio potius directa præsumi debet, neutiquam vero fideicommissaria. Fideicommissaria scilicet substitutio heredem gravat restituendi onere. Ex recepta juris regula unusquisque præsumitur heredem suum quam minime gravare velle *l. 67. §. 8. ff. de legat. 2.* In dubio igitur substitutio directa censi debet, nisi aliud res ipsa suadeat. Sed de substitutione fideicommissaria infra videbimus ad *tit. 23.* Substitutionem directam, qua verbis directis heres heredi substituitur, hic, & insequenti titulo enarrabimus.

II. Directa heredum substitutio haud incommode definiri queat *secundi heredis institutio l. 43. §. 2. ff. de vulgar. & pupill. substit.* Veteres igitur substitutum secundum heredem appellant, licet tertio, vel ulteriori gradu substitutus fuerit. Id inde factum, quia, quæcumque substitutorum sit

sit series, tertius, aut ulterior substitutus respectu primi semper secundus est heres, si ad eum delata fuerit hereditas. Substitutionem vero recipiendarum non una fuit occasio. Primo enim facile fieri poterat, ut institutus ob æs alienum hereditatem damnosam existimans testamentum defereret. Ne igitur ea in specie paterfamilias intestatus obiret, substitutiones opportunissimæ videbantur. Deinde non raro fiebat, ut ante testatorem heres decederet. Eo autem casu res reductura erat ad intestati causam sine substitutionis auxilio. Denique, ut omittam alia, per legem Papiam ex alieno testamento complusculi capere non poterant: his autem heredibus institutis, fisco deferrebat hereditas, si saltem in testatoris obitu capaces non invenirentur. Proinde ea quoque de causa substitutiones recipiendæ erant, ne contra testatoris voluntatem ad fiscum rediret hereditas.

III. Jam vero directam substitutionem divisere veteres in vulgarem, & pupillarem. Vulgarem dixerunt, quæ ab omnibus testatoribus fieri posset. Pupillarem vocarunt, qua parens substitueret liberis in potestate positis, si in ætate pupillari decederent. Præter has duas tamen tres aliæ directæ substitutiones passim distingui solent, *exemplaris* scilicet, *reciproca*, *compendiosa*. Exemplarem appellant, qua dementi filio, si in dementia decederet, substituit parens. Rationem vocabuli inde repetunt, quod substitutio isthæc ad exemplum pupillaris fuit inducta. Reciprocam dicunt, in qua ipsi heredes instituti invicem substituti fuerint. Compendiosam vocant, quæ paucorum verborum compendio vulgarem simul, & pupillarem substitutionem complectitur. Ita sane si pater pupillo

substituatur per formulam, *quandocumque decesserit*, iis in verbis vulgaris simul, & pupillaris substitutio continetur. Enimvero rectius fortasse statuunt, qui duas tantum substitutionum species distinguendas aiunt, vulgarem scilicet, & pupillarem; reliquas autem diversas tantum continere substituendi formulas. Conf. Donell. *comment. jur. civil.* 6. 23. & Vinn. *ad rubric. h. t. n. 4.* His ita præstitutis, hoc titulo potissimum de vulgari, insequenti de pupillari substitutione videbimus.

IV. Primum omnium vulgaris substitutio inde nomen accepit, quod vulgo, & a quolibet testatore fieri posset, licet nullos haberet in potestate liberos. Ea facultas ex ipsa testamenti factione in jure Decemvirali concessa necessaria quadam consequentia deducta fuit. Heredis enim institutione concessa, necessario concedenda videbatur substituendi facultas. Aliter contra testatoris voluntatem in causam intestati res facile redire potuisset, si scriptus heres nollet, aut non posset hereditatem amplecti. Vulgarem vero substitutionem *in primum casum* fieri jurisconsulti dixerunt *l. 45. ff. de vulgar. & pupill. substit.* Id inde factum, quia vulgaris substitutio ante pupillarem in jure civili recepta fuit. Neque aliunde fortasse substitutio pupillaris in alterum, seu secundum casum fieri dicitur *in l. 4. princ. ff. eod.* nisi quia post substitutionem vulgarem fuit inventa. Vide *tit. 16. §. 1.* Cuivis igitur testatori licet, in primorum heredum locum alios substituere gradu secundo, tertio, aliove deinceps. Ubi autem factum id fuerit, si primi heredes haud erunt, substitutis gradu proximis deferetur hereditas *princ. h. t.*

V. Porro vulgariter substituendi formula in *specia-*

cialem, & *generalem* dividi potest. Specialis erit, si casum respiciat tantum *noluntatis*, aut *impotentiae*, quam vocant. Generalis est, si respiciat utrumque casum. Ejusmodi est formula, *si primus heres non erit*. Si igitur ea fuerit adhibita, patebit substituto locus, seu primo scriptus nolit, seu nequeat heres esse. Conf. doctores ad *princ. h.t.* Enimvero illud addubitari queat, num in alterutro casu expresso seu noluntatis, seu impotentiae omissus quoque contineatur. Controversia eo redit, an, exempli gratia substituto Sempronio, *si Mævius heres esse nolit*, ex substitutione Sempronius sit admittendus, si Mævius velit quidem, sed nequeat heres esse. Ejusmodi extensionem fieri vetant interpretes plerique omnes argumento *l. 10. ff. de liber. & postum.* Contraria tamen sententia a jure licet alienior æquitate quadam in foro se commendavit. Nam vulgariter substituendo testator id maxime curasse videtur, ne intestatus decedat. Ea conjectura voluntatis innixi doctores plerique omnes in præsentī specie casum expressum ad omissum extendunt. Vide Gomez. *resolut. c. 3. n. 10.* Stryk. *in cautel. testam. c. 18. membr. 1. §. 9. de Ros. in civil. decret. prax. c. 4. n. 9.*

VI. Jam vero formula, *si heres non erit*, pro heredum diversitate diversos quidem effectus habet. Ita sane si heres sui juris sit institutus, ea formula locum substituto facit, si is neque sibi, neque ob status permutationem hereditatem alteri per aditionem quæserit §. 4. *h. t.* Verum vulgata sunt isthæc in jure civili. Dubium tamen videri queat, utrum, ante aditionem herede instituto mortuo, ad ipsius heredes transmittatur hereditas, an in ea præferendus sit substitutus. Veteri quidem jure sui

heredes tantum parentis hereditatem in heredes quoslibet transmittabant *l. 8. C. de suis, & legitim.* In aliis igitur speciebus substitutus heredibus instituti præferebatur. Verum Justinianus heredibus generatim omnibus annum concessit, intra quem de adeunda, vel omittenda hereditate deliberare possent. Si scriptus heres intra deliberationis annum decederet, quod superesset ex deliberationis anno, in heredes transmitti jussit, si a defuncto hereditas repudiata non esset *l. 19. C. de jur. deliber.* Cum igitur jus deliberandi per reliquum anni tempus ad heredes quoslibet hodie transmittatur, jure novissimo heredes instituti substitutos possunt excludere. Conf. Gregor. Tholos. *syntagm. jur. 42. 13.*

VII. Porro in vulgari substitutione & singuli singulis, & plures pluribus, & unus pluribus, & plures uni recte substituuntur: ipsi etiam heredes instituti substitui non prohibentur §. 1. *h. t.* Si postremum hoc fieret, substitutionem *reciprocam* dixere veteres *l. 4. §. 1. ff. de vulgar. & pupill. substit.* Reciprocae autem substitutionis usus ante legem Papiam vix ullus erat. Nimirum reciproca heredum institutio eo potissimum pertinet, ut deficientes hereditatis partes deferantur heredibus primo gradu scriptis. Atqui coheredes olim sine substitutione reciproca deficientes hereditatis partes ob jus accrescendi necessario nanciscebantur: aliter partim testatus, partim intestatus paterfamilias obiisset. Enimvero per legem Papiam deficientes hereditatis partes caducorum nomine ærario deferri placuit. Ita jus accrescendi inter coheredes sublatum fuit. Conf. Heinecc. ad *leg. Jul. & Pap. libr. 3. c. 4. & sequ.* Exinde igitur heredum primo

mo loco scriptorum substitutiones reciprocae frequentissimæ evaserunt. Scilicet lege Papia fisco quidem jubebantur addici deficientes hereditatis partes, reciprocae tamen heredum substitutiones non vetabantur. Proinde testatores, qui legem Papiam caducariam vellent eludere, ipsos heredes primo gradu institutos invicem substituebant. Ita enim deficientes hereditatis partes ipsis heredibus ob reciprocam substitutionem cedebant; ærarium autem prorsus excludebatur. Verum Justinianus heredibus vetus jus accrescendi restituit, ac legem Papiam caducariam omnino sustulit *l. unic. C. de caduc. tollend.* Hodie igitur sine reciprocae substitutionis auxilio deficientes hereditatis partes heredes acquirunt. Nunc cum Triboniano videndum, quas tandem hereditatis partes jus civile substitutis deferri jubeat.

VII. Quod ad hereditatis partes substitutis debitas, ea in re pro diverso substituendi modo diversum jus esse placuit. Nimirum siquidem unus uni sit substitutus, substitutus instituti partem habebit: sin plures pluribus, substituti ex partibus æqualibus heredes erunt, licet institutis inæquales partes testator adscripserit. Id necessitas ipsa suavit: neque enim ea in specie dignosci potest, quis cui sit substitutus. At vero si ipsi heredes ex disparibus partibus in institutione scripti mutuo sint substituti, easdem in substitutione partes eis præsumitur dedisse testator, quæ in institutione fuerint expressæ §. 2. *h. r.* Quapropter si primus ex uncia, secundus ex besse, tertius ex quadrante sint instituti, iique invicem substituti fuerint, deficiente tertio, in novem partes dividendus est quadrans ei in institutione relictus: pro rata autem in insti-

tutione relicta pars una addicetur primo, octo secundo *l. 24. ff. de vulgar. & pupillar.* Id ita placuit, quia præsumi non potest, magis in substitutione, quam in institutione a testatore heredes dilectos fuisse. Inde factum, ut legata ab institutis relicta a substitutis repetita videri debeant, si evidens testatoris voluntas aliud non suaserit *l. 74. ff. de legat. 1.*

IX. Denique in hoc argumento vulgata juris est regula, *substitutum substituto instituto etiam substitutum intelligi §. 3. h. t.* Proinde primo, & secundo heredibus institutis, & in primi locum substituto secundo, si tertius etiam secundo substituat, primo, & secundo deficiente, tertius non solum in secundi, sed & in primi partem jure substitutionis admittitur. Hujus sententiæ princeps, & auctor Julianus fuit in *l. 27. ff. de vulgar. & pupillar. substit.* eamque rescripto suo firmavit etiam Antoninus *d. §. 3. h. t.* Ejus jurisprudentiæ ratio inde pendet, quod tertius substitutus secundo substitutus intelligitur in partes omnes, quæ secundo deferri poterant. Atqui in proposita specie deficiente primo, tota quidem hereditas secundo delata fuisset. Nam semis quidem ad eum pertinuisset tamquam coheredem, semis vero tamquam substitutum primo. Vide Donell. *comment. 6. 24. 9.* Falluntur igitur, qui in prædicta specie totam hereditatem tertio deferri statuunt accrescendi jure. Jus enim accrescendi in eo tantum admitti potest, qui heres exitit ex parte sua. Hinc alluvionis exemplo accrescere dicitur portioni portio in *l. 33. ff. de usufruct.* Neque regeas, effectu juris nil interesse, utrum substitutionis, an accrescendi jure tota tertio deferatur hereditas. Si enim

enimingas, in proposita specie secundum tantum deficere, jure substitutionis tertius primum excludet a secundi parte, quem jure tamen accrescendi haud excluderet. Jus scilicet accrescendi cum jure substitutionis concurrens est minus efficax: in eo igitur concursu qui nudum jus accrescendi habet, a substituto vincitur. Vide Vinnium ad d. §. 3. h. t.

T I T U L U S XVI.

De pupillari substitutione.

PER pupillarem substitutionem paterfamilias heredem scribit liberis suis heredibus, si in ætate pupillari decesserint *princ. h. t.* Pupillaris autem substitutus non solum in omne pupilli patrimonium a patre relinqui solitum, sed & in ipsius impuberis bona succedit, quæ aliunde is fortasse quæsierit *l. 10. §. 5. ff. de vulgar. & pupillar. substit.* Inde fit, ut vulgaris quidem substitutio vera substitutio sit: per eam enim, ut vidimus, gradu secundo ipsi testatori succeditur. Contra substitutio pupillaris potius institutio videri debet: per eam enim gradu primo pupilli hereditas substituto desertur. Substitutionem autem pupillarem *in alterum*, seu secundum casum veteres fieri dixerunt. Id inde fortasse factum, quia pupillaris substitutio post vulgarem fuit inventa. Nimirum ob latissimam testandi facultatem patrifamilias in jure Decemvirali concessam in ipsis duodecim tabulis vulgaris substitutio contineri videbatur: vulga-

gariter enim substituendo testator, licet in gradu secundo, sibimet tamen heredem instituit. Contra pupillaris substitutio in duodecim tabulis concessa non credebatur. In pupillari enim substitutione pater non sibi, & in patrimonio suo, sed alteri, & in alienis rebus scribit heredem. Ea fortasse de causa pupillariter substituendi facultatem parentibus denegaverè veteres. Paulatim tamen ob ipsum pupillorum favorem pupillaris quoque substitutio per mores recepta fuit. Ex pupillari substitutione scilicet duplex redibat in pupillum commodum. Primo enim per eam pupillus testamenti factione carens cum testamento videbatur obire. Deinde pupillis pupillari substituto dato, eorum vita tutior esse credebatur adversus agnatorum insidias. In extrema scilicet testamenti parte separatim plerumque scribebatur substitutio pupillaris; prohiberi quoque solebat, ne ea aperiretur, donec pupillus annos pubertatis excederet §. 3. *instit. h. t.* & Caius *instit. libr. 2. tit. 4. §. 2.* Cum igitur ignorarent agnati, quis substitutus pupillo foret, insidias ejus vitæ non moliebantur. Nemo enim facinus aggreditur, cujus emolumentum ad alios pervenire possit. Hinc intelliges, cur adversus pupilli utilitatem facere dicatur, qui pupillarem substitutionem impugnat *in l. 42. princ. ff. de acquir. vel omittend. heredit.* Ut autem pupillaris substitutio firmitatem obtineat, in ea præscripta legum servari debent. Præscripta isthæc partim ab ipsorum liberorum persona pendent; partim aut in externis solemnibus, aut externa substitutionis forma versantur. De singulis pro instituto videbimus.

II. Quod ad primum igitur, pupillaris substitutio ex ipsa patria potestate manat. Proinde non
omni-

omnibus promiscue liberis pupillariter substituere licet, sed impuberibus tantum in potestate, quique post testatoris obitum in alterius potestatem non sunt recasuri. Quapropter impuberibus tantum suis heredibus parens pupillariter substituere potest *l. 2. princ. ff. de vulgar. & pupillar. substit.* Si sui heredes sint parenti impuberes, ipsis eo modo substitui poterit sine sexus, gradusve discrimine, seu natis, seu nascituris *d. l. 2. princ. ff. eod.* Nepotes, si superstes sit in potestate filius, sui heredes avo non sunt: ii igitur ex testamento avi pupillarem substitutum habere nequeunt. Patre tamen prærepto, in sui heredis locum nepos statim succedit: ita nepotibus etiam, quos præcedit filius, ex secundo capite legis Junia Vellejæ avus substituere poterit. Id autem rite factum intelligetur, si extrema sua judicia avus ita componat: *filius meus heres esto: si filius meus me vivo suus heres esse desinet, tunc qui mihi ex eo nepos est, heres esto. Si nepos heres erit, & intra pubertatem decesserit, Sempronius heres esto d. l. 2. princ. ff. de vulgar. & pupillar. substit. & l. 29. §. 13. ff. de liber. & postum.*

III. Jam vero liberis non tantum scriptis heredibus, sed exheredatis etiam pupillariter parens recte substituit *§. 4. instit. h. t.* Inde fit, ut substitutio pupillaris sub duplici possit conditione fieri. Si enim ipse impubes a parente sit scriptus heres, in substitutione ordinanda conditio hæc apponetur; *si filius heres erit, & in ætate pupillari decesserit, Sempronius heres esto.* Si vero exheredatus fuerit impubes, ei pupillaris substitutus sub simplici conditione dabitur, *si intra pubertatem decesserit princ. instit. h. t.* Utrovis modo
 pu-

pupillis substitutum fuerit, substitutio seu in masculis, seu in foeminis evanescit per pubertatis adventum §. 8. *instit. eod.* Quid si substitutio pupillaris a parente ultra pubertatem producta fuerit? Non semel in jure civili utile per inutile non vitiatur. Proinde si ultra pubertatem parens substitutionem pupillarem extenderit, mentio temporis post pubertatem adjecti detrahetur potestate juris; substitutio autem intra pubertatem firma consistet l. 14. ff. *de vulgar. & pupillar. substit.* Liberos igitur post pubertatem, ut ceteros heredes extraneos, fideicommissaria tantum substitutione gravare licet §. ult. *instit. h. t.* Dubium tamen videri queat, an directa patris substitutio ultra pubertatem extensa post pubertatem filii in fideicommissariam sit convertenda. Negarunt id passim interpretes, ne quod propter utilitatem pupilli fuit admissum, eidem jam puberi obsit in facultate testandi. Ne singulos memorem, ita visum Goveano, Duareno, Cujacio *observat.* 11. 25. Contra post Donellum *comment.* 6. 25. 23. non pauci statuunt, eo casu substitutionem pupillarem post pubertatem pupilli in fideicommissariam converti oportere. Adversus eos late disputat Vinnius ad d. §. 8. *h. t.* sed ejus argumenta hausta sunt ex jure veteri. Juris autem novi ratio videtur exposcere, ut ea in specie substitutio post pubertatem convertatur in fideicommissi causam. Inspecto enim jure novo ex tacita quoque testatoris voluntate fideicommissum admitti debet l. 2. C. *commun. de legat.* Ne igitur inutilis sit testatoris voluntas, substitutio isthæc post filii pubertatem taciti fideicommissi jure censebitur. Conf. Heinecc. ad *Vinn. d. §. 8. h. t. n. 3.* Sed, his omissis, de substiti-

stitutionis pupillaris externis solemnibus pauca subnectamus.

IV. Quod ad pupillaris substitutionis externa solemnia, ea in re illud statuendum in primis, pupillarem substitutionem ipsius testamenti paterni partem, & sequelam esse §. 5. *h. t.* Inde autem aperte liquet, in præfenti argumento patris testamentum principale esse, filii vero substitutionem accessionem testamenti paterni. Hinc patris respectu tria desiderantur, ut substitutio pupillaris consistat: Primo enim oportet, ut sibi parens re vera testamentum faciat: aliter absurdum foret, obeuntem intestato quempiam heredem aliis dare vellet *l. 2. §. 1. ff. de vulgar. & pupill. substit.* Deinde primum instituere sibi debet heredem parens, mox liberis substituere. Inutilis igitur substitutio pupillaris erit, si, converso scripturæ ordine, primum liberis substituatur parens, deinde sibi scribat heredem. Rem aperte docet Ulpianus *in d. l. 2. §. 4. ff. eod.* Verum idem Ulpianus contrarium diserte scribit *in d. l. 2. §. 5.* Ibi enim jurisconsultus generatim edicit, conversum scripturæ ordinem substitutioni haud officere, si quis primum gnato substituatur, mox eundem sibi jubeat heredem esse. Vinnius, Duarenus, aliique tantum non omnes nodum ita solvunt, ut si parens primum substituatur filio, deinde ex intervallo sibi scribat heredem, inutilis sit substitutio. Sini conjunctim utrumque faciat, substitutio non vitietur. Verum eam distinctionem Ulpiani verba non ferunt. Proinde eorum sententiam sequi malim, qui, filio quidem exheredato, scripturæ ordinem converti non posse statuunt; id ipsum tamen non prohiberi, si a parente filius heres sit institutus. Fa-

vor

vor parentis scilicet, qui filium scripssisset heredem, eam juris subtilitatem negligi postulabat. Vide de tota re Donellum *comment. 6. 25. n. 30. & sequ.*

V. Denique ad pupillaris substitutionis firmitatem illud quoque requiritur respectu patris, ut secundum testamenti tabulas adita sit ejus hereditas §. 5. *h. t. & l. 2. §. 1. ff. de vulgar. & pupillar. substit.* In ea re tamen differt jus Romanum vetus a novissimo Justiniani jure. Veteri jure scilicet quacumque de causa infirmaretur institutio patris, infirmabatur etiam substitutio pupillaris. Verum jure novissimo si rescissum testamentum fuerit inofficiosi querela, substitutio pupillaris non infirmatur. Cautum enim a Justiniano fuit, ut si inofficiosi querela testamentum rescissum foret, sola parentis institutio infirmaretur; cetera vero testamenti capita firma consisterent *novell. 115. c. 3.* Si hinc discedas, ex ipso jure novissimo substitutio pupillaris corruet, si aliis fortasse de causis testamentum patris sit infirmatum. Enimvero si ipse pupillus a parente scriptus sit heres, ea quoque in specie pupillaris substitutio vim suam obtinet, licet pupillus hereditate patris se abstinuerit. Pupillus in potestate scilicet necessarius heres parenti est. Juris necessitate igitur patris hereditas ei defertur §. 2. *instit. de hered. qualit. & different.* Eam juris asperitatem elusit edictio Prætor. Liberris enim facultatem concessit se abstinendi a parentis hereditate *d. §. 2. de hered. qualit. & different.* At vero per jus abstinendi liberis in edicto concessum eis Prætor prodesse, non obesse voluit. Cum igitur substitutio pupillaris pupillo prodesset, eam post abstentionem Prætor evanescere ve-

vetuit: ut autem ea consisteret, filios post ipsam abstentionem fingi iussit patris heredes. Hinc nudum sui heredis nomen tabulas pupillares confirmare dicitur in *l. 41. ff. de adquir. vel omiss. hered.* Nunc, quod superest, de externa substitutionis forma pauca moneamus.

VI. Primum omnium qui decedens plures impuberes habet in potestate, is aut singulis pupillariter substituere potest, aut ei, qui novissimus intra pubertatem obierit §. 6. *h. t.* Si singulis substituerit, quisque heredem habebit ex testamento. Sin ei tantum, qui novissimus intra pubertatem obierit, is tantum ex testamento heredem habebit; inter ceteros jus legitimarum hereditatum servabitur *l. 37. ff. de vulgar. & pupillar. substit.* Postrema tamen in specie a jure veteri distant novissimæ Justiniani leges. Jure veteri scilicet mater a pupilli fratribus seu germanis, seu consanguineis excludebatur. Igitur in hereditate filii obeuntis intra pubertatem pupilli superstites matri præferbantur. Ita pupillo novissimo morienti substitutus omnium hereditates consequabatur per matris concursum non imminutas. Contra jure novissimo fratres defuncti consanguineos mater excludit; cum germanis in capita admittitur *novell. 118. c. 2.* Igitur jure novissimo substitutus impuberi novissimo morienti hereditates fratrum intra pubertatem præmortuorum non consequitur integras: ad eum pertinebunt tantum partes, quæ impuberi ultimo morienti delatæ fuerint in concursu matris.

VII. Porro substitui potest impuberi aut speciatim, aut generatim etiam §. 7. *h. t.* Speciatim pupillo substituitur, si substitutus nominatim fuerit expressus. Ejusmodi substitutio erit, si, filio
he-

herede scripto, statim testator addat: *si filius meus intra pubertatem decesserit, Sempronius heres esto.* Generatim pupillo substitutum videbitur, si, pluribus heredibus sibi institutis, ei pater ita substituat: *quisquis mihi heres erit, idem filio meo impuberi heres esto.* Si postremo hoc modo substituat, post pupilli mortem ex substitutione vocari scribit Tribonianus, *qui & scripti sunt heredes, & extiterunt, & pro qua parte heredes facti sunt d. §. 7. h. t.* Iis autem verbis triplex ostenditur effectus substitutionis formula generali factæ. Primo enim in substitutione formula generali facta ii tantum vocati censentur, qui heredes scripti fuerint, non vero alii, ad quos ratione potestatis commodum hereditatis fortasse pervenerit. Ita quidem si filiusfamilias scriptus heres hereditatem patri quæsierit, si ante impuberis obitum emancipatus is fuerit, ipse, non pater, heres ex substitutione fiet *l. 8. §. 1. ff. de vulgar. & pupillar. substit.* Deinde si in pupillari substitutione generalis formula fuerit adhibita, intra pubertatem decedente pupillo, ii tantum admitti debent, qui re ipsa patri extiterunt heredes: Si quis igitur patris hereditatem repudiarit, ad capiendam hereditatem impuberis ei non prodest, quod heres a patre sit institutus *d. l. 8. §. 1. ff. eod.* Denique si generali formula substitutum pupillo fuerit, heredes easdem in substitutione partes habuisse intelliguntur, quas in institutione patris acceperint *d. l. 8. §. 1. ff. eod.* Vide doctor. ad *d. §. 7. h. t.*

VIII. Ex dictis hactenus aperte liquet, in specie substitutionis pupillaris, ut duæ sunt hereditates, ita & testamenta duo distinguere oportere, alterum quidem patris, alterum vero filii. Id ipsum tamen

tamen subreverenter ac timide edicit Tribonianus. Ita enim scribit §. 2. *h. t. In pupillari substitutione secundum præfatum modum ordinata duo quodammodo sunt testamenta, aut certe unum testamentum est duarum causarum, id est duarum hereditatum.* Ita Tribonianus loquitur, quia veteres jurisconsulti in casu substitutionis pupillaris unum etiam testamentum non infrequenter agnoscunt. Unus enim erat in ea testator, nec plura testamenti solemnia *l. 20. princ. ff. de vulgar. & pupillar. substit.* In ea re scilicet diverse loquuti sunt veteres: prout autem substitutioni pupillari, & ipsi impuberi expediret, ea in specie modo unum, modo duplex testamentum agnoscebant. Ita quidem ut pupillaris substitutio facilius consisteret, in testamento septem testes, septem signa sufficere statuebant, quasi testamentum patris, ac filii diversum non esset *d. l. 20. princ. ff. eod.* Contra ob pupilli quoque favorem in casu pupillaris substitutionis duplex aliquando testamentum agnovere veteres. Ita quidem quasi in ea specie duplex testamentum esset, filio per nuncupationem, sibi per scripturam testamentum patrem facere posse docuerunt *d. l. 20. §. 1. ff. de vulgar. & pupillar. substit.* Ita quoque, licet alias uno contextu fieri testamenta debeant, valebat substitutio, si, perfecto sibi testamento, parens alio tempore filio substitueret. Ea tamen in specie in substitutione quoque legitimus testium numerus est adhibendus *l. 16. §. 1. ff. eod.*

IX. Cum in casu substitutionis pupillaris duplex aliquando testamentum jus fingat, dubium videri queat, an legitima matri debeatur ex hereditate pupilli, cui extraneum pater pupillariter substitue-

rit. Ratio dubitandi inde promanat, quod matri competat inofficiosi querela, si in testamento filii ei legitima relicta non fuerit *novell. 115. c. 4.* Substitutio autem pupillaris veluti ipsius filii testamentum in jure censetur. Verum aperte matri contrarius est Ulpianus in *l. 8. §. 3. ff. de inoff. testam.* Ejus juris ratio ab ipsa querelæ origine repetenda est. Nimirum inofficiosi querela eo colore inolevit olim, quasi non sana mente testator legitimam ei denegasset, cui deberetur. Verum pupillus quidem, qui non ipse sibi scripsisset heredem, ea de causa accusari non poterat: eadem de causa testatoris judicium frustra impugnasset uxor: Nam adversus viri testamentum uxori querela non datur. Quod tamen diximus, a substituto pupillari in ipsa legitima excludi matrem, id admittunt quidam, si substitutio pupillaris fuerit expressa. Si tamen ea sit tacita, quæ scilicet in vulgari expressa continetur, ea in specie in tota hereditate matrem substituto præferunt. Ita non pauci post glossam ad *l. 9. C. de institut. & substit.* Verum sententia isthæc cum divorum Fratrum constitutione aperte pugnat in *l. 4. ff. de vulgar. & pupillar. substit.* Inde enim aperte liquet, pupillarem substitutionem expressam vulgarem tacitam complecti, substitutionem etiam vulgarem expressam pupillarem tacitam continere. Si igitur in vulgari expressa pupillaris tacita continetur, in pupillari etiam substitutione tacita nihil a substituto mater vindicare potest. Nam substitutio pupillaris tacita iisdem regulis cum pupillari expressa procedit. Proinde convenientius juri videtur, in ipsa substitutione pupillari tacita per substitutum matrem excludi. Confer Thom. Papillon. *de pupil.*

pillar. substit. c. 6. Neque regeas, novissimo saltem Justiniani jure in casu pupillaris substitutionis tacitæ substituto matrem præferri oportere ob *d. l. 9. C. de institut. & substitut.* Nam ea constitutio ultra speciem a Justiniano definitam extendi non debet, ubi scilicet postumus matri coheres eadem viva decesserit. Ceterum licet sententia isthæc de jure verior videri debeat, æquitatis tamen obtentu contraria sententia pragmaticis magis arripit. Vide Stryk. *in jur. modern. pandect. libr. 28. tit. 6. §. 9.* Sed nos latius isthæc, quam pro instituto. Quod superest igitur, de substitutione quasi pupillari videbimus, qua parentes liberis mentecaptis ultra pubertatem substituere solent.

X. Jure Antejustiniano olim ob animi, corporisve vitium parentes liberis ultra pubertatem substituere non poterant, nisi singulari privilegio id impetrassent a Principe. Substitutio autem ita concessa valebat, quamdiu liberi in eadem valetudine perseverassent *l. 43. princ. ff. de vulgar. & pupillar. substit.* Quod ad liberos mentecaptos tamen Justinianus ejusmodi privilegium porro a Principe expectari noluit. Is enim parentibus utriusque sexus generali lege concessit, ut liberis mentecaptis substituere possent modo haud absimili, quam quo patri impuberibus liberis in potestate substituere licet. Eo jure parentes si usi forent, ad substitutionis pupillaris exemplum omnia mentecapti bona substituto deferri jussit, si is in eadem mentis constitutione decederet *l. 9. C. de impub. & al. substitut. & §. 1. h. t.* Cum igitur ejusmodi substitutionem Justinianus ad exemplum pupillaris indulserit, recte eam interpretes *quasi pupillarem* appellant. Diversa autem est utriusque substitu-

tionis ratio, & diversum utriusque fundamentum. Pupillaris enim, ut supra vidimus, e patria potestate manat; quasi pupillaris e caritate potius parentum in liberos. Proinde substitutio isthæc in multis a pupillari recedit. Primo enim tantum impuberibus in potestate positis pupillariter substituere licet. Verum quasi pupillariter substituere parentes possunt liberis etiam extra sacra paterna constitutis. Hinc non solum pater, aut avus emancipatis liberis, sed ipsa quoque mater, aut avia ita substituere non prohibentur. Dignitas tamen virorum exposcit, ut in utriusque parentis concursu patris potius substitutio præferatur, ut recte rem definit Baldus ad *d. l. 9. C. de impuber. & al. substituitur*. Tantum æquitas ipsa suadet, ne id extendatur ad bona, quæ ab ipsa matre in filium profecta fuerint. Deinde in substitutione pupillari liberius est parentis arbitrium, & ipsos fratres impuberis præterire non prohibetur. Verum in substitutione quasi pupillari id ipsum parenti non licet. Mentecapto enim extraneus substitui tandem poterit, si is liberis, fratribusve careat. Si plures tamen mentecapto sint fratres, eorum unum substituisse sat erit. Conf. Doctores ad *l. 9. C. de impub. & al. substituitur*.



T I T U L U S XVII.

Quibus modis testamenta infirmantur.

AD hereditatis delationem satis haud erit, justum ab initio testamentum esse, nisi & ejusmodi inveniatur in testatoris obitu. Hinc testamenta rite ab initio ordinata ob vitium superveniens inutilia persæpe fiunt. Recte autem ab initio testamenta facta infirmari solent aut ipso jure, vel officio judicis. Ipso jure testamenta infirmantur, si rumpantur, irrita fiant, aut destituantur. Infirmitur officio judicis, si rescindantur per inofficiosi querelam. Utrumque juris articulum hoc, & insequenti rubrica enarrabimus.

II. Primo igitur testamentum recte ordinatum inutile fiet, si ruptum fortasse fuerit. Rumpi dicitur testamentum, si, in eodem statu manente testatore, ipsius testamenti jus vitietur §. 1. *h. r.* Id autem fieri potest non solum agnatione postumi, sed posteriori etiam testamento. Generatim enim primum testamentum posteriori rumpitur, si posterius testamentum recte sit ordinatum §. 2. *h. r.* Id adeo verum est, ut, licet ex posteriori testamento non extet heres, primum quoque rumpatur. Proinde si heres in posteriori testamento scriptus aut vivo testatore decesserit, aut defectus conditione fuerit, aliove quo modo heres haud extiterit, res in causam intestati redit. Nam primum testamentum haud stabit, utpote a posteriori ruptum: posterius etiam firmitate carebit, cum ex

eo hereditas non fuerit adita *d. §. 2. h. r.* Cum vero heres ex certa re scriptus heres ex asse fiat *l. 10. ff. de hered. instituend.* si quis in posteriori testamento ex certa re heres instituatur, is & totam nanciscetur hereditatem, & prius testamentum rumpetur. Enimvero si in posteriori testamento primum quoque testator valere iusserit, tacitum fideicommissum ab eo factum videri debet. Heres igitur in posteriori testamento scriptus re sibi data contentus, aut, si maluerit, quarta Trebellianica ei suppleta, reliquam hereditatem jure fideicommissi restituet heredi in priori testamento scripto *§. 3. h. r.*

III. Causa autem, cur primum testamentum posteriori rumpatur, a veteri Romanorum jure desumi debet. Nimirum & in calatis comitiis testamenta condebantur olim, & ea, ut supra monuimus, totius populi leges esse fingebantur. Quemadmodum igitur lex posterior priorem tollit, licet eam expresse non abroget, ita posterius testamentum priori derogat, licet aperte revocatum non fuerit. Adeo autem certi juris est, primum testamentum posteriori rumpi, ut, si caveat testamento testator, ne posterior sua voluntas priori derogat, ea clausula ejus arbitrium non impediatur. Ea igitur in specie posterius testamentum priori etiam derogabit *l. 22. princip. ff. de legat. 3.* Id ita placuit, ut liberrimum esset extremum voluntatis arbitrium, post quod testator aliud velle non potest.

IV. At vero si quis post testamentum conditum intestatus obire malit, is testamenti tabulas incidere, delere debet *l. 1. §. 8. ff. si testament. tabul. null. extab.* Donec id factum non fuerit, heredi

redi legitimo non proderit, si testator coram septem testibus testamentum valere se nolle dixerit. Si enim, ubi per mortalitatem, aliamve causam perfectum haud fuerit posterius testamentum, quod quis faciendum susceperit, primum testamentum ruptum videri non debet §. 7. *h. t.* multo minus ruptum dici poterit testamentum, si nudis verbis coram testibus id revocatum a testatore fuerit. Olim quidem ex Honorii, & Theodosii constitutione per solum decenni lapsum sine revocatione quoque testamentum tacite revocatum intelligebatur *l. 6. C. Theodos. de testam.* Ex constitutione tamen Justiniani hodie solus decenni lapsus testamentum haud infirmat, nisi & coram testibus saltem tribus revocatum fuerit *l. 27. C. eod.* Igitur ante decenni lapsum per declarationem coram septem testibus factam testamentum revocari nequit. Ceterum casus in jure non desunt, in quibus testamentum rite perfectum ab imperfecto posteriori rumpitur. Id autem primo fiet, si in posteriori testamento imperfecto heredes liberi scripti fuerint. Nam ejusmodi testamentum, quod ad liberos quidem, privilegio prorsus militari censetur *l. 21. §. 1. C. de testam.* Deinde idem admitti placuit, si in posteriori testamento, quinque saltem testibus adhibitis, legitimi scripti fuerint heredes *d. l. 21. §. 3. C. eod.*

V. Ipso etiam jure infirmantur testamenta, quæ irrita fieri dicuntur. Irritum testamentum fieri dixere veteres, si, eo rite condito, capitis deminutionem passus esset testator, quæcumque ea foret, maxima, media, minima §. 4. *h. t.* Scilicet per maximam capitis deminutionem quis servus fiebat, per mediam peregrinus, per minimam

filiusfamilias. Proinde quamcumque capitis deminutionem subiisset testator, testamentum incidebat in casum, unde non poterat per leges incipere. Testatorem enim liberum, civem, ac patremfamilias non solum testamenti tempore, sed & mortis oportebat esse §. 6. *h. t.* Necessario igitur irritum quoque fiebat testamentum eorum, qui servi pœnæ fuissent effecti. Enimvero quatenus ob servitutem pœnæ irrita apud nos testamenta fiant, & quatenus hodie Neapolitani mores in ea re ab jure civili recesserint, exequutus sum *in jur. Regn. libr. 1. tit. 10. §. 6.* Illud autem in jure civili singulare est, quod, si quis pœnæ servitutem per voluntariam mortem effugiat, & mori potius, quam damnari maluerit, irritum ejus testamentum fiat *l. 6. §. 7. ff. de injust. rupt. irrit. fact. testam.* Id ipsum tamen intellige, si ob conscientiam criminis mortem quis sibi consciverit. Nam, ut scribit Ulpianus, *si qui id egerint radio vitæ, vel valetudinis adversæ impatientia, vel jactatione, ut quidam philosophi, in ea causa sunt, ut eorum testamenta valeant d. l. 6. §. 7. ff. eod.*

VI. Jam vero licet, subtilitate juris inspecta, irrita omnino testamenta fierent eorum, qui capitis deminutionem passi essent, ejusmodi tamen testamenta non prorsus negligebat edicto Prætor. Si enim ob capitis deminutionem irritum factum testamentum esset, heredi in eo scripto bonorum possessionem dabat edicto Prætor, si testator decessisset civis, & sui juris §. 6. *h. t.* Id ipsum tamen generatim admitti non debet. Nam perperam quidem Tribonianus ex Prætoris edicto convalescere generatim scribit testamenta irrita per capitis deminutionem facta *loc. cit.* Nimirum ejusmodi te-
sta-

testamenta ex Prætoris edicto convalescere docuere veteres, si ob maximam, mediamve capitis deminutionem ea irrita evalissent *l. 6. §. 12. ff. de injust. rupt. irrit. fact. testam.* Verum si ob minimam capitis deminutionem irritum testamentum fieret, id ex Prætoris edicto non aliter convalescere poterat, quam si ad status redintegrationem recens voluntas accederet, qua testamentum confirmaretur. Rem aperte loquitur Papinianus *in l. 11. §. 2. ff. de bonor. possess. secund. tabul.* Discrimen inde manavit, quod maximam, mediamve capitis deminutionem patrefamilias subeunte, contra ejus voluntatem irritum sit testamentum. Eo igitur in integrum restituto, ac sublato publici juris impedimento, ex ipsius voluntate ratum testamentum manet. Contra qui se dat adrogandum post conditum testamentum, is bona sua omnia ultro transfert in potestatem adrogatoris. Per adrogationem igitur a veteri voluntate recessisse præsumi debet, neque heredes sibi esse velle, quos testamento scripsit. Proinde ea in specie sine nova testamenti confirmatione Prætor bonorum possessionem non dabat.

VII. Denique ipso etiam jure infirmatur testamentum, si ex eo nemo heres extiterit *princip. instit. de heredit. quæ ab intestat. defer.* Ea autem in specie testamentum *desertum*, vel *destitutum* dixerunt veteres *l. 9. §. 2. ff. de liber. & postum.* Destituitur igitur testamentum, seu scriptus heres noluerit, seu nequiverit heres esse *§. 7. instit. eod.* Olim vero cum, hereditate agnita, ultra vires hereditarias teneretur heres, ipsi heredes hereditatem eum ob metum sæpiuscule omittebant. Verum hodie post inventarii beneficium a Justitia-

niano repertum eam ob causam hereditas repudiari vix solet. Ut enim suo loco liquebit, ubi inventarium rite fuerit ab herede confectum, ultra vires hereditarias is conveniri non potest. Proinde ob casum impotentiae tantum desitui hodie testamenta solent. Falso autem docuere quidam, ex jure novissimo fideicommissarios, legatarios hereditatem adire posse, si eam scriptus heres adire nolit. In eam vero sententiam perperam trahunt *novell. 1. c. 1.* Siquidem ibi Justinianus non de casu cavet, quo scriptus heres hereditatem adire nolit, sed de herede potius, qui post aditam hereditatem intra annum defuncti mandatum aliquod implere detrectat: ea autem in specie Justinianus ad legatarios, vel fideicommissarios hereditatem deferri jubet *d. novell. 1. c. 1. Conf. Stryk. in jur. modern. pandect. 28. 3. 12. & Gudelin. de jur. noviss. libr. 2. c. 9.*

T I T U L U S XVIII.

De inofficioso testamento.

Testamentum officio judicis, seu per sententiam infirmari dicitur, si rescindatur per inofficiosi querelam. Per eam enim testamento rescisso, qui injuste exheredati, aut præteriti fuerint, hereditatem evincunt, & res ad causam intestati redit. Querela igitur instituta, duo consequi solet actor; primum, ut nulla habeatur testamenti ratio; alterum, ut ipsi, tamquam ab intestato, adjudicetur hereditas. Proinde inofficiosi que-

querela non præparatio petitionis hereditatis censeri debet, sed hereditatis potius ipsa petitio. Hinc agentem filium inofficiosi querela hereditatem petere scribit Ulpianus in l. 8. §. 8. ff. de inoffic. testam. Ea autem actio querela inofficiosi dicitur, quia per eam actor se exheredatum, præteritumve contendit contra pietatis officium. Parentum enim officium est, hereditatem liberis destinare: id & leges jubent, & ipsi parentes exoptant. Hinc parens, qui manu sua filium scripsit heredem, *dulci officio functus* dicitur in l. 1. C. qui sib. ascrib. in testam. Conf. Bynkersh. observat. 1. 19. Olim quidem ob latissimam illam testandi licentiam patrifamilias in jure Decemvirali concessam inofficiosi testamenti actio apud Romanos ignota fuit. Ipsos igitur liberos in potestate positos, ut occidere, ita & exheredes scribere impune licebat. Enimvero ubi a prisca sanctimonia descivere Romani, testatores non desuerunt, qui injustis de causis liberos aut exheredarent, aut præterirent: liberis quoque deficientibus, parentes, aliosve cognatos caritate proximos ab hereditate prorsus excluderent. Proinde inofficiosi testamenti querelam institutam oportuit, qua, testamento rescisso, injuria isthæ arceri posset.

II. Quod autem ad hujus actionis originem, dissidium fecerunt interpretes. Post Duarenium ad tit. de inoffic. testam. quibusdam placuit, eam a Principum constitutionibus repetendam esse. Contra alii cum Cujacio statuunt, eam lege Glicia fuisse introductam observat. 14. 14. Utraque tamen sententia facile refelli potest. Nam antequam Principes imperitarent, inofficiosi actio apud Romanos ignota non fuit Valer. Maxim. 7. 7. De lege

lege autem Glicia nil certi hætenus produci potuit. Proinde lubens ego prætulerim eorum sententiam, qui inofficiosi querelam auctoritate jurisconsultorum introductam existimant; solitis etiam ipsorum subtilitatibus inventam eam fuisse. Ita enim, salva juris reverentia, eorum testamenta facile rescindi poterant, qui honorem sanguini denegassent. Eo autem ita devenerunt jurisconsulti. Jure civili furiosis non erat testamenti factio: furiosi autem hominis videbatur ab hereditate prorsus excludere liberos, aliosve caritate proximos. Inde concluderunt jurisconsulti, rescindi oportere testamentum inofficiosum, veluti a furioso factum. Hinc ubi ejus rescissionis causam jurisconsulti reddunt, eam a dementia, vel furore testatoris repetunt. Vide *l. 2. ff. de inoffic. testam.* Enimvero querela isthæc ab Justiniano certa lege definita fuit *novell. 115.* Hodie igitur eis, qui contra pietatis officium exheredati, vel præteriti fuerint, ab ipsa lege succurritur, neque eam ob causam ad dementia prætextum deveniri debet. Conf. Bynkersh. *observat. 2. 12.* At vero inofficiosi actio non datur cognatis omnibus, sed solis liberis, parentibus, fratribus. Si qui remotiores cognati fuerint, eos melius facturos Ulpianus ait, si se inani sumptu non vexent *l. 1. ff. eod.* Cum igitur soli liberi, parentes, ac fratres agere inofficiosi possint; primum de liberorum, deinde parentum, postremo de fratrum querela pro instituto videbimus.

III. Primum omnium cum lex quædam naturæ tacita liberis addicat parentum hereditatem, in querela inofficiosi cognatis omnibus liberos ipsos jus civile præfert *princip. h. t.* Eis vero sine dis-

scri-

scrimine querela competet, masculi sint, seu foeminae, seu nati, seu postumi §. 1. *C. 2. h. t. C. l. 6. princip. ff. eod.* Nil interest etiam, in potestate sint liberi, an emancipati, primi, an ulterioris gradus, ex masculis descendant, an foeminis *l. 8. princ. ff. de bonor. possess. contr. tabul. C. l. 5. ff. de inoffic. testam.* Neque tamen omnibus promiscue liberis agere inofficiosi licet, sed iis tantum, qui succedere possunt jure seu civili, seu praetorio. Proinde seu vulgo quaesiti, seu concubinato suscepti paterni testamenti respectu querela carent: paterni testamenti inquam: matris enim respectu ea de causa agere non prohibentur *l. 29. §. 1. ff. eod.* Competet autem querela liberis inique seu exheredatis, seu praeteritis *princ. h. t.* Exheredatos intellige aut a patre, aut parente paterno. Nam liberis, qui a patre, vel paternò parente exheredati non fuerint, non opus querela est: ii enim praeteritionis vitio nullum dicere testamentum possunt. Vide, quae supra monuimus *tit. 13. §. 1. C. sequ.* Praeteritos eos intellige, qui a matre, aut parente materno solo silentio exheredati fuerint. Matri enim, & materno parenti solo silentio liberos exheredare licet. Filiis igitur a matre praeteritis, tamquam si expressim exheredati forent, ad rescindendum matris testamentum solum remedium querelae patet *d. l. 8. princ. ff. de bonor. possess. contr. tab.*

IV. Porro ut a querela filius excluderetur olim, iusta de causa exheredandus, aut praetereundus erat: iudicio autem centumvirali definiri solebat, utrum iusta de causa id factum esset. Valer. Maxim. 7. 7. 1. Ipsam tamen exheredationis, aut praeteritionis causam testamento inferi non oportebat. Cau-
sa

sa enim haud adscripta, testamentum valebat adhuc, neque aliud filio relinquebatur, quam ut ostenderet, se immerito exheredatum esse *l. 5. §. 1. ff. de inoffic. testam.* Verum hæc ferme omnia immutavit Justinianus. Primo enim litibus perimendis opportunum existimans, exheredationis causas certas esse, eas quatuordecim esse iussit *novell. 115. c. 3.* Ibidem ab Imperatore cautum, ut earum causarum aliqua testamento infereretur. Hinc duo disceptant interpretes; primo scilicet, an recte filius exheredetur ex alia causa æqui gravi, vel graviori, licet in prædicta novella non continetur: deinde an valeat testamentum, in quo exheredationis, vel præteritionis causa non fuerit inserta. Quod ad primum, complures existimant, frustra exheredari, vel præteriri liberos ob alias causas æque graves, vel graviore. Ejus sententiæ patroni ab ipsa Justiniani mente argumentum desumunt. Aiunt scilicet, ejusmodi causis definendis Justinianum judiciorum incertitudinem arcere voluisse; alias igitur exheredationis, aut præteritionis causas admitti non oportere, ne contra Justiniani providentiam res redeat ad vetus incommodum. Negari quidem non potest, eam sententiam Justiniani menti esse apprime consonam: verum ipse Imperator viam ostendisse videtur, qua contra ipsius mentem sexcentæ aliæ exheredationis causæ admitti debeant. Nimirum inter exheredationis causas eam quoque recenset Justinianus, si parenti filius *gravem, & inhonestam injuriam ingesserit d. novell. 115. c. 3. §. 2.* Injuria sexcentis modis inferri potest. Igitur post ipsam Justiniani providentiam exheredationis causæ & complures effingi possunt, & incertæ videri debent. Conf. Bynkersh.

kersh. observat. §. 5. Quod ad alterum, ratum ab initio testamentum existimandum videtur, licet exheredationis, vel præteritionis causa in eo non inferatur. Nam causæ expressionem non ibi præscribit Justinianus, quasi internam aliquam testamenti sollemnitatem, qua omissa, testamentum ab initio nullum censeri debeat. Interest tamen, utrum exheredationis causa in testamento adjecta, an omissa fuerit. Si enim inserta testamento fuerit exheredationis causa, ejus falsitatem ipse filius debet ostendere. Sin ea in testamento fuerit omissa, heres probare debet, juxta de causa filium exheredatum esse. Vide Noodt. ad *pandect. b. r. n. 7.*

V. Post liberos parentibus querela datur. Turbato igitur mortalitatis ordine, liberorum est, hereditatem parentibus superstitibus solatii loco relinquere. Si, neglecto pietatis officio, secus liberi testamento caveant, adversus impia eorum judicia parentes querelam instituere poterunt §. 1. *b. r.* Inofficiosi autem agere parentes possunt nullo discrimine, seu exheredati, seu præteriti fuerint. Silentium enim liberorum respectu parentum pro exheredatione est. Ad querelam vero instituendam in parentibus nil ultra requiritur, quam ut liberis succedere possint jure seu civili, seu Prætorio. Cum igitur hereditatem filii spurii, aut naturalis jus Romanum matri ab intestato deferat, ipsa meretrix, aut concubina adversus testamentum filii querela uti non prohibetur. Id autem ad servandam æqualitatem necessario admitti debet. Nam adversus matris testamentum quoque filii naturales, aut spurii recte querelam instituunt *l. 29. §. 1. ff. de inoffic. testam.* Id ipsum tamen ad spurii, vel naturalis patrem extendi

tendi non debet. Spurii enim pater incertus est: naturali autem filio concubinum jus vetat ab intestato succedere. Quod vero de liberis supra monuimus, parentes etiam querelam tandem instituerent poterunt, si injuste seu exheredati, seu præteriti fuerint. Ad Justinianum autem usque incertæ fuere causæ, ob quas parentes a liberis exheredari, vel præteriri possent. Is primus ad tollendam juris incertitudinem octo tantum ob causas a liberis parentes exheredari, vel præteriri concessit. *Eæ prostant in novell. 115. c. 4.*

VI. Quod ad querelam fratribus competentem, libera Republica æque cum liberis, & parentibus fratres saltem consanguinei de inofficioso fratris testamento queri fortasse poterant. Si enim inofficiosa actio amicis concedebatur Valer. Maxim. 7. 8. multo magis eam fratribus concessam oportuit. Verum Pauli jurisconsulti ævo ea de causa fratribus tandem licebat agere, si in fratris testamento libertus, aut extraneus institutus esset *l. 31. §. 1. ff. de inoffic. testam.* Extranei dicuntur apud Paulum, qui alterius sunt municipii, ut recte docuit Jacobus Gothofredus ad *l. 1. C. Theodos. de inoffic. testam.* Atque hæc olim de querela fratrum jurisprudentia Romana fuit ad Constantinum usque. Is primus querelam fratres habere jussit, si aut liberti, vel infames, vel levis etiam notæ macula aspersi homines scripti fuissent heredes *l. 1. C. 3. C. Theodos. eod.* Recte autem *loc. cit.* Gothofredus observat, ex constitutione Constantini fratres ea tandem de causâ agere potuisse, si & consanguinei saltem forent, & in eadem familia esse pergerent. Verum Justinianus primo ad sorores etiam consanguineas querelam extendit *l. 27. C. eod.*
De.

Deinde sorores etiam uterinas tacite saltem ad querelam admisit *novell.* 118. c. 3. Ibi scilicet ad successionem legitimam sorores uterinas una cum consanguineis admitti iussit Justinianus. Si igitur uterinæ una cum consanguineis ab intestato succedunt, æque ac consanguineæ querelam instituere poterunt, si præteritæ testamento fuerint. Saltem consanguinearum victoria uterinis etiam prodesse debet: nam intestatum patremfamilias querela facit *l. 6. §. 1. ff. de inoffic. testam.* Passim autem statuere doctores, ex *novell.* 22. c. 46. & sequ. tres etiam ob causas fratres, ac sorores seu exheredari, seu præteriri posse. Probabilior tamen videri debet sententia existimantium, nullas causas in jure definitas ea de re in persona fratrum; eos pro lubitu testatoris præteriri posse; eis querelam tandem instituere licere, si turpis persona sit instituta. Conf. Samuel de Cocc. *in jur. controvers. libr. 5. tit. 2. quæst. 9.*

VII. Hactenus quidem ostendimus, solos liberos, parentes, fratres, sorores querelam instituere posse. Idem tamen non æque omnes ad querelam veniunt, sed quo quisque ordine ad legitimam successionem admittitur. Enimvero si quis ordine, vel gradu prior querelam expertus haud fuerit, seu quia noluerit, seu quia nequiverit, sequens ordine querelam instituere poterit. Proinde si quis liberos exheredarit, & adversus filios pronunciatum fuerit, justa de causa exheredatos esse, pater ordine proximus recte querelam instituet *l. 14. ff. de inoffic. testam.* Victis enim in querela liberis, de sua injuria parens experiri potest. Nam liberis quidem ingratissimus testator usus parentem optimum habere potuit. Ceterum cum intestatum patrem-

familias querela faciat *d. l. 6. §. 1. ff. eod.* si unus sit testatori filius, is totam hereditatem per querelam evincet: sin vero plures, cuique tantum ex hereditate dabitur, quantum habiturus fuisset, patre sine testamento mortuo. Inspecito autem jure novissimo, si admissa fuerit inofficiosi querela, paterfamilias partim testatus, partim intestatus plerumque obit. Cautum enim a Justiniano fuit, ut, per querelam testamento rescisso, heredis tantum institutio rescinderetur; verum legata, fideicommissa, & reliqua testamenti capita firma consisterent *novell. 115. c. 3.*

VIII. Atque hi quidem querelæ erunt effectus, si intentionem suam impleverit actor. Cum tamen iudicium istud injuriosum videretur adversus defuncti memoriam, cum, qui victus querela foret, amittere voluere veteres, quicquid testamento accepisset: id autem tamquam indigno ablatum fisco vindicatur *l. 8. §. 14. ff. de inoffic. testam.* Verum id ipsum in eo tantum admittendum edicit Ulpianus, qui in lite ad sententiam usque perseveraret. Si quis enim a querela destitisset, vel decessisset ante sententiam, ei injuriam adversus defunctum leges remitti jubent. Nam in dubio voluntatis eventu resipiscentiam in actore leges præsumunt *d. l. 8. §. 14. ff. eod.* Rursus cum ob crimen alterius alteri damnum inferri non debeat, si alteri restituendum esset, quod testamento legatum foret actori, id ei tanquam indigno non adimebatur *d. l. 8. §. 14. ff. eod.* Non adimebatur actori quoque legatum, si officii necessitate compulsus oppugnaret alieno nomine testamentum. Eo pertinet tutoris exemplum, qui non amittit, quod ei testamento relictum fuerit, si pupilli exhereditati

dati nomine de inofficioso egerit §. 5. *instit. h. a.*

IX. Ex dictis hætenus aperte liquet, querelam inofficiosi odiosam censuisse veteres. Quemadmodum igitur res alias odiosas coercent leges, ita in complusculis quoque casibus querelam denegant. Hinc *ultimum adiutarium* querela dicitur in *l. ult. C. de liber. præter.* Primo igitur ad hoc iudicium deveniri non debet, quoties alia via hereditatis vindicandæ patet §. 2. *h. t.* Proinde cum filii a patre præteriti vitio præteritionis nullum ab initio dicere testamentum possint, ad querelam non admittuntur. Deinde querela filius uti non potest, si ei renunciarit seu palam, seu per consequentiam *l. 17. ff. de inoffic. testam.* Palam querelæ renunciant, qui expresse testantur, ad eam venire se nolle: per consequentiam querelæ renunciant, qui tacto aliquo testamentum probant. Ita quidem per consequentiam querelæ renunciatum videbitur, si quis post patris obitum testamento subscribat, se consentire *l. 31. §. 4. ff. eod.* Post patris obitum inquam. Si enim in vita parens cum filio paciscatur, ne post mortem suam querelam instituat, eam filius instituere non prohibetur. Nam meritis potius, quam impiis pactionibus ad paternum obsequium provocandi sunt liberi *l. 35. §. 1. C. eod.* Rursus querela perimitur, si ea intra quinquennium instituta non fuerit *l. 8. §. ult. ff. eod.* Intercidit quoque querela per ipsius exheredati mortem, si ea ante ipsius obitum non sit præparata. Præparata autem querela videbitur non solum per litis contestationem, aut oblationem libelli, sed per simplicem quoque litis comminationem *l. 7. ff. eod.* At vero querela non præparata ne in liberos quidem suos heredes jure

veteri transmitti poterat. Secus tamen Justiniano placuit. Is enim querelam non præparatam in liberos transmitti iussit *l. 34. C. eod.* Denique querela cessat, si bona mente exheredatus fuerit a patre filius. Ita quidem querela denegatur, si, nepotibus institutis, filius prodigus exheres esse jubeatur, eique tantum alimenta legentur *l. 16. §. 2. ff. de curat. furios.*

X. Porro ad excludendam querelam legitima illis est relinquenda, quibus querelam instituere licet. Legitima, jure pandectarum inspecto, pars hereditatis est quarta *l. 8. §. 8. ff. de inoffic. testam.* Seu unus autem, seu plures sint illi, qui querelam instituere possunt, eis una tantum quarta debetur inter omnes æque dividenda *§. 6. instit. h. rit.* Quartam computari placuit, deducto ære alieno, impensa funeris, ac servorum manumittendorum pretio *d. l. 8. §. 9. ff. eod.* Jure autem pandectarum olim uniusmodi legitima fuerat, seu plures, seu pauciores essent illi, quibus querela competeret. Verum Justinianus legitimæ quantitatem auxit; eandem pro diverso liberorum numero iussit diversam esse. Si enim liberi quatuor, aut pauciores forent, legitimam minorem esse triente noluit; sin plures essent, eam ad semissem pertingere iussit. Eandem legitimæ quantitatem Justinianus observandam edixit *in personis omnibus, in quibus ab initio antiquæ quartæ ratio lege de inofficioso decreta foret novell. 118. c. 1.* Ea autem verba sat arguunt, legitimam auctam ab Justiniano fuisse non minus in liberis, quam in parentibus, aliisque, quibus querelam instituere licet. Ceterum jure veteri si minus legitima legatum esset, adhuc erat querelæ locus. Secus tamen

De heredum qualitate, & differ. 181
 men Justinianus edixit. Nam ne testamenta rescinderentur, ab eo cautum, ut, si minus legitima legatum esset, non institueretur inofficiosi querelato igitur testamento manente, legitimæ tantum supplementum peti concessit *l. 30. princ. C. de inoffic. testam.* Eam tamen legitimæ suppletionem fieri iussit Justinianus ex ipsa testatoris hereditate. In legitimam igitur imputari nequit, si quid jure adventitiæ ad filium fortasse perveniat *l. 36. princ. C. eod.* Idem Justinianus ad arcendam exheredationis injuriam legitimam totam, ejusve partem institutionis titulo relinqui iussit *novell. 115. c. 3.* Nam olim quidem querela cessabat, quocumque modo legitima accepta foret seu jure legati, seu fideicommissi, seu donatione inter vivos, mortisve causa §. 6. h. t.

T I T U L U S X I X .

De heredum qualitate, & differentia.

PRO ipsorum heredum diversitate diversæ hereditas acquiri potest. Proinde diversos hereditatis acquirendæ modos hic enarraturus Tribonianus *de heredum qualitate, & differentia* hic titulum interponit. Triplex autem heredum genus jus civile distinguit, *necessarios* scilicet, *suos & necessarios*, *extraneos* denique *princ. h. t.* Heres necessarius dicebatur olim servus ab ipso domino heres testamento scriptus. Heres necessarius appellatus is fuit, quia, vellet, nollet, statim post testatoris obitum necessitate juris, ac sine additione fiebat heres §. 1.

h. r. Frequenter autem servos suos heredes instituebant domini, qui facultates suas suspectas haberent. Deserto scilicet testamento ejus, qui solvendo non esset, ipsius bona post mortem publice vendebantur. Bonis vero ita divenditis, infamia quadam defuncti memoria credebatur aspergi. Quapropter ad eam ignominiam amoliendam concessum fuit civi Romano, ut ei liceret, heredem servum suum testamento scribere. Ita enim servi potius nomine vendebatur hereditas, & a defuncto ea infamia arcebat. Quæcumque autem facultates hereditatis forent, servus liber, & heres factus necessitate juris omnia defuncti debita adigebatur exolvere. Cum vero heredis necessarii ea conditio durior videretur, ei solatii loco concedi placuit, ut separationem bonorum petere posset. Ea autem impetrata, non ultra vires hereditarias tenebatur libertus. Si quid igitur vel fortunæ beneficio, vel amicorum liberalitate, vel industria sua quæсивisset, id ei a creditoribus auferri non poterat *l. 1. §. 18. ff. de separat.*

II. Heredes sui, & necessarii dicuntur in jure liberi, qui in potestate morientis sunt, & primum obtinent in familia locum *§. 2. h. r.* Ii autem sui heredes sunt appellati, quasi proprii, & naturales heredes: proinde eos heredes domesticos appellat Tribonianus *d. §. 2. h. r.* Vide Jan. a Cost. ad *princ. inst. h. r.* & Anton. Schulting. ad *Caii instit. 2. 3. n. 51.* Ex suitate autem manat, ut liberi ipso jure, ac sine aditione fiant heredes *l. 14. ff. de suis, & legit.* Inde fit, ut in suo herede quasi continuetur defuncti dominium, & suo herede superstiti, hereditas jacens dici non possit *l. 11. ff. de liber. & postum.* Sui vero heredes heredes

des quoque sunt necessarii. Et ipsi enim exemplo servorum patris hereditatem repudiare nequeunt, nisi necessitas isthæc eis a parentibus remissa testamento fuerit *l. 86. princ. ff. de hered. instit.* Ea igitur necessitate liberi creditoribus, & reliquis oneribus hereditariis obstringebantur inviti, neque damnosam parentum hereditatem repudiare poterant. Enimvero eos miseratus edicto Prætor ex necessariis heredes voluntarios esse jussit, concessio liberis beneficio se abstinendi a parentis hereditate *§. 2. h. t. & l. 57. princ. ff. de acquir. vel omittere. hered.* Ubi enim eo beneficio liberi usi forent, effectum juris repudiata intelligebatur hereditas, & a paternis creditoribus conveniri non poterant *d. §. 2. h. t.* Eo tamen beneficio Prætor liberis prodesse, non obesse voluit. Necessitatem igitur, non suitatem eis ademit. Suitas enim filiis in complusculis juris articulis utilis videbatur. Inde regula juris orta, sine herede non mori, qui suum heredem licet abstinentem habet *l. 30. §. 10. ff. de fideicomm. libertat.* Neque putet, id in nuda subtilitate consistere. Inde enim, ut omittam alia, intelligitur, cur nudum sui heredis nomen confirmet substitutionem pupillarem filio a parente factam *l. 41. ff. de acquir. vel omittere. hered.* Id autem eo magis adverti debet, quia alias, ut supra vidimus, deserto testamento patris, pupillaris substitutio infirmatur.

III. Quod ad heredes extraneos, ejusmodi sunt heredes generatim omnes præter servos, & liberos in potestate positos *§. 3. instit. h. t.* Igitur & extranei heredes sunt patri emancipati liberi, & extranei heredes sunt matri filii. Nam & emancipati liberi patris potestati non subsunt, & scemi-

næ patria potestate non utuntur in filios *d. §. 3. h. r.* Proinde suspectus censeretur Caii locus *2. instit. 3. 6.* Ibi enim heredes extranei definiuntur, qui nullo propinquitatis gradu testatori junguntur. Ut enim constat, arctissimo propinquitatis vinculo filius matri jungitur, ei tamen est heres extraneus.

IV. Porro ut heredibus extraneis testamento hereditas deferri possit, ii testamenti factionem, quam *passivam* vocant, habere debent *§. 4. h. r.* An cuiquam sit testamenti factio, in pura quidem institutione ex duobus temporibus decerni debet; primo scilicet ex testamenti tempore, ut ab initio secundum Catonianam regulam utilis sit institutio; deinde ex testatoris obitu. Quod si conditionalis sit institutio, tempore conditionis existentis etiam testamenti factionem heres habere debet *d. §. 4. h. r.* Ut igitur decernatur, an cum herede sit testamenti factio, in pura institutione duo, in conditionali tria tempora spectari debent: juris mutationes intermedio tempore contingentes ei non obsunt. Neque regeas, Tribonianum hereditatis etiam adeundæ tempore testamenti factionem in herede requirere *loc. cit.* Id enim eo pertinet, inutilem mortis tempore testamenti factionem in herede esse, nisi & eam habeat, quo tempore hereditatem adit. Conf. Vinn. *d. §. 4. h. r.* Sed, his omissis, hereditatis acquirendæ modos expeditamus.

V. Quod ad hereditatis acquirendæ modos, pro heredum diversitate de iis diverse pronuntiari debet. Liberi in potestate positi, ut supra monuimus, heredes fiunt necessitate juris statim post patris obitum. Igitur hereditatem potius retinere, quam acquirere videntur. Inde factum, ut ubi,
be.

beneficio abstinendi per Prætorem invento, effectus juris ex necessariis voluntarii evaserunt heredes, hereditatem non dicerentur *adire*, sed ei *se immiscere*. Aditio igitur, aliisque hereditatis acquirendæ modus in extraneis tantum heredibus locum habet. Hereditatis autem ab extraneis heredibus amplectendæ voluntas factio, vel verbis indicari potest §. 6. *h. t.* Si factio id quidem fiat, veluti vendendo, donando res in hereditate repertas, quis dicitur pro herede gerere: si verbis factum id fuerit, hereditas adiri dicitur. Igitur præter aditionem, & pro herede gestionem alii hereditatis acquirendæ modi admitti non debent. Id & ratio juris evincit, & ipse Ulpianus admonet in l. 69. ff. de *acquir. vel omitt. heredit.* Neque vero ex eo, quod jurisconsulti frequenter aiunt hereditatem *agnosci*, inferri debet, tertium hereditatis acquirendæ modum agnitionem esse. Ita enim & admissio, susceptio hereditatis acquirendæ modus diversus esset. Nam & hereditatem *admitti*, *suscipi* sexcenties apud jurisconsultos invenies.

VI. Ex dictis hætenus facile de eorum sententia pronunciari queat, qui in cretione tertium hereditatis acquirendæ modum constituunt. Cretio enim hereditatis vix quicquam ab aditione distat. Inter utramque id tantum intererat, quod aditio nudis verbis peragebatur; cretione & solemnibus verbis, & testibus præsentibus expediti oportebat. Hinc Varro *cernere hereditatem* nil aliud esse scribit, quam decernere heredem se esse velle de *lingu. Lat. 6.* Ceterum ut totum cretione negotium apertius intelligatur, advertendum in primis, hereditatis aditionem periculosam hodie esse; magis periculosam ante Justinianum fuisse olim,
in.

inventarii beneficio nondum invento. Proinde ut maturiori consilio de re tam momentosa statueret heres, certum ei tempus indulgebatur olim, intra quod decerneret, agnoscere, an omittere mallet hereditatem. Ejus temporis definitio remittebatur Præsidis, aut Prætoris arbitrio: ii rem æstimantes religione sua plus minus spatium heredi præstuebant *l. 9. C. de jur. deliber.* Eam ob rem igitur heredes quidem fori ambagibus implicabantur; legatariis vero longo post tempore solvebantur legata. Proinde ad ea incommoda præcavenda ipsi testatores testamento tempus præfinire solebant, intra quod heredes de hereditate adeunda decernerent. Si factum id foret, *cum cretione* institutus dicebatur heres. Solemnem cretionis formulam testamentis ascribi solitam ejusmodi fuisse docet Ulpianus *fragm: 22. 27. Titius heres esto, cernitoque in diebus centum proximis, quibus scierit, poteritque: nisi ita creverit, exheres esto.* Cum cretione institutus heres in hereditate adeunda, festibus præsentibus, ea formula utebatur. *Cum me Mævius heredem instituerit, ejus hereditatem adeo, cernoque.* Si igitur a verborum solemnitate discesseris, aliisque ritibus in cretione adhiberi solitis, aditio, & cretio non differebant. Ceterum scrupulositate sua cretio heredes prægravabat. Eam igitur exolescere jusserunt Arcadius, Honorius, & Theodosius in *l. 17. C. de jur. delib.* Cum vero hereditatis adeundæ tempus adhuc incertum esset, Justinianus annum deliberationis instituit. Hodie igitur heredes generatim omnes annum ad deliberandum habent, an hereditatem amplecti velint *l. 19. C. eod.*

VII. Atque his quidem modis hereditas ab extra-

tra

traneis acquiri potest. Idem, si eam repudiare malint, verbis etiam, aut facto voluntatem suam ostendent *l. 77. & 95. ff. de acquir. vel omitt. heredit.* Hereditas autem ab heredibus extraneis acquiri, aut transmitti sine aditione non potest §. 6. *h. r.* Enimvero beneficio Justiniani hodie hereditas licet non adita effectu juris transmittitur in heredes generatim omnes. Nimirum Justinianus heredes omnes deliberationis annum habere jussit; si ante aditionem decessisset heres, deliberationis anno nondum exacto, reliquum annalis deliberationis tempus in heredem transmitti concessit *l. 19. C. de jur. deliber.* Cum igitur in annum deliberationis succedat heres, effectu juris in heredes quoslibet hodie hereditas transmitti potest. Maturo autem consilio heres de hereditate adeunda deliberare debet. Nam post aditionem nullus est poenitentiae locus, ac tantum aetate minores hereditatem aditam possunt omittere §. 5. *instit. h. r.* Alii hereditatem aditam derelinquere nequeunt.

VIII. At vero Justiniani beneficio hodie ob aditionem heredi nullus est metus, & ultra vires hereditarias conveniri nequit. Cautum enim ab Justiniano fuit, ut heres, qui rerum hereditariarum inventarium rite conficeret, ultra vires hereditarias conveniri non posset *d. §. 5. h. r. & l. ult. §. 4. C. de jur. deliber.* Rite autem fit inventarium, si intra triginta dies a scientia mortis testatoris inchoetur, intra alios sexaginta perficiatur *d. l. ult. §. 3. C. eod.* Si tamen heres absit, intra annum a die scientiae inventarium seu per se, seu per procuratores perficere poterit *d. l. ult. §. 3. C. eod.* In inventario conficiendo non solum tres testes, & tabularius, sed & generatim omnes
ad-

advocari debent, quorum fortasse interest. Præter creditores igitur legatarii, & fideicommissarii quoque vocari debent *novell. 1. c. 2. §. 1.* Inventario ita confecto, subscribere ei debet heres; si heres illiteratus sit, tabularius *d. l. ult. §. 2. C. cod.* At vero inventarium rite confectum complusculos alios in jure parit effectus. Ita quidem, ubi factum id fuerit, heres adversus legatarios legis Falcidiae beneficio uti potest, & creditoribus posterioribus tuto solvit *d. l. ult. §. 4. C. 6. C. cod.* Ea tamen in specie creditores anteriores adversus creditores posteriores regressum habent. Ab eis igitur recte repetent, quod cum injuria sua posterioribus creditoribus solutum ab herede fuerit *d. l. ult. §. 6. C. cod.* At vero anterioribus creditoribus eum regressum concessit Justinianus, si penes heredem nihil ex hereditate super sit *d. l. ult. §. 4. C. cod.* Proinde si sibi quartam retinuerit heres, ad quartam usque prius excuti debet heres; quod quartam excedit, a posterioribus creditoribus peti poterit. Conf. Stryk. *in jur. modern. pandect. libr. 35. tit. 3. §. 1.*

T I T U L U S X X.

De legatis.

Testamentariæ successionis argumento absoluto, statim successio legitima videbatur hic subnectenda. Ita enim, toto jure successorio enarrato, reliqui per universitatem acquirendi modi enucleari commode poterant. Cum tamen vix ulla testamenta

menta scribantur , in quibus aliquid legari , aut fideicommitteri non soleat , opportune Tribonianus primum de legatis , mox de fideicommissis , & reliquis rebus a testamento pendentibus sermonem instituit . Ita enim , tota re testamentaria absoluta , ad legitimam successionem enucleandam censuit expeditius procedi posse .

II. Principio definitur a Triboniano legatum *donatio quædam a defuncto relicta , ab herede præstanda* §. 1. *h. t.* Apud Modestinum pro verbis *a defuncto relicta* in definitione legati legitur *testamento relicta* l. 36. ff. de legat. 2. Verum verba isthæc consulto immutavit Tribonianus , ut definitionem accommodaret novo juri per Justinianum inducto . Jure veteri scilicet tantum in testamento legari licebat . Ita codicillis ab intestato tantum fideicommitteri , non legari poterat . Verum sublato a Justiniano fideicommissorum , legatorumque discrimine , exemplo fideicommissorum hodie legata etiam in codicillis ab intestato relinqui possunt l. 2. *C. commun. de legat. & fideicomm.* Id spectans Tribonianus legata a *defuncto* , non a *testatore* relinqui definivit d. §. 2. *h. t.* Ita enim significabatur , etiam in codicillis ab intestato hodie legari posse .

III. Quod autem diximus , legatorum , ac fideicommissorum discrimen a Justiniano fuisse sublatum , id ne ita accipias , quasi utrumque vocabulum Imperator confundi jusserit . Nam hodie quæ si quid verbis directis relictum fuerit , legatum erit : quod precativè relinquitur , fideicommissum est appellandum . Fideicommissorum igitur , ac legatorum exæquutionem eo tantum pertinere voluit Justinianus , ut porro legata , & fideicommissa non di-

distingerentur effectu juris. Nimirum ita receptum jus fuerat olim, ut in legatis rigor juris inspiceretur, in fideicommissis benigna voluntatis interpretatio. Eum juris rigorem in legatis Justinianus constitutione sua spectari vetuit: ita benignam illam voluntatis interpretationem in fideicommissis observari solitam extendit ad legata quoque. Si quid igitur legato deesset, quominus jure legati sustineri posset, eum legati defectum ex jure fideicommissorum suppleri jussit. Vicissim idem Justinianus si quid amplius præ fideicommissis in legatis esset, id & fideicommissis communicari voluit *l. 2. C. commun. de legit. & fideicomm.* Quapropter beneficio Justiniani & privilegia fideicommissorum ad legata pertinent, & legatorum privilegia ad fideicommissa recte extenduntur. Inde fit, ut, si quid hodie ob subtilitatem juris peti nequeat jure legati, jure fideicommissi id peti possit. Indidem fit, ut fideicommisso petendo fideicommissarius hodie recte actiones instituat, quæ ante prædictam Justiniani constitutionem legatis tantum petendis institui poterant. Vide doctores ad *d. l. 2. C. de legat. & fideic.*

IV. Porro pro quadruplici olim legandi modo quatuor erant legatorum genera. Primo enim si ita legatum a testatore foret: *do, lego, capito, sumito, vindicato*, legatum videbatur *per vindicationem*. Si testator testamento cavisset: *heres meus damnas esto dare; heredem meum dare jubeo*; legatum dicebatur *per damnationem*. Si jussisset testator, *heredem sinere, aliquid sibi sumere legatarium*, legatum credebatur *per sinendi modum*. Denique si quid præcipuum uni coheredum testamento relictum esset, legatum *per præceptio-*

ptionem appellabatur. Cuique autem legandi generi non solum diversæ formulæ, sed jus quoque diversum constitutum erat. Nam inter diversa legatorum genera differentias decem & septem collegit Merillius *observat.* 6. 33. Verum eas legatorum differentias abolevit Justinianus; eundem etiam esse iussit legatorum effectum, quoque modo legatum esset *l. 1. C. commun. de legat. O' fideic.* Quapropter si quæ hodie differentiæ inter diversos legandi modos in pandectis occurrunt, eas compositorum negligentia recte tribuit idem Merillius *var. ex Cujac.* 2. 10. His præstitutis, hunc institutionum titulum reliquis quidem prolixioris ordinis, & memoriæ gratia in quinque capita partiemur. Primo scilicet de rebus videbimus, quæ legari possunt; deinde de personis ipsis, quibus legari potest; tertio de accrescendi jure; quarto de diversis legandi modis; postremo de errore in legando admitti solito.

V. Quod ad primum igitur, res tantum, quæ in commercio sunt, legari possunt. Si res legata sit extra commercium, ejus ne æstimatio quidem a legatario peti potest *l. 39. §. ult. ff. de legat. 1.* Si autem res non sit extra commercium, utile legatum erit, res seu propriæ, seu alienæ legentur. Nam si res aliena legata fuerit, videtur iussus heres eam redimere, ac legatario tradere. Si iusto pretio res redimi nequeat, ejus iusta æstimatio ab herede legatario præstari debet *§. 4. h. r.* Utrumque nihil iniquitatis habet. Proinde Pontifex rei alienæ legatum improbens falso fortasse credidit, jure civili rem suam a domino necessario vendi oportere, ut legatario præstari posset *c. 5. de testam.* At vero res aliena utiliter quidem legata

gata videbitur, si testator non ignorarit, eam alienam esse. Nam & res proprias facilius legare solemus, neque præsumi debet, testatorem alienæ rei redemptione heredem gravare velle *l. 67. §. 8. ff. de legat. 2.* Quapropter si de testatoris scientia dubitetur, legatarius potius probare debet rei alienæ in testatore scientiam. Probandi enim necessitas generatim incumbit actori *d. §. 4. h. r.*

VI. Rursus si cuiquam res propria legetur, & quæ in ejus pleno sit jure, inutile legatum erit. Quod enim cujusquam est, ejus amplius fieri nequit: nam ejusdem rei dominium ex pluribus titulis acquiri non potest *l. 3. §. 4. ff. de acquir. possess. C. §. 10. h. r.* Enimvero cum plus veritas, quam falsa opinio valere debeat, si quis rem suam legans eam legatarii falso crediderit, legatum consistet *§. 11. h. r.* Ceterum cum rei propriæ legatum inutile sit testamenti tempore, licet res legata post testamentum conditum vendita a legatario fuerit, adhuc inutile legatum erit. Nam ex regula Catoniana quæ legata non valent, si testator decedere fingatur testamenti tempore, ea inutilia adhuc censi debent, quocumque tempore is obeat *l. 1. ff. de reg. Caton.* Secus obtinebit tamen, si sub conditione legatum quid fuerit. Nam ad legata conditionalia regula Catoniana non pertinet *l. penult. ff. eod.*

VII. Cum inutile sit rei legatum ad legatarium pertinentis, dubium videri queat, an inutile adhuc sit rei legatum, quæ testamenti quidem tempore ad legatarium non pertinebat, post testamentum tamen a legatario acquisita fuerit. Ea in specie jus Romanum distingui jubet, utrum ex lucrativa, an onerosa causa rem legatarius fuerit
ade.

adeptus. Si rem adeptus is fuerit ex onerosa causa, veluti emptione, utile legatum erit, & rei legatæ pretium ab herede legatarius recte petet. Nam ex regula Romani juris cui pretium abest, res ipsa videtur abesse §. 6. *inst. h. t.* Sin legatarius rem fuerit adeptus ex lucrativa causa, legatum is frustra vindicat. Nam duæ lucrativæ causæ in eandem rem, & personam concurrere nequeunt *d. §. 6. h. t.* Hinc vulgata illa in jure regula, omnes debitores rem aliquam ex causa lucrativa debentes liberari, ubi res debita ad creditorem ex alia causa lucrativa pervenerit *l. 17. ff. de obligat. & action.* Legati causa lucrativa est. Si cui igitur res eadem duorum testamento legatur, ubi ex altero testamento legatum acceperit, legatum ex altero vindicare non potest *d. §. 6. h. t.* Quod si legatarius partim ex lucrativa, partim ex onerosa causa rem legatam fuerit adeptus, eatenus recte petet, quatenus ob causam onerosam pretium sibi abest *l. 82. §. 2. ff. de legat. 1.* Si cui tamen legatum sit prædium, ejusque proprietatem emerit, deducto usufructu, totum prædium petere ex testamento potest, licet usumfructum ipsum ex causa lucrativa quæsierit *d. l. 82. §. 2. ff. de legat. 1. & §. 9. h. t.* Id ita placuit, quia usufructus mera servitus censi debet. Cum tamen usufructus æstimationem recipiat, ad judicis officium in prædicta specie pertinebit, non ad totum fundi pretium exolvendum heredem adigere, sed eatenus tantum, quatenus in proprietatem fuerit impensum *d. §. 9. h. t. & d. l. 82. §. 2. ff. de legat. 1.*

VIII. Dubium etiam videri queat, quid in jure civili sit cautum, si res testamento legata ab

Tom. II.

N

ipso

ipso testatore alienata fuerit. Sane si necessitatis causa testator rem legatam alienarit, legatum adhuc præstandum erit. Neque enim in ea specie præsumi potest, adimendi legati causa alienationem fuisse initam. Sin rem legatam testator ultro vendiderit, legatum peti non potest. Ex voluntaria enim alienatione adimendi legati animus præsumi debet §. 12. *h. t.* Id autem si factum fuerit, legatum adeo corrui, ut, re quoque a testatore redempta, legatum non convalescat, nisi novam testatoris voluntatem legatarius probet *l. 15. ff. de adim. vel transfer. legat.* Quid si legata fuerit res hypothecæ causa creditori obligata? Id quoque legatum consisteret: verum rem ita obligatam luere debet heres, non legatarius. Id ipsum tamen procedet, si testator non ignorarit, rem legatam obligatam esse. Si enim id testator nesciverit, a legatario potius res lui debet §. 5. *h. t.* Nam jus præsumit, testatorem heredem suum quam minime gravare velle *l. 67. §. 8. ff. de legat. 2.*

IX. Jam vero legari a testatore possunt non solum res corporales, sed incorporales etiam §. 21. *h. t.* Ita quidem res incorporales legatæ videntur, si servitutes, actiones, nomina legata fuerint. Quod tamen ad nomina, ea dupliciter legari possunt. Primo enim legare quis potest, quod sibi debetur; deinde, quod ipse testator cuiquam debet. Si ipsi debitori legatum fuerit, legatum *liberationis* in jure dicitur, quia per ejusmodi legatum, effectus juris inspecto, debitor liberatur §. 13. *h. t.* Contra si quod ipse debet, testator creditori legaverit, consisteret id quidem legatum, modo plus in legato sit, quam in debito. Ita quidem utile le-

gatum erit, si pure legatum fuerit, quod sub conditione debetur. Sin plus in legato non sit, legatum inutile censi debet §. 14. *h. t.* & l. 29. & sequ. ff. de legat. 1. Quid si creditori legetur, cui a testatore nil debeatur? Summa quidem haud expressa, legatum inutile pronunciaverunt veteres: neque enim in ea specie definiri poterat, quantum relictum foret. Contra summa expressa, ad summam expressam quantitatem usque legatum censuerunt utile. Nam postrema hac in specie debiti defectus perinde censi debet, ac falsa in legato demonstratio: falsa autem demonstratio, ut infra liquebit, legatum non vitiat. Hinc si dotem, quam non accepit, maritus uxori leget, ejusque summam designet, utile legatum erit l. 75. §. 1. ff. de legat. 1. & §. 15. *instit. h. t.*

X. Ad hunc etiam juris articulum pertinet legatum generis, & optionis, qua de re Tribonianus agit §. 22. & sequ. *h. t.* Quod ad primum, genus passim in jure dicitur, quod logici speciem vocare solent, & individua sub se plura completitur; quemadmodum & speciem jurisconsulti dictitant rem aliquam certam, & numero definitam, & quæ *individuum* a logicis appellatur. Inde facile definieris, cujusmodi sit generis legatum. Utile autem generis legatum erit, modo de genere jurisconsultorum agatur. Recte igitur legatur servus, equus, & id genus alia d. §. 22. *h. t.* Contra logicorum genus frustra legatur. Ita quidem si legetur cuiquam animal, legatum derisorium videri debet: nam vel musca tradenda heres liberari poterit. Quod ad legatum optionis, optio legata dicitur, si cuiquam libera electio ex pluribus speciebus legata fuerit §. 23. *h. t.* Ejusmodi

legatum olim tacitam conditionem habebat, si legatarius vivus optasset. Ante electionem igitur legatario obeunte, ad ejus heredem legatum non transmittabatur, Secus tamen Justiniano placuit. Is enim optionis legatum purum haberi jussit. Proinde hodie, si in vita legatarius non optarit, in facultatem optandi succedit heres *d. §. 23. h. t.*

XI. Haud infrequenter usuvenit, ut res legata pereat. Igitur haud inutile fuerit investigare, utrum, pereunte re legata, heredis, an legatarii damno perire eam oporteat. Generatim jus Romanum edicit, omnes debitores certæ speciei per rei interitum liberari *l. 30. §. 6. ff. ad leg. Falcid.* Proinde si sine heredis culpa, vel mora res legata pereat, ea legatario perire debet *§. 16. h. t.* Heres tamen eatenus liberatur, quatenus res legata perierit. Proinde si rei legatæ pars tantum perierit, quod superest, legatario præstandum erit: id autem exemplo gregis ad unam ovem redacti illustrat Tribonianus *§. 18. h. t.* Secus tantum de iis est, quæ non unum corpus constituunt, & quorum alterum principale est, alterum locum accessionis habet. Nam, re principali peremta, a legatario vindicari nequeunt, quæ locum accessionis obtinent *l. 2. ff. de pecul. legat.* Ita quidem fundo cum instrumento legato, fundo sine necessitate alienato, instrumenti quoque legatum extinguitur *§. 17. h. t.* Enimvero quæ de re principali pereunte diximus, ea quidem obtinent, si ea perierit, testatore superstite. Si enim res legata pereat post testatoris obitum, cum semel dies legati cesserit, quicquid ex re legata supererit seu principale, seu accessorium, a legatario vindicari potest *l. 12. ff.*

de

de *pecul. legat.* Sed, his omissis, videamus de personis, quibus legari queat.

XII. Quod ad personas, quibus legari jus patitur, de iis facile decerni potest. Generatim enim qui *passivam*, quam vocant, testamenti factionem habent, eis quidem recte legatur; qui ea testamenti factione carent, eis legari nequit §. 24. *h. r.* Passiva autem testamenti factione carebant olim non peregrini tantum, quique ex lege Papia non poterant ex alieno testamento capere, sed incertæ quoque personæ. Nimirum hereditas, & legatum ob testatoris benevolentiam relinqui solet. Nulla igitur videbatur habenda ratio hereditatis, aut legati personis relictæ, quas testator nulla benevolentia complecti posset. Hinc, rigore juris civilis inspecto, postumi saltem alieni non solum institui, sed & legata capere vetabantur olim §. 26. *h. r.* Postumus alienus in jure dicitur, qui natus inter suos heredes testatori non nascitur *d. §. 26. h. r.* Verum jure Romano novissimo & postumi generatim omnes passivam testamenti factionem habent, & incertitudo personæ institutionibus, aut legatis haud obstat, si quodcumque de persona certo constare possit §. 27. *h. r.* Id autem factum constitutione Justiniani, quæ desideratur quidem in codice repetitæ prælectionis, memoratur tamen a Triboniano *d. §. 27. h. r.* Nunc, quod polliciti supra sumus, de jure accrescendi pauca subnectamus.

XIII. Jus accrescendi, ut infra liquebit, facit, ut vacans hereditatis, aut legati pars ad ipsum heredem, legatariumve pertineat. Id in hereditatibus quidem necessario admiserunt jurisconsulti. Nimirum inter testatum, & intestatum naturalem veluti pugnam jus civile statuerat. Deficiente igitur

tur coherede, vacantem partem hereditatis ipsis coheredibus testamento scriptis accrescere oportebat. Si heredibus legitimis ea delata fuisset, contra juris regulam partim testatus, partim intestatus decessisset defunctus. Conf. Bynkersh. *observat.*

2. 3. Licet vero eadem ratio in legata non caderet, tamen deficientem quoque legati partem legatario potius, quam heredi scripto addixerunt jurisconsulti. Nam, decerpto semel ex hereditate legato, præsumta testatoris voluntas magis legatariis in legato conjunctis, quam heredibus testamento scriptis favere videbatur. Ita primum inter collegatarios etiam receptum est jus accrescendi, si pluribus aliquid conjunctim legatum esset. Conjunctim autem tripliciter legari potest. Hinc & triplicis generis conjuncti occurrunt in jure civili. Quidam scilicet *re* & *verbis* conjuncti dicuntur; quidam *re* tantum; quidam *verbis* dumtaxat. Re & verbis conjuncti censentur, quibus, partibus non distinctis, eadem res eadem oratione legatur. Re igitur, & verbis conjunctio fiet, si ita legetur. *Titio, & Mævio fundum Cornelianum do, lego.* Re conjuncti existimantur, quibus res quidem eadem, diversa tamen oratione legatur. In hoc igitur legato re conjuncti legatarii erunt. *Titio fundum Cornelianum do, lego; Mævio eundem fundum Cornelianum do lego.* His *disjunctim* legari scribit Tribonianus, quia diversa oratione vocantur §. 8. *h. r.* Hinc, quibus ita legatur, disjuncti aliquando dicuntur in jure, eisque *separatim* legari dicitur in l. 1. §. 3. ff. *de usufruct. accresc.* Verbis denique conjuncti sunt, quibus res quidem legatur eadem, sed partibus tamen distinctis, & quæ mente tantum intelliguntur. Hinc verbis conjun-

Si erunt legatarii, si ita legetur. Titio, & Ma-
vio fundum Cornelianum do, lego æquis partibus.
Inter conjunctos generatim omnes jus accrescendi
obtinet sine discrimine §. 8. h. t. Lege quidem
Papia ad locupletandum ærarium jus accrescendi
in pluribus speciebus fuit abolitum. Vide Heinecc.
ad leg. Pap. 3. 11. Id ipsum tamen secundum ve-
teris juris regulas omnino restituit Justinianus l.
un. C. de caduc. toll. & d. §. 8. h. t.

XIV. Jus autem accrescendi definiri cum Cu-
jacio queat *jus nanciscendæ, aut retinendæ partis*
ejus, qui non concurrat, vel concurrere desit pa-
ratitl. de usufruct. accres. Verba *nanciscendæ, aut*
retinendæ duplex jus accrescendi designant, ipsum
jus accrescendi scilicet, & jus non decrescendi.
Nimirum re & verbis, aut verbis tantum conjun-
cto, altero non concurrente, re vera videtur alie-
num legatum accrescere. In ejusmodi enim lega-
tis ab initio pars sua cuique collegatario relicta
intelligitur. Contra re tantum conjuncto, colle-
gataro non concurrente, legatum non accrescit
quidem, sed potius non decrescit. Nam in lega-
to conjunctionis re factæ ab initio aperte lega-
tur cuique solidum. Longe autem inter re con-
junctos interest, & alios aliis modis in lega-
tis conjungi solitos. Nam re quidem conjuncti
deficientis collegatarii portionem sine onere ac-
quirunt, si quid fortasse oneris collegataro defi-
cienti fuerit impositum. Contra reliquis conjun-
ctis cum onere deficientibus collegatariis imposito
legatum accrescit l. unic. §. 11. C. de caduc.
toll. Id ita placuit, quia re conjunctis solidum a-
perte relinquitur ab initio. Re igitur conjunctos
onere collegataro deficienti imposito gravari non

oportebat. Verba definitionis, *qui non concurrat, vel concurrere desit*, eo spectant, ut intelligatur, jus accrescendi locum habere non minus in proprietate, quam in usufructu legato. Quid autem discriminis ea in re intercedat inter proprietatem, & usumfructum legatum, exposui *libr. 2. tit. 4. §. 15.* His igitur omissis, diversos legandi modos enucleemus.

XV. Modi legandi complures occurrunt in jure civili. Nam & pure, & sub conditione, & post certum tempus legari jus patitur. Pro diverso tamen legandi modo diversum jus petendi est. Nam, siquidem pure legetur, statim post testatoris obitum legati dies & cedit, & venit *l. 5. princ. C. §. 1. ff. quand. dies legat. vel fideic. ced.* Dies in jure cedere dicitur, cum jam aliquid deberi coepit, peti tamen non potest, nisi tempus præstitutum jam venerit. Contra dies venisse dicitur, cum quod debetur, peti jam potest *l. 213. princ. ff. de verb. signif.* Si legatum sub conditione fuerit, dies nec cedit, nec venit, nisi conditio extiterit *l. 21. princ. ff. quand. dies legat. vel fideic. ced.* Denique si post certum tempus legatum fuerit, veluti anno decimo post testatoris obitum, cedit quidem legati dies statim post testatoris mortem, sed ea non venit, nisi adjectum legato tempus advenierit *d. l. 21. princ. ff. eod.* Ceterum ex regulis quidem antiqui juris legatum ante heredis institutionem factum censebatur inutile. Id ita placuit, quia heredis institutio omnium testamenti capitum fundamentum existimabatur. Verum legata Justinianus sine discrimine præstari iussit, seu ante, seu post institutionem heredis relicta forent *§. 34. h. t.* Post legatarii mortem quoque, aut heredis

redis frustra legabatur olim. Nam regula juris erat, actionem, quæ a defuncto, vel contra defunctum non incœpisset, non posse ab herede, vel contra heredem incipere. Verum ab ejusmodi subtilitatibus recedi jussit Justinianus. Is enim post mortem heredis etiam, aut legatarii legari concessit §. 35. *h. t.* Ita regulam antiquo juri contrariam constituit, eaque cavit, ut actiones ab heredibus, & contra heredes possent incipere *in l. unic. C. ut action. & ab hered. & contr. hered. incip.*

XVI. Inutilia quoque videbantur olim legata pœnalia, seu quæ pœnæ nomine relinqui dicebantur. Ejusmodi legata erant, quæ heredis magis coercendi gratia, quam liberalitatis erga legatarium exercendæ causa fierent. Sane ejusmodi legatum ita ferme definit Ulpianus: ejus enim hoc exemplum affert: *si filiam tuam in matrimonium Titio non collocaris, decem millia Seio dato fragm.* 24. 17. Proinde a vero fortasse aberrat Bynkershoekius, qui legata pœnæ nomine censuit ea tantum, quibus heredi testator illicitum aliquid, aut probrosum injungit *in dissert. de legat. pœn. nom. c. 4.* Utcumque id erit, legata pœnæ nomine relicta Justinianus præstari jussit, modo ne quid impossibile, turpe, aut legibus interdictum in eis heredibus præscriberetur §. 36. *h. t.* Hodie igitur utile legatum erit, si ita caverit in testamento testator. *Si heres filiam suam cum Titio in matrimonium non collocarit, decem millia Seio dato.* Contra inutile legatum erit, si ita testator testamento caverit. *Titius, si Mævium non occideris, Sempronio centum dato.* Inutilia denique legata sunt, quæ quis sibi adscripserit alieno testamento scri-

scribendo adhibitus, licet ipse testator ea dictarit. Qui autem ausus id fuerit, non solum legatum amittit, sed & lege Cornelia de falsis puniri debet *l. 15. ff. ad leg. Cornel. de fals. & senatusc. Libon.* Si tamen speciali subscriptione sua declaret testator, se id legatum dictasse, & legis Corneliæ pœna cessat, & legatum a legatario peti poterit *l. 1. §. 8. ff. eod.* Nunc, quod superest, de errore in legando admitti solito pauca moneamus.

XVII. In legando error admissus aut in legatarii, aut in rei legatæ nomine, aut in rei legatæ demonstratione, aut denique in legati causa versatur. In nomine legatarii admissus error legato non obest, modo de legatarii persona constet *§. 29. h. t.* Idem placuit de errore in rei legatæ nomine, modo de re liqueat. Utile igitur legatum erit, si quis legaturus fundum Sabinianum cum Sempronianum appellet *l. 4. princ. ff. de legat. 1.* Utriusque jurisprudentiæ causa inde pendet, quod personarum, ac rerum significandarum gratia vocabula sunt inventa. Proinde si de personis, ac rebus aliunde constet, ob ejusmodi errorem legata infirmari non debent. Quod tamen de errore diximus in nomine rerum legatarum admissio, id quidem de vocabulis, quæ propria vocant, intellige. Si enim erratum fuerit in nomine, quod *appellativum* dicunt, legatum non consistit. Hinc si quis vestem legaturus supellectilem eam appellet, inutile legatum erit, ac neutrum debebitur *d. l. 4. princ. ff. eod.* Ejus juris causa inde promanat, quod nomina rerum appellativa ex publica cujusque populi auctoritate pendent; privatorum autem arbitrio usque adeo indulgeri non debet, ut publicum loquendi morem invertant. Hinc ejusmodi vocabula

Immutabilia vocat jurisconsultus d. l. 4. princ. ff. eod. Quod ad errorem in rei demonstratione admissum, ne is quidem legatum infirmat. Nimirum demonstratio in legato est adjectio quædam, qua facilius res legata solet intelligi. Ea igitur a proprio rei vocabulo parum abest. Proinde exemplo erroris admissi in nomine rei proprio error in demonstratione admissus legatum infirmare non debet §. 30. h. t. Hinc si quis fundum Sabinianum legans eum a Sempronio se emisse dixerit, licet fundus ab alio fuerit emptus, legatum non infirmatur. Denique neque falsa causa legatis obest. Causa enim legandi necessario legato non hæret, & sine ulla causa legari potest, & solet. Hinc si legans testator legato adjiciat, se legare Titio, quia negotia sua curavit, licet testator id falso crediderit, legatum adhuc debetur §. 31. h. t. Enimvero si testator eam tantum ob causam legarit, idque ab herede probetur, exceptione doli legatarius repellitur, ubi legati causa ab herede falsa fuerit ostensa l. 72. §. 6. ff. de condit. & demonstr.

XVIII. Petendi autem legati causa tres actiones sunt in jure proditæ. Prima est personalis ex testamento, quæ ob quasi contractum aditionis adversus heredem legatario competit §. 5. de oblig. quæ quas. ex contract. nasc. Altera est rei vindictio adversus quemcumque possessorem, si res legata tempore mortis in dominio testatoris fuerit. Ejus enim rei dominium statim post testatoris obitum transit in legatarium l. 80. ff. de legat. 2. Tertia actio hypothecaria est ex hypotheca permanens, quam Justinianus in omnia defuncti bona legatarios habere jussit l. 1. C. commun. de legat. & fideic. At vero anteq. hereditatis aditionem

legatum peti non potest. Proinde, si testamentum deseruerit heres, legata corruunt §. 2. *inst. de leg. Falcid.* Inde tamen olim fraudum leges uberrima. Proximi enim heredes ab intestato heredes testamento scripti hereditatem ex testamento dolose repudiabant; eandem vero ab intestato petebant, ut legatorum, aut fideicommissorum onus effugerent. Proinde æquissime statuit edicto Prætor, ut, si factum id foret, utili ex testamento actione ad legata, & fideicommissa præstanda adigerentur heredes non secus, ac si ex testamento adita fuisset hereditas *l. 1. ff. si quis omiff. caus. testam.* Ab eo autem Prætoris edicto in Regno hodie recedi non debet.

T I T U L U S XXI.

De ademptione legatorum, & translatione:

Liberrima testatori facultas est adimendi legata, si velit. Adimi autem legata solent vel ipso jure, vel ope exceptionis. Ipso quidem jure legata adimuntur vel expresse, vel tacite. Expresse adempta intelliguntur, si testamento, vel codicillis ea disertis verbis testator ademerit *princ. h. t.* Tacite adempta videbuntur, si ex facto aliquo de mutata testatoris voluntate constiterit. Ita quidem tacite legatum censetur ademptum, si testator aut legatum in testamento deleverit, aut rem legatam ita mutaverit, ut in pristinam formam redire nequeat *l. 88. ff. de legat. 3.* Contra exceptionis ope inducitur legatorum ademptio, si ob luculen-

ta

ta quidem indicia de mutata testatoris voluntate præsumi queat. Ita exceptione legatarius repellitur, si inter eum, & testatorem capitales inimicitia subortæ fuerint. Ea tamen in specie convalescet legatum, si redintegrata sit amicitia *l. 4. ff. de adim. vel transf. legat.*

II. Aliquando non simpliciter adimuntur legata, sed transferuntur. Legatum transferri dicitur, si ab uno transferatur in alium §. 1. *h. t.* Ut autem ab alio in alium recte fiat legati translatio, quinque saltem testes sunt adhibendi. Si id factum non fuerit, consistet quidem legati ademptio; is tamen, in quem translatio facta fuerit, legatum vindicare non potest. Ea igitur in specie legatum neutri debetur *l. ult. §. 3. C. de codic.*

T I T U L U S XXII.

De lege Falcidia.

LAtissima legandi facultas in duodecim tabulis testatori concessa fuerat. Inde fiebat, ut sæpe repudiarentur hereditates legatis exhaustæ. Ita ipsorum testatorum intererat, ut coangustaretur legandi licentia. Nam, ob nimia legata testamento deserto, res facile redire poterat ad intestati causam. Primo igitur coercita fuit legandi licentia plebiscito Furio. Eo cautum narrat Ulpianus, ne cui quis legaret, mortisve causa donaret supra asses mille *fragm. tit. 2.* Verum eo plebiscito malo consultum non fuit, & facile eludi poterat. Licebat enim testatori tot mille assium legata scri-

bere, ut nihil, aut parum ad heredem rediret. Eadem de re inutilis quoque fuit providentia legis Voconia anno Urbis 594. Ea quidem cautum & illud fuit, ne quis plus cuiquam legaret, quam ad heredem perveniret Cicer. 1. in Verr. 43. Verum post ipsam legem Voconiam in vetus incommodum res facile devenire poterat. Id sane fiebat, si minutulis legatis pars hereditatis maxima absumpta foret, ac semuncia tantum exempli gratia relinqueretur heredi. Neque enim ullus legatorum numerus præscriptus ea lege fuit. Ita opportunius videbatur legem ferri, quæ ultra certam hereditatis partem legatis absumi non sineret. Id quidem sub Augusto factum lege Falcidia, quæ & ipsa plebiscitum fuit anno Urbis 745. Prudentissime igitur ea cautum, ne quis ultra dodrantem hereditatis legatis absumeret; hereditatis vero quadrantem saltem heredi relinqueret; si minus heredibus relictum esset, legata eo usque pro rata imminuerentur, donec quarta hereditatis pars heredibus salva foret *l. 1. ff. ad leg. Falcid.*

II. Jam verò sola legata lex Falcidia imminuissuset, ut quarta hereditatis pars salva esset heredi. Ita per fideicommissa singularia lex Falcidia adhuc eludi poterat. Proinde post jurisconsultos opportunum censuere Principes, ut ob heredis quartam ea quoque fideicommissa possent imminui *l. 5. ff. ad leg. Falcid. C. l. 2. C. eod.* Non deerant tamen, qui heredes defraudarent aut donationibus mortis causa, aut donationibus conjugum fieri solitis. Ejusmodi enim donationes Falcidia subesse non credebantur. Quapropter, qui sequuti sunt, Principes ad eas quoque donationes Falcidiam extendunt. Hodie igitur ratio Falcidia in donationibus

tionibus etiam aut mortis causa, aut inter conjuges locum habet. Nam ex donationes non socus, ac legata, per mortem tandem confirmantur, l. 5. C. 12. C. eod.

III. Porro legis Falcidiae ratio in singulis heredibus observari debet §. 1. b. r. C. l. 77. ff. ad leg. Falcid. Legi igitur non videtur satisfactum, si, duobus heredibus institutis, pars quidem alterius legatis non delibetur, alterius vero legatis exhauriatur. Ceterum Falcidiae quantitas ex patrimonii quantitate pendet. Patrisfamilias patrimonium pro diversitate temporum solet diversum esse. Verum ut de quantitate patrimonii decernatur in deductione Falcidiae, tempus mortis spectari placuit l. 73. princ. ff. eod. Incrementum igitur, aut damnum, quod contingit post testatoris obitum, heredem sequitur. Hinc si minus quarta relictum heredi fuerit, mox autem, ob partum pecorum hereditate aucta, salvus ei sit quadrans, ab herede legata adhuc delibari poterunt §. 2. b. r. Enimvero si quid accesserit hereditati jacenti ex contractu defuncti, id & in patrimonio computatur, & in quartam imputari debet. Hinc si fortunæ debitoris hereditarii, qui solvendo non erat, post defuncti mortem excreverint, quod is debet, in quartæ computationem venit l. 56. §. 1. ff. eod.

IV. Jam vero in defuncti patrimonio ea tantum intelliguntur esse, quæ supersunt, deductis oneribus. In onerum censum veniunt res alienum hereditarium, impensæ funeris, & servorum in testamento manumissorum pretia §. 3. b. r. Proinde si defuncti creditor heres sit institutus, ejus quoque debitum in Falcidiae ratione computari debet. Licet enim inter defunctum, & heredem jus actio-

nes confundi jubeat, id tamen post additionem contingit. In computatione vero Falcidiæ non tempus additionis, sed mortis spectatur, quo quidem tempore nondum fit actionum confusio *l. 6. princ. C. ad leg. Falcid.* Quod si cui legata sint alimenta, in ponenda legis Falcidiæ ratione alimentorum quoque quantitas imminui debet. Ea autem in specie legati delibatio pendet e vitæ longitudine, quam homini jus præstituit secundum Macri definitionem *in l. 68. ff. ad leg. Falcid.* Ibi vero a prima ætate usque ad annum trigessimum annorum triginta definitur spatium humanæ vitæ. Ibidem post annum trigessimum tot annos vivere dicuntur homines, quot ad annum sexagesimum desunt. Post annum sexagesimum anni quinque supersunt humanæ vitæ. Alimentorum igitur quantitate ad eum annorum numerum computata, tota alimentorum summa facile colligetur. Ita vero facile dignosci poterit, quatenus in deducenda Falcidia imminui alimenta debeant. Conf. doctores ad *d. l. 68. ff. eod.*

V. At vero juris publici necessitate olim quarta Falcidia debebatur heredi. Ei igitur privatorum pactis derogari non poterat. Proinde, jure pandectarum inspecto, non solum testamento testator quartæ detractionem prohibere nequit, sed inter testatorem, & heredem frustra etiam convenitur, ut Falcidiæ beneficium amittat heres *l. 15. §. 1. ff. ad leg. Falcid.* Secus tamen Justiniano placuit *novell. 1. c. 2.* Ibi enim testatori concessum, heredi Falcidiam, si velit, auferre. Enimvero ut Falcidiam amittat heres, ejus detractio a testatore expresse prohiberi debet. Nam in dubio quidem heredi savendum erit *Carpzov. p. 3. c. 5. def.*

De fideicommissariis hereditatibus. 209
def. 13. Si tamen heres rite non confecerit inventarium, Falcidiam is frustra petit *l. 22. §. 14. C. de jur. deliber.* Si vivus quoque testator Falcidiam heredi dederit sub conditione, ut in Falcidiam imputetur testamento debitam, ab herede nihil retineri poterit, licet tota hereditas legatis fuerit exhausta *l. 56. §. 5. ff. ad leg. Falcid.* At vero potest prohiberi Falcidia non solum ex tota hereditate, sed ex certa re quoque. In certa re autem etiam tacite Falcidia prohiberi potest. Ita sane Falcidiam heres retinere nequit ex re vero, quam fideicommittendo testator in alicujus familiæ gratiam alienari vetuit *novell. 119. c. 11.*

TITULUS XXIII.

De fideicommissariis hereditatibus.

UT supra monuimus sub *tit. de legat.* novissimo Justiniani jure inter legata, & fideicommissa nil quicquam interest. Hinc Tribonianus de utrisque conjunctim egit tribus pandectarum libris *de legat. & fideicom.* Enimvero jure civili veteri inter legata, & fideicommissa latissimum discrimen erat. Legata scilicet necessitate juris astringebantur. Proinde adversus heredem legatario competeat actio, si legatum non præstaretur. Contra fideicommissa nullam juris necessitatem habebant. Quapropter qui fideicommissum præstare nollit, ad ejus præstationem per actionem compelli non poterat. Totius differentię ratio inde pendebat, quod legata ab ipso duodecim tabu-

Terull.

○

la.

larum jure firmitatem acceperant: *paterfamilias uti legasset, ita jus esto*. Verum fideicommissa per publicas leges nusquam confirmata fuerant. Ad eorum igitur præstationem heredes adigi non oportebat. Nimirum formulæ in fideicommissis adhiberi solitæ præcativæ erant Ulpian. *fragm.* 25. 1. Preces igitur, seu extrema quædam mandata testatorum ad heredes complectebantur. Quapropter ut alicujus preces contemnere impune licet, ita fideicommissum heres contemnere impune poterat. Inde factum, ut ab initio testatores ad fideicommissa devenirent tandem, cum res ad fideicommissarios aliter pervenire non posset.

II. Jam vero apud veteres Romanos olim fideicommissa fuerunt prorsus ignota. Ea primum invaluerunt ob pias testatorum fraudes adversus jus publicum admitti solitas. Ex regulis scilicet Romani juris ex alieno testamento complusculi capere vetabantur. Ejusmodi exempli gratia deportati, peregrini erant. Cum igitur per leges ad eos hereditas, aut legata pervenire non possent, per secreta mandata testatores heredum fidei committebant, ut post mortem suam ipsis aut hereditatem totam, aut ejus partem aliquam restituerent. Ita primum exorta fideicommissa. Verum post legem Voconiam fideicommissa magis increbuerunt. Nimirum, ut supra vidimus, lex Voconia heredes ad fœminas redire vetuit. Si quis igitur hereditatem ad fœminam pervenire vellet, ad fideicommissum confugiebat. Et honesti quidem heredes fideicommissa exquebantur: subdoli homines fidem fallebant impune, cum fideicommissa juris necessitate carerent. Verum in veteri sanctitudine morum fidem plerique servabant. Proinde ne ob
fidem

fidem civium fraus fieret legi Voconiae, ii jura-
mento promittere cogebantur, ne contra legem
Voconiam quid foeminis restituerent Cicer. *de
finib.* 2. 58. Voconianae autem legis exemplum o-
stendit, ob Civitatis commoda civilem honestatem
cum naturali aliquando non convenire. Sane con-
tra legem Voconiam hereditatem restituere roga-
tus heres, si testatoris mandatum exequeretur, ne-
glecto legum obsequio, inhonestum se praestabat
civem. Si mandatum non impleveret, naturali ho-
nestate contempta, se praestabat inhonestum homi-
nem, Conf. *libr.* 1. *tit.* 1. §. 3.

III. Cum olim igitur ad fideicommissa petenda
deesset actio, ea inter inter fidem, ac perfidiam,
fluctuarunt ad Augustum usque. Nullum autem
discrimen fecere veteres, num capaces, an inca-
paces fideicommissarii forent. Primus Augustus di-
stingui jussit, utrum capacibus, an incapacibus fi-
deicommissa relicta essent. Fideicommissa incapa-
cibus relicta ex veteris jurisprudentiae regulis praes-
tari vetuit. Si capacibus relicta forent, non se-
mel extra ordinem ipsos consules curare jussit, ut
ea heredes exequerentur. His initiis eo devenit
est tandem, ut fideicommissa capacibus relicta ne-
cessitatem juris haberent, Praetore creato, qui per-
petuo extra ordinem de fideicommissis jus diceret
§. 1. *h. t.* Ceterum fideicommissa non ejusdem sunt
generis. Dividi ea solent in *universalia*, & *singula-
ria*. Universalia vel totius hereditatis, vel ejus
certae partis restitutionem continent. Singularia res
aliquas restitui jubent. Ab initio autem in fidei-
commissis constituendis modestiores fuerunt Roma-
ni veteres. Sane apud veteres jurisconsultos perra-
ro invenies, fideicommissum perpetuum instituisse

quempiam. Verum ante ipsum Justiniani ævum perpetuitas fideicommissis frequentissime injungebatur. Post Imperii tamen Romani ruinas perpetua fideicommissa mirum in modum increbuerunt. Ejus rei causas enarravi *in jur. Regn. libr. 2. tit. 9. §. 2.* His præstitutis, hoc titulo de fideicommissis universalibus, insequenti de singularibus sermonem instituemus.

IV. Primum omnium universale fideicommissum passim definiri solet *obliqua ratio acquirendæ hereditatis, ejusve partis*. Id fideicommissum instituturus testator primum sibi scribere debet heredem; deinde eundem rogare, ut hereditatem, ejusve partem alteri restituat §. 2. *h. t.* Fideicommissa isthæc id singulare habent, quod eorum restitutio post certum tempus possit injungi *d. §. 2. h. t.* Idem in directa heredis institutione non licet, ne contra juris regulam quispiam partim testatus, partim intestatus obeat, Ea juris regula fideicommissio non obstat. Nam quandoquunque ex fideicommissio restituatur hereditas, heres fiduciarius & heres esse pergit, & heres perpetuo fingitur. Vulgata enim juris est regula, semel heredem factum non desinere heredem esse *l. 38. ff. de hered. instit.*

V. Jam vero cum heres fiduciarius post restitutam ob fideicommissum hereditatem heres esse pergeret, is juris rigor fideicommissis exequundis impedimento erat. Restitutæ enim hereditatis emolumentum redibat ad fideicommissarium; heres vero fiduciarius a defuncti creditoribus conveniri poterat. Ita ob ejusmodi incommodum & testamenta deserebantur, & fideicommissa sæpissime corruebant. Ne igitur supremæ civium voluntates periclitarentur,

tur, Senatusconsulto Trebelliano heredibus subve-
niri placuit. Eo autem cautum sub Nerone fuit,
ut actiones omnes, quæ in heredem, & heredi
competerent, transirent in eum, cui ex fideicom-
missi causa hereditas restituta foret §. 4. *h. r. C.*
l. 1. §. 2. ff. ad senatusc. Trebell. Verum post
ipsum senatusconsultum Trebellianum hereditates
ob fideicommissi vinculum passim quoque recusa-
bantur. Nam per senatusconsultum non ipso jure
a creditoribus liberabatur heres, qui restituisset he-
reditatem: ei enim opus erat exceptione restitutæ
hereditatis, ut adversus creditorum actiones tueri
se posset *d. l. 1. §. 4. ff. eod.* Proinde ut ad ejus-
modi hereditates heredes allicerentur, senatuscon-
sulto Pegasiano sub Vespasiano cautum, ut heres
fiduciarius quartam restituendæ hereditatis partem
sibi retinere posset. Ita Senatusconsulto Pegasiano
heredi fiduciario competere cœpit jus ei simile,
quod antea lege Falcidia concessum fuerat heredi
directe instituto §. 4. *h. r.* Inde autem factum, ut
quarta ex senatusconsulto Pegasiano heredi fiducia-
rio debita Falcidia etiam a veteribus dici soleat.

VI. Ante Justinianum igitur si non ultra do-
drantem hereditatis ab herede fiduciario restitu-
endum esset, ex senatusconsulto Trebelliano restitu-
batur hereditas. Ea autem in specie pro rata he-
reditaria competeabant actiones in heredem fiducia-
rium, & fideicommissarium; in heredem quidem
fiduciarium ex jure civili; in fideicommissarium
vero ex senatusconsulto Trebelliano. Nam cautum
eo fuerat, ut pro rata restitutæ hereditatis in fi-
deicommissarium actiones transirent §. 6. *h. r.* Quod
si ultra dodrantem hereditatis ab herede fiduciario
restituendum esset, restitutio fiebat ex senatuscon-

sulto Pegasiano. Fiduciarius igitur, si vellet, quarta sibi retenta, reliquam hereditatem fideicommissario restituebat. Ne tamen ob retentam quartam solus heres fiduciarius a creditoribus conveniretur, inter eum, & fideicommissarium stipulationes interponendæ erant, ut pro rata hereditaria uterque conveniri posset. Hæ vero stipulationes *partis*, & *pro parte* dicebantur *d. §. 6. h. t.* Vide Ulpian. *fragm.* 25. 15. Quod si heres fiduciarius, quarta non retenta, totam hereditatem restituere mallet, is post restitutam hereditatem rigore juris heres adhuc pergebat esse. A creditoribus igitur hereditariis conveniri poterat. Proinde ut ejus indemnitati prospiceretur, inter eum, & fideicommissarium stipulationes *emptæ*, & *venditæ hereditatis* interponi solebant *d. §. 6. h. t.* Verum ejusmodi stipulationes non omnimodam securitatem præstabant heredi fiduciario. Eis enim interpositis, heres fiduciarius, rigore juris inspecto, adhuc a creditoribus conveniri poterat: tantum si quid solvisset, id ei ob prædictas stipulationes a fideicommissario restitui oportebat. Proinde Justinianus, senatusconsulto Pegasiano abolito, fideicommissas hereditates ex senatusconsulto Trebelliano restitui jussit. Si quid utile in senatusconsulto Pegasiano foret, id in senatusconsultum Trebellianum transfudit. Actiones igitur inter fiduciarium, & fideicommissarium ipso jure dividi jussit; quartam etiam hereditatis partem veluti ex senatusconsulto Trebelliano a fiduciario retineri concessit *§. 7. h. t.* Hinc quarta isthæc non Pegasiana quidem, sed Trebellianica hodie dici solet. Hæc vero Justinianus observari jussit non solum, si heres fiduciarius ex asse institutus esset, verum etiam si scriptus

De fideicommissariis hereditatibus. 215

ptus foret heres ex parte cum restitutionis onere §. 8. *C. 9. h. t.* Si quis igitur in triente scribatur heres cum fideicommissi onere, quarta trientis parte sibi retenta, reliquum restituere debet.

VII. Porro, quod diximus, actiones hereditarias inter fiduciarium, & fideicommissarium ipso quidem jure divisas intelligi, id quidem obtinet, si fiduciarius aut simpliciter sit institutus cum restitutionis onere, aut quartam hereditatis partem retinere sit jussus. Nam si quis certam aut rem, aut summam jubeatur præcipere, hereditatem autem alteri restituere, ea in specie in fideicommissarium transeunt actiones omnes. Id ipsum autem obtinebit, licet res, aut summa præcepta hereditatis partem longe maximam complectatur §. 9. *h. t.* Ejus juris eam rationem reddit Marcius in l. 30. §. 3. ff. *ad senatusc. Trebell.* quia scilicet res, aut summa præcepta jure hereditario non retinetur. Ceterum jure novissimo testatori licet heredi fiduciario Trebellianicam quartam adimere novell. 1. c. 2. Si autem id factum a testatore fuerit, locum habere non poterit vulgata quaestio, *an filius institutus cum restituendæ hereditatis onere duplicem quartam retinere possit*, legitimam scilicet, & Trebellianicam. Ea tamen de re vide, quæ scripti in *syntagm. h. t. §. 7.*

VIII. Denique non tantum fiduciarius heres fideicommissio restituendæ hereditatis gravari potest, sed ipse quoque fideicommissarius a testatore recte gravatur, ut, quod ex hereditate accepit, totum, partemve restituat §. 11. *h. t.* Ea tamen in specie tantum primus heres quartæ Trebellianicæ restituendæ jus habet l. 47. §. 1. ff. *ad leg. Falcid.* Enimvero si heres fiduciarius in ipsius fideicom-

missarii gratiam quartam sibi non retinuerit, ipse fideicommissarius Trebellianicam retinere poterit *l. 1. §. 19. ff. ad senatusc. Trebell.* At vero cum fideicommissa ab initio ab ipsa heredum fide manarint, ordinaria quidem probatione ea non indigent. Proinde siquidem fideicommissum heres confessus fuerit, id omnino præstari debet, licet in eo legitimus quinque testium numerus non fuerit adhibitus *§. 12. h. r.* Sin fideicommissum inficitur heres, ei fideicommissarius iuramentum deferre poterit. Si de fideicommissio iuramentum heres præstare nolit, eum veluti pro confesso damnari iussit Justinianus *d. §. 12. h. r.*

T I T U L U S XXIV.

De singulis rebus per fideicommissum relictis.

PER fideicommissum singulare quoque verbis præcativis rogatur heres, legatarius, fideicommissarius rem certam alteri restituere seu statim post testatoris obitum, seu quandocumque ei libuerit. Ejusmodi fideicommissum in duobus potissimum ab universali distat. Primo enim ex fideicommissio singulari quarta retineri nequit *l. 47. §. 1. ff. ad leg. Falcid.* Deinde in fideicommissio singulari non totius quidem hereditatis, ejusve partis, sed certæ rei testator restitutionem injungit. Ejusmodi fideicommissum erit, si exempli gratia domum, aut fundum restituere rogetur heres, aut legatarius. Quod igitur legatum ab hereditate differt, singulare fideicommissum ab universali distat. Proinde
cum

cum fideicommissa singularia ad legata proximè accederent, ea tantum legatis exæquari iussit Justinianus *l. 2. C. commun. de legat.* Cave tamen, existimes, per eam exæquationem legata, & fideicommissa a Justiniano omnino fuisse confusa. Nam ex ipso jure novissimo directo relictæ legata erunt; precativæ relictæ fideicommissa censerī debent. Suam igitur exæquationem eo tantum pertinere voluit Justinianus, ut porro idem jus de legatis, & fideicommissis esset. Per eam autem Justiniani exæquationem factum est, ut legatorum, & fideicommissorum commoda mutuo communicata fuerint. Inde fit, ut actiones legato petendo institutæ ad fideicommissa quoque petenda hodie recte extendantur. Indidem quoque promanat, ut si quid hodie legato deest, quominus jure legati sustineri queat, jure fideicommissi sustineri possit.



TITULUS ULTIMUS.

De codicillis.

A pud veteres codicilli erant epistolæ ad præsentem homines scribi solitæ. Res apprimè liquet ex Seneca *epist.* 55. Hinc in pandectis codicillos plerumque in epistolæ formam conceptos invenies. Quemadmodum vero ab initio suo fideicommissa nulla necessitate juris astringebatur, ita olim codicilli quoque nullam juris necessitatem habebant. Proinde ad eos implendos heredes compelli non poterant. Augustus primum codicillis necessitatem juris accommodavit. De novi hujus juris origine ita traditur. Lucius Lentulus in Africa decedens heredem Augustum sibi scripserat, eique per codicillos nescio quid fieri mandaverat. Augustus non solum extrema amici mandata implevit, sed rem eo quoque redegit, ut generatim in posterum codicilli necessitatem juris haberent. Invidiosum tamen Augusto fuisset, si codicillis incognitis in jure civili edicto suo necessitatem juris accommodasset. In confesso igitur jurisconsultorum definiri jussit, an absonum a jure foret, si codicilli reciperentur in Civitatem. Codicillorum usum adprobarunt omnes; præsertim vero Trebatius eorum utilitatem, & necessitatem ostendit. Aiebat enim, eis opportunissime uti posse cives, qui inter longas peregrinationes de rebus suis statuere testamento non possent, si deessent testes Romani cives. Interea Labeo jurisconsultus auctoritatis eximæ

miæ

miæ moriens codicillos & ipse scripsit. Exinde publico veluti consensu codicillis auctoritas juris accessit *princ. b. 1.* Ita autem codicilli recepti ad ipsorum firmitatem non aliud ab initio requirebant, quam ut de defuncti voluntate constaret *l. 89. princ. ff. de legat. 2.* Verum ex constitutionibus Principum in codicillis hodie quinque saltem testes sunt adhibendi *l. fin. §. 3. C. de codicill.*

II. Porro ab initio fortasse olim tantum ab eo fieri codicilli poterant, qui cum testamento decederet. Heredes ab intestato, quibus non voluntate testatoris, sed jussu legis deferebatur hereditas, codicillis non videbantur gravari posse. Verum heredes quoque legitimi ab ipsius defuncti voluntate hereditatem debent agnoscere: ab eo enim per testamentum excludi possunt. Ita ab intestato etiam codicillos fieri concessum *l. 8. princ. C. §. 1. ff. de jur. codicill.* Codicilli autem testamentorum exemplo, prout vel scripto, vel voce fiunt, recte dividuntur in *scriptos*, & *nuncupativos*. Cuicuiusmodi codicilli fuerint, ii aut *confirmati*, aut *non confirmati* testamento sunt. Confirmantur testamento codicilli, si ita testator in eo caveat: *si quos codicillos fecero, ratos haberi volo*. Singulare olim codicillorum erat, qui testamento confirmati forent, quod in eis relicta legatorum exemplo directo etiam jure valerent *l. 43. ff. de manum. testam.* Verum post exequationem legatorum, & fideicommissorum a Justiniano factam, quæ hodie relinquuntur in codicillis, jure etiam directo valent. Hodie igitur in codicillis directe etiam legari potest. Id ipsum tamen ultra legata extendi non debet. Nam Justinianus tantum legata fideicommissis exæquari jussit. Directas hereditates *de j.*

deicommissis exæquari vetuit. Hinc hodie directe quidem in codicillis legari potest; verum nec directa institutio, nec exhereditatio in codicillis permittitur. Tantum in codicillis testatori licet rogare heredem seu legitimum, seu testamentarium, ut alteri hereditatem ex fideicommisso restituat *l. 2. C. de codicill. C. §. 2. h. t.* In codicillis etiam non institui quidem, sed declarari potest heres testamento institutus. Ea enim in specie, ut Papi- nianus ait, *hereditas testamento data videtur l. 77. ff. de hered. instir.*

III. Jam vero superior formula, *si quos codicillos fecero, ratos haberi volo*, codicillos confir- mabat olim tantum testamento posteriores; eos, qui testamentum præcesserant, confirmare non poterat. Ut enim codicilli testamento anteriores firmitatem obtinerent, vel ipso testamento, vel aliis codicillis testamento posterioribus confirmari debe- bant *l. 5. ff. de jur. codicill.* aliter per testamen- tum revocati censebantur olim. Ejus autem juris ratio facile reddi potest. Testator in testamento scilicet de bonorum universitate testatur: qui au- tem de universitate testatur, singularem, quæ præ- cesserit, testationem revocare præsumitur. Id an mutatum fuerit per constitutionem Severi, & An- tonini, quæ memoratur in §. 1. *h. t.* late disputat Bynkershoekius *observat.* 8. 13. Utrumque ea de re jus civile fuerit, recepta in foro hodie senten- tia est, codicillos testamento anteriores tacite a testatore confirmatos intelligi, nisi expresse revo- cati fuerint ob glossæ auctoritatem ad *d. l. 5. ff. h. t.* Quid si post codicillos ab intestato factos postumus agnascatur, ii rumpentur agnatione postumi testa- mentorum exemplo? Subtili ratione negat id Pau- lus

lus in l. 16. ff. eod. Sic enim ibi jurisconsultus: *Codicilli locum habent, quicumque ab intestato successerit: unum enim casum esse, nec interesse, quis succedat, dummodo ab intestato succedat.* Sed de ipsis codicillorum solemnibus pauca monemus.

IV. Definiri passim codicilli solent *minus solemnis testati, aut intestati voluntas*. Verum ita quidem definiri codicilli solent, quia scrupulosis solemnibus testamentorum haud subsunt: ceteroquin & ipsi suas solemnitates habent. Primo enim seu scripto, seu nuncupatione fiant, in eis quinque testes sunt adhibendi: testium tantum rogatio in eis non requiritur testamentorum exemplo l. 8. §. 3. C. de codicill. Deinde si scripti sint codicilli, testium quidem subsignatio impune negligitur, eorum tamen subscriptio omitti non potest d. l. 8. §. 3. C. eod. At vero perperam quidam a dicendo testimonio in codicillis mulieres arcent. Neque enim ea in re a testamentis ad codicillos argumentum desumi potest. Mulierum scilicet testimonium in testamentis jus admitti vetat, quia testamenta in comitiis condebantur olim: mulieres autem comitiis olim interesse non poterant. Contra codicillis, ut vidimus, originem dederunt testatorum epistolæ. In ipsis ab initio testium nulla necessitas. Per Principum constitutiones in codicillis etiam testes adhiberi sunt jussi: in eis tamen testes non ad solemnitatem, sed ad nudam actus probationem adhiberi placuit. Cum igitur in nuda probatione mulierum testimonium leges non improbant, earum etiam testimonium in codicillis legitimum censi debet. Conf. Samuel. de Coëc. in jur. contrav. libr. 29. tit. 7. quæst. 4.

V. Finem hic faciat clausula codicillaris testamenti apponi solita. Eam testamentis clausulam testatores adjiciunt, ut si ob aliquam civilem solemnitatem omissam testamentum jure testamenti consistere nequeat, jure codicillorum saltem sustineri possit. Hinc clausulam codicillarem testatores passim ita concipiunt: *si testamentum jure testamenti non valeat, jure codicillorum ratum haberi volo*. Si id factum a testatore fuerit, & ob testamenti vitium res ad causam intestati redeat, heredes testamento scripti hereditatis commodum non amittunt. Nam per clausulam codicillarem rogati censentur heredes ab intestato, ut restituant hereditatem eis, qui heredes in testamento sunt instituti. Ut autem supra vidimus, heredem seu legitimum, seu testamentarium testator per codicillos rogare potest, ut alteri hereditatem restituat. Non absurde igitur pragmatici hanc clausulam *herbam betoniam* appellare solent. Ut enim herba isthæc vitia corporis complura curat, ita clausula codicillaris testamenti vitiis mederi solet. Ut autem ex clausula codicillari restituatur hereditas, sat quidem erit, ut in testamento sola codicillorum solemnia fuerint adhibita l. 8. §. 1. C. de codicill. Ea tamen in specie heredes legitimi quartam Trebellianicam retinere poterunt secundum ea, quæ supra docuimus *libr. 2. tit. 23.*

Finis libri secundi.

ANT 1410232

